

**BOSNA I HERCEGOVINA
FEDERACIJA BOSNE I HERCEGOVINE
Tuzlanski kanton
GRAD TUZLA
GRADSKO VIJEĆE**

S T E N O G R A M

**SA 16. SJEDNICE GRADSKOG VIJEĆA TUZLA ODRŽANE 23. FEBRUARA
2026. GODINE U POSLOVNOM OBJEKTU „GRAFIČAR“ SA POČETKOM U 10,00
SATI.**

- SJEDNICI PRISUSTVUJE 31 VIJEĆNIK.

U Tuzli, februar 2026. godine

ANA PEJIĆ – predsjedavajući Gradskog vijeća Tuzla

(Intoniranje himne Bosne i Hercegovine).

Poštovani vijećnici Gradskog vijeća Tuzla, predstavnici gradskih službi, predstavnici medija, gosti, otvaram 16. redovnu sjednicu Gradskog vijeća Tuzla.

Konstatujem da prema evidenciji Stručne službe Gradskog vijeća, sjednici prisustvuje 26 od ukupnog broja vijećnika. Za današnju sjednicu svoj izostanak nije najavio niti jedan vijećnik, dok su kašnjenja najavili sljedeći vijećnici: Muhamed Čikarić, Senia Husić, Ajla Kuluglić, Azra Feukić i Mensur Mujezinović.

U skladu sa članom 65. Poslovnika Gradskog vijeća Tuzla („Službeni glasnik Grada Tuzle“, broj 5/22 i 14/24), kojim je propisano da „Predsjedavajući obavještava Gradsko vijeće ko je osim vijećnika pozvan da prisustvuje sjednici“, obavještavam vas da je poziv za današnju sjednicu Gradskog vijeća Tuzla upućen gradonačelniku Grada Tuzle i drugim ovaštenim predlagачima materijala, sekretaru organa državne službe, te svim obrađivačima, pomoćnicima gradonačelnika i rukovodiocima stručnih službi, Upravnoj organizaciji Zavod za urbanizam Tuzla, Gradskom pravobranilaštvu Grada Tuzle, Komisija za odlikovanja i priznanja, Radnoj grupi za pripremu prijedloga Odluke o komunalnim taksama Grada Tuzle, Radnoj grupi za pripremu prijedloga odluke kojom će se detaljno regulisati pitanje povjeravanja na upravljanje, korištenje i održavanje javnih dobara, dobara u opštoj upotrebi, nekretnina, komunalne i druge infrastrukture u vlasništvu Grada Tuzle, javnim preduzećima i javnim komunalnim preduzećima, Nadzornom odboru JP Gradska veterinarska stanica d.o.o. Tuzla, Upravnom odboru Javne ustanove za predškolski odgoj i obrazovanje „Naše dijete“ Tuzla, Komisiji za izbor predsjednika i člana upravnog odbora u Javnoj zdravstveno-nastavnoj ustanovi Dom završna „Dr. Mustafa Šehović“ Tuzla, Komisiji za izbor predsjednika i članova upravnih odbora u javnim ustanovama, čiji je osnivač Grad Tuzla, kao i medijima.

Evidencija prisutnih na današnjoj sjednici Gradskog vijeća je kod uposlenika Stručne službe Gradskog vijeća.

Podsjećam vijećnike da su uz materijale za današnju sjednicu, dobili i zapisnik, a svaki klub vijećnika i stenogram sa 7. vanredne sjednice Gradskog vijeća Tuzla, održane 15.01.2026. godine.

Da li ima primjedbi na zapisnik sa 7. vanredne sjednice Gradskog vijeća Tuzla?

Ako nema, stavljam na izjašnjavanje zapisnik.

Glasanje je okončano.

Konstatujem da je zapisnik sa 7. vanredne sjednice Gradskog vijeća Tuzla, održane 15.01.2026. godine usvojen sa,

27 glasova za, nije bilo protiv i nije bilo suzdržanih.

Za današnju 16. redovnu...Zapisnik sa 15. redovne sjednice Gradskog vijeća Tuzla, održane 28.01. će se usvajati na narednoj redovnoj sjednici Gradskog vijeća.

Za današnju 16. redovnu sjednicu Gradskog vijeća Tuzla predlažem dnevni red koji ste dobili u materijalu za sjednicu.

Kolegij Gradskog vijeća Tuzla je u poslovničkom roku, 19.02.26-e godine, dostavio prijedlog da se u dnevni red današnje 16. redovne sjednice Gradskog vijeća Tuzla uvrsti tačka pod nazivom „Razmatranje i donošenje Rješenja o izmjeni Rješenja o imenovanju Konkursne komisije za provođenje postupka imenovanja člana Gradske izborne komisije Tuzla“.

Prijedlog Kolegija Gradskog vijeća ste dobili putem e-maila, kao i u materijalima podijeljenim pred sam početak sjednice.

Otvaram raspravu. Da li se neko javlja za riječ?

Zatvaram raspravu i stavljam na izjašnjavanje prijedlog Kolegija Gradskog vijeća da se u dnevni red današnje 16. redovne sjednice Gradskog vijeća Tuzla uvrsti tačka pod nazivom

„Razmatranje i donošenje Rješenja o izmjeni Rješenja o imenovanju Konkursne komisije za provođenje postupka imenovanja člana Gradske izborne komisije Tuzla“, te vas molim da se izjasnite.

Glasanje je okončano.

Konstatujem da je prijedlog Kolegija Gradskog vijeća da se u dnevni red današnje 16. redovne sjednice Gradskog vijeća Tuzla uvrsti tačka pod nazivom „Razmatranje i donošenje Rješenja o izmjeni Rješenja o imenovanju Konkursne komisije za provođenje postupka imenovanja člana Gradske izborne komisije Tuzla“ usvojen sa,

27 glasova za, nije bilo protiv i nije bilo suzdržanih.

Predložena tačka se uvrštava u dnevni red kao tačka 2. dnevnog reda, dok se ostale tačke redoslijedom pomijeraju.

Klub vijećnika Pokreta demokratske akcije je u poslovničkom roku, 19.02.2026. godine, dostavio prijedlog da se u dnevni red današnje 16. redovne sjednice Gradskog vijeća Tuzla uvrsti tačka pod nazivom „Inicijativa za izgradnju spomen obilježja borcima Drugog korpusa Armije Republike Bosne i Hercegovine na memorijalnom kompleksu Slana banja“.

Prijedlog Pokreta demokratske akcije ste dobili putem e-maila, kao i u materijalu podijeljenom pred početak sjednice.

Pozivam predstavnika Pokreta demokratske akcije, vijećnik Emir Šahović da nam obrazloži ukratko svoj prijedlog.

EMIR ŠAHOVIĆ – vijećnik Pokreta demokratske akcije - PDA

Hvala predsjedavajuća. Pa, evo ja ću baš bit kratak. Ovdje nije stvar u bilo kakvom političkom stavu. Ovo je zauzimanje stava znači kada je u pitanju zaštita jedne ideje, a ta ideja je ovaj jedinstveni memorijalni kompleks Slana banja koji je možda jedini u regionu gdje imamo svu znači historiju borbe protiv fašizma na jednom mjestu i mislim da svako u gradu Tuzla pored svojih prava ima i neke obaveze, a to je da se prilagodi kulturi i tradiciji grada Tuzla, tako da Gradsko vijeće treba zauzeti stav da se ne dijeli ni jedan znači spomenik od memorijalnog kompleksa Slana banja. Toliko od mene.

ANA PEJIĆ

U redu. Otvaram raspravu. Da li se neko javlja?

Zatvaram raspravu i stavljam na izjašnjanje prijedlog Pokreta demokratske akcije da se u dnevni red 16. redovne sjednice Gradskog vijeća Tuzla uvrsti tačka pod nazivom „Inicijativa za izgradnju spomen obilježja borcima Drugog korpusa Armije Republike Bosne i Hercegovine na memorijalnom kompleksu Slana banja“, te vas molim da se izjasnite.

Glasanje je okončano.

Konstatujem da je prijedlog Pokreta demokratske akcije da se u dnevni red 16. redovne sjednice Gradskog vijeća Tuzla uvrsti tačka pod nazivom „Inicijativa za izgradnju spomen obilježja borcima Drugog korpusa Armije Republike Bosne i Hercegovine na memorijalnom kompleksu Slana banja“ usvojen sa,

24 glasa za, 1 protiv i 3 suzdržana.

Predložena tačka se uvrštava u dnevni red kao tačka 18. dnevnog reda, dok se ostale tačke redoslijedom pomijeraju.

S obzirom da nije bilo drugih prijedloga za izmjene i dopune predloženog dnevnog reda, stavljam na izjašnjavanje dnevni red u cjelini i molim vas da se izjasnite.

Glasanje je okončano.

Konstatujem da je dnevni red 16. redovne sjednice Gradskog vijeća Tuzla usvojen sa, 28 glasova za, nije bilo protiv i nije bilo suzdržanih.

USVOJENI DNEVNI RED 16. REDOVNE SJEDNICE GRADSKOG VIJEĆA TUZLA, ODRŽANE 23.2.2026. GODINE (broj 01/04-A-1928-2026)

- Usvajanje Zapisnika sa sedme vanredne sjednice Gradskog vijeća Tuzla, održane 15.1.2026. godine

1. Vijećnička pitanja i inicijative
2. Razmatranje i donošenje Rješenja o izmjeni Rješenja o imenovanju Konkursne komisije za provođenje postupka imenovanja člana Gradske izborne komisije Tuzla
3. Razmatranje i usvajanje Odluke o pristupanju izradi Zoning plana poslovne zone „Mlake-Šićki Brod jug“
4. Razmatranje i usvajanje Odluke o načinu dodjeljivanja javnih priznanja u 2026. godini
5. Razmatranje i usvajanje Odluke o komunalnim taksama
6. Razmatranje i usvajanje:
 - a) Odluke o izmjenama i dopuni Odluke o regulisanju naknade za javna dobra, dobra u općoj upotrebi i drugu imovinu, povjerenu javnim preduzećima i javnim ustanovama čiji je osnivač ili suosnivač Grad Tuzla
 - b) Odluke o izmjeni i dopuni Odluke o komunalnim djelatnostima
7. Razmatranje i usvajanje Odluke o izmjenama i dopunama Odluke o ustanovljenju nagrade „Meša Selimović“
8. Razmatranje i usvajanje Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla
9. Razmatranje i usvajanje Odluke o dopuni Odluke o uvjetima i načinu pribavljanja i raspolaganja nekretninama u vlasništvu Grada Tuzle
10. Razmatranje i uvajanje Odluke o davanju prethodne saglasnosti Nadzornom odboru JP Gradska veterinarska stanica d.o.o. Tuzla za imenovanje direktora društva
11. Razmatranje i usvajanje Odluke o utvrđivanju prijedloga kandidata za imenovanje na upražnjena mjesta članova nadzornog odbora iz reda državnog kapitala u Javnom preduzeću Razvojno-poduzetnički centar Tuzla – „Inkubator“ Lipnica d.o.o. u Tuzli čiji je osnivač Grad Tuzla
12. Razmatranje i usvajanje Odluke o davanju prethodne saglasnosti na Odluku Upravnog odbora Javne ustanove za predškolski odgoj i obrazovanje „Naše dijete“ Tuzla o visini iznosa participacije korisnika usluga sa kriterijima za umanjenje
13. Razmatranje i usvajanje:
 - a) Odluke o raspisivanju javnog oglasa za izbor i imenovanje predsjednika i članova nadzornih odbora u javnim ustanovama, čiji je osnivač Grad Tuzla (sa tekstom javnog oglasa)
 - b) Odluke o utvrđivanju posebnih uslova i kriterija za izbor i imenovanje predsjednika i članova nadzornih odbora u javnim ustanovama, čiji je osnivač Grad Tuzla
 - c) Rješenja o imenovanju Komisije za izbor predsjednika i članova nadzornih odbora u javnim ustanovama, čiji je osnivač Grad Tuzla
14. a) Razmatranje Informacije o provedenom postupku po ponovnom Javnom oglasu za izbor predsjednika i člana upravnog odbora u Javnoj zdravstveno-nastavnoj ustanovi Dom zdravlja „Dr. Mustafa Šehović“ Tuzla (sa Rang listom najuspješnijih kandidata)

b) Donošenje Rješenja o konačnom imenovanju predsjednika i članova Upravnog odbora Javne zdravstveno-nastavne ustanove Dom zdravlja „Dr. Mustafa Šehović“ Tuzla

15. Razmatranje i usvajanje Izvještaja o rješavanju upravnih stvari u upravnom postupku Grada Tuzle za 2025. godinu

16. Razmatranje Informacije o provedenom postupku po javnom oglasu za izbor predsjednika i članova upravnih odbora u javnim ustanovama, čiji je osnivač Grad Tuzla (sa Rang listom najuspješnijih kandidata)

17. Razmatranje Prijedloga stvarne reforme pravosuđa - Inicijative za donošenje novog Zakona o Visokom sudskom i tužilačkom vijeću Bosne i Hercegovine

18. Inicijativa za izgradnju spomen obilježja borcima Drugog korpusa Armije Republike Bosne i Hercegovine na Memorijalnom kompleksu Slana banja

19. Razmatranje Izvještaja Komisije za izbor i imenovanja

20. Tekuća pitanja

Prelazimo na realizaciju dnevnog reda današnje 16. redovne sjednice Gradskog vijeća Tuzla.

VIJEĆNIČKA PITANJA I VIJEĆNIČKE INICIJATIVE

Prva tačka dnevnog reda.

Podsjećam vijećnike da je članom 163. Poslovnika Gradskog vijeća Tuzla, drugi prečišćeni tekst („Službeni glasnik Grada Tuzla 5/22 i 14/24) propisano da se vijećnička pitanja postavljaju pismeno, a čitaju se u pravilu na početku sjednice.

Podsjećam da jedan vijećnik na jednoj sjednici može postaviti najviše 3 vijećnička pitanja i podnijeti najviše 3 vijećničke inicijative. Vijećnik je vijećničko pitanje dužan izložiti u maksimalno tri minute.

Također, podsjećam da tačka dnevnog reda VIJEĆNIČKA PITANJA I VIJEĆNIČKE INICIJATIVE može trajati najduže 30 minuta.

Prvo ćemo ići sa:

VIJEĆNIČKIM PITANJIMA

Vijećničko pitanje. Vijećnica Berisa Ahmetović. Izvolite.

BERISA AHMETOVIĆ – vijećnik SDA – Stranke demokratske akcije

Dobro jutro. Evo sve da vas pozdravim, ovaj i evo da nam zaželim dobrodošlicu na današnju sjednicu, obzirom evo da se prva javljam.

Moje pitanje je, ukratko ću ga samo pročitati, a to je da ono je upućeno Javnom preduzeću Pannonica d.o.o. Tuzla, kojim tražim da mi se dostavi odgovor da li je Javno preduzeće Pannonica postupilo po zaključku Komisije za ljudska prava Gradskog vijeća Tuzla?

Naime, na osnovu zaključka Komisije za ljudska prava Gradskog vijeća Grada Tuzla od 23.10. kojim je od ovog preduzeća zatraženo da u što kraćem roku, a najkasnije do početka ljetne sezone izmijeni odredbe kućnog reda, na način da se burkini definiše kao dozvoljena odjeća za kupanje, postavljam sljedeće pitanje: Da li je ovo preduzeće postupilo po navedenom zaključku, ukoliko jeste da dostavi dokaz o izvršenim izmjenama kućnog reda, a ukoliko nije da jasno navede u kojem roku će postupiti?

Zaključak Komisije za ljudska prava je zasnovana na temeljnim principima zaštite ljudskih prava i uključuje pravo na jednak pristup svim javnim uslugama.

Javno preduzeće Pannonica upravlja javnim dobrom koje mora biti dostupno svim građanima pod jednakim uslovima, a što je i potvrdila Komisija za ljudska prava ovog tijela. Gradsko vijeće ima obavezu da prati provođenje svojih zaključaka, posebno kad se oni odnose na pitanje ljudskih prava i tražim da mi se dostavi odgovor na navedeno pitanje. Hvala.

ANA PEJIĆ

U redu. Sljedeće vijećničko pitanje. Vijećnica Svjetlana Kakeš. Izvolite.

SVJETLANA KAKEŠ – vijećnik SDP – Socijaldemokratske partije Bosne i Hercegovine

Hvala predsjedavajuća. Evo koristim i priliku da pozdravim sve prisutne. Moje vijećničko pitanje je upućeno Zdravstvenom savjetu Grada Tuzle i glasi:

Koje mjere je Zdravstveni savjet Grada Tuzle poduzeo, a koje namjerava poduzeti u skladu sa poslovima iz svoje nadležnosti propisanih Zakonom o pravima, obavezama i odgovornostima pacijenata i Odlukom o osnivanju Zdravstvenog savjeta, sa posebnim naglaskom na oblast edukacije građanstva o pravima pacijenata, zaštite prava i interesa pacijenata i edukacije, iz poznavanja materije o dostupnosti zdravstvenih usluga i pravima pacijenata i postojeće legislative?

Ovo sam sve citirala zapravo iz zakona i iz odluke, a u okviru jedne od prethodnih sjednica smo ovdje i konstatovali da građani, odnosno pacijenti, nedovoljno poznaju svoja prava i obaveze i odgovornosti kako pacijenti, tako i zdravstvene ustanove. Evo neću širit. To je to.

ANA PEJIĆ

U redu. Sljedeća vijećnička pitanja. Vijećnica Dragana Berberović. Izvolite.

DRAGANA BERBEROVIĆ GAGRO – vijećnik Naše stranke

Pozdravljam sve kolege, predsjedavajuću, dopredsjedavajuće i želim vam jedan lijep i ugodan dan da imamo što manje sukoba, a što više zajedničkih usaglašavanja i da donesemo što bolje odluke danas.

Moje prvo vijećničko pitanje glasi i imam tri, predsjedavajuća. Jel mogu sva tri pročitati? (ANA PEJIĆ - Može, može, naravno). Vijećničko pitanje, samo ću staviti kratko.

Znači, postavljam pitanje kriterij i metodologija raspodjele budžetskih sredstava medijima.

Upućujem pitanje nadležnoj službi Grada Tuzle u vezi sa raspodjelom budžetskih sredstava namijenjenim medijima oglašavanja, promocija, informacija, javnosti i drugo. Tražim jasan i precizan odgovor po sljedećim stavkama. Koji su to tačno merljivi kriteriji na osnovu kojih se vrši izbor medija za dodjelu budžetskih sredstava? Naravno, ima još podpitanja ovdje, ali da ne dužim, skratit ću.

Sljedeće vijećničko pitanje je, znači, kriteriji javnih poduzeća, javnih ustanova i službi Grada Tuzle pri izboru medija za oglašavanje i transparentnost trošenja javnih sredstava. Na osnovu informacija dostupnih u javnosti primijetno je da pojedina javna poduzeća, javne ustanova i službe Grada Tuzle oglašavaju svoje aktivnosti i zakup reklamnog prostora realiziraju na portalima sa minimalnim brojem uposlenih i ograničenim dometom, dok istovremeno etablirani lokalni mediji sa većom čitanošću i uredno izmirenim

poreskim obavezama ostaju po strani. Dodatno zabrinjava činjenice da su pojedine od tih portala u kontinuitetu usmjereni na promociju i prenošenje stavova određenih, očigledno favoriziranih političara, što otvara pitanje političkog utjecaja i nespojivosti takve prakse sa principima objektivnog i profesionalnog informisanja, kao i sa odgovornim i nepristrasnim trošenjem javnih sredstava. Takođe, ima još u ovom pitanju podpitanja, ali evo, zadržat ću se na tome.

I još jedno vijećničko zadnje pitanje. Dostupnost javnog prevoza do naselja Kovačica u Tuzli. Zanima me, da li gradski i prigradski saobraćaj GIPS Tuzla u toku dana ima barem jednu dolaznu i jednu odlaznu liniju iz Tuzle do naselja Kovačica ili je zadnja stanica Gornja Tuzla, koja je udaljena približno 4 km od naselja Kovačica? Hvala.

ANA PEJIĆ

U redu. Sljedeća vijećnička pitanja. Vijećnik Emir Čehajić i Svjetlana Kakeš. (EMIR ČEHAJIĆ – Prilažemo). U redu. Vijećnička pitanja. Vijećnik Dejan Kovačević. Izvolite. Dragana, možete samo mikrofona? Izvolite Dejana.

DEJAN KOVAČEVIĆ – vijećnik HDZ – BiH Hrvatske demokratske zajednice Bosne i Hercegovine

Hvala predsjedavajuća. Evo, prije svega da pozdravim vas, dopredsjedavajućeg, tajnika Gradskog vijeća, predstavnike gradskih službi, predstavnike institucija koji su danas nazočni na sjednici, predstavnike medija, sve goste i naravno, na kraju kolegice i kolege vijećnike, pa postavio bih, evo, vijećničko pitanje prema Službi za komunalne poslove i Centralno grijanje d.d. Tuzla:

Da li će i kada biti izvršeno priključenje domaćinstava na sistem daljinskog grijanja i isporuku toplotne energije u naselju Divkovići u Mjesnoj zajednici Bukinje? Hvala.

ANA PEJIĆ

U redu. Vijećnička pitanja. Vijećnik Ibeljić Anel. Izvolite. U redu. Vijećnička pitanja. Vijećnik Mirnes Ajanović Izvolite.

MIRNES AJANOVIĆ – vijećnik BOSS – Bosanske stranke

Prilažem, ali kratko. Četiri ponovljena. Jedno ću samo prepričati, odnosno dva, Službi za inspekcije i Vladi kantona.

2024. godine, dakle, kalendarski je tri godine već, pitanje je bilo u vezi zakonitosti korištenja prostora Vlade Tuzlanskog kantona i ministarstava, pogotovo Vlade i Ministarstva obrazovanja, jer smatram da su oni u prostoru koji je promijenio namjenu nakon što je spaljena zgrada Vlade TK, a da nisu tražili promjenu namjene. Do danas, dakle, treća kalendarska godina nisam dobio odgovore. Služba za inspeksijske poslove se bukvalno zadržava s nama, sa Gradskim vijećem i sa mnom, a to zaista ne preporučujem. I posljednji put ih upozoravam. Ne dobijem li do naredne sjednice konkretne odgovore i mjere, neću imati milosti u smislu svih pravni radnji koji ću poduzeti prema POSKOK-u i svima da budu krivično procesuirani. A već se vode predmeti krivične tužbe, to je vrlo opasno za njih. Krivična tužba je predmet u aktivnoj fazi istrage. Ovo će biti prikrivanje djela. Hoću konkretne akcije, odgovori od Vlade. Ako nemaju dozvolu za upotrebu, za promjenu namjene, Vlada mora biti izbačena napolje iz prostora. Ministarstvo obrazovanja nauke, kada je ministar Ahmed Omerović, zajedno u saradnji sa inspektorom građevinskim Edinom Skenderovićem, za pet

sati od prijave zatvorio Kallos, koji bio u postupku promjene namjene, u objektu koji je imao upotrebnu dozvolu. A ovdje treću godinu se zafrkavaju s nama. Još jednom kažem, biću nemilosrdan. Šta god, kako god shvatio, bez ikakve milosti prema svima koji budu odgovorni za prikrivanje ovih informacija, nepoduzimanje mjera. Glavni inspektor je dao nalog da to bude prioritetni predmet. Neki su počeli radit. Neki pitaju ministarstvo, imaju li oni dozvole? Nema šta pitat ministar imaju li dozvole. Izać na teren mora, od lica koji se nalazi u prostoru tražit odobrenje, odnosno promjenu namjene i dozvola, ako nema, zatvara objekat odmah, po praksi koja već postoji, jer su po toj praksi zabranili rad Kallosu. Kantonalni sud je to stavio van snage, al neka zabrani i njima. Pa neka se obrate sudu i nek ih sud spašava, kao što su to uradili Kallosu. Neki se dakle obraćaju ministarstvu da ih pitaju, imaju li oni dozvolu. Neki inspekcijama. Neki kažu nije to prioritet. Imamo mi posla. Treća kalendarska godina. A glavni inspektor je dao nalog prioriteta. Dakle, ovo je upozorenje i glavnom inspektoru i šefu službe, odnosno pomoćniku gradonačelnika Službe za inspeksijske poslove. Do sljedeće sjednice, ako ne budu imali upotrebne dozvole za promjenu namjene Vlada i Ministarstvo obrazovanja, za ostale možemo sačekati i ne budu zatvoreni, izbačeni napolje, ide brutalan izvještaj prema POSKOK-u sa svim zahtjevima pravnim da budu krivično procesuirani dodatno, pored ovoga što već postoji predmet krivične tužbe. Ne prijetim, nego se pozivam na zakonitost i neću dozvoliti ponižavanje Gradskog vijeća na bilo kakav način, bilo kojeg vijećnika, pa ni mene, time što već treću godinu ne poduzimaju zakonom propisane mjere i ne postupaju u skladu sa zakonom.

I još jedno. Evo Kantonalna uprava za inspeksijske poslove je ponovljeno. Jedno lice prima naknadu u jednoj našoj ustanovi po osnovu vojnog penzijskog staža. Prima naknadu, a taj staž ne prijavljuje kao staž, jer bi morao otići u penziju. Dakle, ili nezakonito nije u penziji ili nezakonito prima naknadu. Inspekcije odgovaraju na moje pitanje kao da sam ja postavio teorijsko pitanje u smislu da li oni imaju pravo da rade nešto il ne. Eto, kao ako vi nama prijavite nezakonitosti, mi ćemo ići. Nezakonitosti su prijavljene. Inspekcije moraju izaći na teren, otvoriti i pravo stanje i poduzeti potrebne mjere. Zato su ova ponovljena pitanja. Sva četiri. Hvala.

ANA PEJIĆ

U redu. Sljedeća vijećnička pitanja su moja. Prilažem, pa vijećnik Mirza Malkočević. Izvolite. (MIRZA MALKOČEVIĆ – Prilažem). Da li još neko ima vijećničkih pitanja? Vijećnik Omer Berbić. Izvolite. (OMER BERBIĆ – Ja ću priložit tri). U redu. Da li još neko ima vijećničkih pitanja? Nema.

Prelazimo na:

VIJEĆNIČKE INICIJATIVE

Vijećnička inicijativa. Vijećnica Berisa Ahmetović. Izvolite.

BERISA AHMETOVIĆ

Moja vijećnička inicijativa danas glasi: Rješavanje pitanja parkinga za radnike Odjeljenja za zdravstvenu njegu u zajednici i van bolničku palijativnu njegu Javne Zdravstvene Ustanove Dom zdravlja Tuzla.

Kratko obrazloženje: Ovu inicijativu podnosim nakon što su me evo zamolili neki od radnika iz ovog Odjeljenja, a istu podnosim Kolegiju Gradskog vijeća da razmotri način na koji će se pitanje parkinga za radnike ovog Odjeljenja staviti na dnevni red, da li kroz zaključak

Kolegija ili kao posebna tačka, te da isto u po potrebi se proslijedi nadležnim službama ili javnim preduzećima na izjašnjenje. Naime, radnici ovog Odjeljenja obavljaju izuzetno human i društveno važan posao. Pružaju zdravstvenu njegu u zajednici i van bolničku palijativnu njegu osobama koje su teško bolesne, nepokretne ili u terminalnim fazama bolesti. Njihov rad podrazumijeva svakodnevne odlaske na teren, obilazak pacijenata u različitim dijelovima grada, koji su vrlo često udaljeni ili saobraćajno slabo povezani. Iako imaju obezbijeđene mjesečne autobuske karte, zbog udaljenosti i prirode posla nerijetko su primorani koristiti vlastite automobile, kako bi pravovremeno i dostojanstveno obavili svoje zadatke. Radnici ne traže naknadu za gorivo niti amortizaciju vozila. Njihov zahtjev je minimalan, a to je obezbjeđenje godišnjih besplatnih parkinga karata kako bi nesmetano obavljali svoj posao, a sve to u interesu građana Tuzle. S obzirom na značaj njihove uloge u sistemu zdravstvene i socijalne zaštite, smatram da je obaveza Grada da pruži institucionalnu podršku i omogući minimum uslova za rad ovih službi. Dostojanstvo pacijenata i kvalitet usluge koju primaju direktno zavisi od uslova u kojima ovi radnici obavljaju posao. Stoga ovo pitanje zaslužuje raspravu i sistemsko rješenje, te predlažem da Kolegij zauzme stav o daljim koracima, odnosno o donošenju zaključka, upućivanju inicijative nadležnim tijelima ili uvrštavanju ove tačke na dnevni red. Hvala puno.

ANA PEJIĆ

U redu. Sljedeća vijećnička inicijativa. Vijećnik Denis Bećirović. Izvolite.

DENIS BEĆIROVIĆ – vijećnik Demokratske fronte – DF

Hvala predsjedavajuća. Koristim priliku da pozdravim vas, sekretara, dopredsjedavajućeg, kolegice i kolege vijećnike, stručne službe, predstavnike medija i sve ostale. Ja bi današnje inicijative priložio. Hvala.

ANA PEJIĆ

U redu. Vijećnik Nedžad Jusić. Vijećnička inicijativa. Izvolite.

NEDŽAD JUSIĆ – nezavisni kandidat – nacionalna manjina

Hvala poštovana predsjedavajuća, zamjenici predsjedavajuće, kolege, kolegice, vijećnici, prisutni, želim da vas pozdravim. Prije neg što krenem u diskusiji, želim da povodom mjeseca Ramazana uputim iskrene čestitke svim vijernicima Islamske vjeroispovjesti, neka ovaj Mubarek mjesec donese mir, zdravlje i snagu, te podsjeti na vrijednost, solidarnost, međusobnog poštivanja i zajedništva. Te u skladu sa Poslovníkom o radu Gradskog vijeća pokrećem inicijativu Medžlisu Islamske zajednice Tuzla za uređenje i proširenje pristupnog puta mezarju Kalebići u Mjesnoj zajednici Mosnik sa gornje strane mezarja.

Obraćam se kao vijećnik Gradskog vijeća Tuzla, a povodom potrebe uređenja pristupnog puta od javne gradske ceste koji vodi prema mezarju Kalebići u Mjesnoj zajednici Mosnik, znači to je od Ilinčice otprilike gor, ispod Ilinčice taj dio puta. Naime, zbog proširenja mezarja i nemogućnosti prilaza sa glavnog ulaza u mezarje, značajan broj dženaza se obavlja u gornjem dijelu mezarja, do kojeg se pristupa šumskim putem koji je u vlasništvu Islamske zajednice, prema mojim informacijama. Taj put je uzak, neravan i otežava dostojanstvo nošenje tabuta, posebno imajuću u vidu konfiguraciju terena i vremenske uslove. Ovako stanje predstavlja otežano i rizično kretanje učesnika dženaze. Problem za

starije osobe, mogućnost povreda, nedostatak osnovnih infrastrukturnih uslova za obavljanje vjerskog obreda. Smatram da je imajući u vidu značaj mezarja za veliki broj građana potrebno razmotriti proširenje i tehničko uređenje postojećeg puta, pa sada da se vidi daljnje, tamponiranje, eventualno asfaltiranje, a ja kao vijećnik Jusić Nedžad koji dolazim između ostalog iz te ulice, odnosno sa te mjesne zajednice, stojim na raspolaganju za podršku i bilo koje druge aktivnosti koje se budu poduzele. Hvala.

ANA PEJIĆ

U redu. Sljedeće vijećničke inicijative. Vijećnica Dragana Berberović. Izvolite.

DRAGANA BERBEROVIĆ GAGRO

Hvala predsjedavajuća. Moja inicijativa glasi obezbjeđenje parking prostora za građane ispred javnih institucija i pokretanje planske izgradnje javnih garaža. Podnosim vijećničku inicijativu za sistemsko rješavanje problema nedostatka parking prostora za građane ispred javnih institucija i drugih objekata od javnog značaja na području grada Tuzle. Građani koji dolaze u zdravstvene ustanove, sudove, zavode, PIO, Zdravstveno, škole, Gradsku upravu, porezne urede banke, pošte i druge institucije, svakodnevno se suočavaju s ozbiljnim problemom nedostatka parking mjesta. U praksi veliki dio postojećih kapaciteta zauzimaju stanari obližnjih zgrada i uposlenici institucija, dok su korisnici usluga primorani kružiti po 30-45 minuta ili parkirati na udaljenim lokacijama. Primjer UKC-a je jedan veliki kaos i nebriga za potrebe građana. Ovakvim neuređenim planom parking prostora se dodatno otežava pristup zdravstvenim i administrativnim uslugama, posebno starijim osobama i građanima slabijeg zdravstvenog stanja. Sličan problem je prisutan ispred banaka i poslovnih objekata gdje nedostatak dostupnih parking mjesta direktno utiče na rad privrednih subjekata i stvara neravnotežan položaj na tržištu.

Predlažem sljedeće: Uvođenje vremenski ograničenih parkiranja, jasno označavanje i kontrolu takvih parking zona, definisanje posebnih parking zona za uposlenike, analizu realnih potreba po institucijama i prilogađavanje saobraćajnih rješenja stvarnim opterećenjima.

Istovremeno, urgiram na ranije podnesenu inicijativu za plansku izgradnju podzemnih i nadzemnih javnih garaža na najopterećenijim lokacijama.

Grad mora krenuti putem ozbiljnih infrastrukturnih ulaganja, a ne privremenih rješenja kroz iscrtavanje i prekranje postojećih parking mjesta, kako bi se stekao privid aktivnosti bez stvarnih investicija.

Sljedeća inicijativa je uređenje autobusnog stajališta kod Energopetrol pumpe na Sjenjaku, ulica Prve Tuzlanske brigade. Podnosim vijećničku inicijativu za hitno uređenje autobusnog stajališta kod Energopetrol pumpe na Sjenjaku u ulici Prve Tuzlanske brigade, gdje se trenutno zaustavljaju gradski autobusi i taksi vozila, ali bez osnovnih sigurnosnih i infrastrukturnih uvjeta.

Na nadvedenoj lokaciji ne postoji adekvatno uređeno autobusno stajalište. Površina na kojoj putnici izlaze iz autobusa, nasuta je šljunkom i puna velikih rupa, što predstavlja ozbiljan rizik od povreda, posebno za starije osobe, djecu i osobe smanjene pokretljivosti. Realna je opasnost od spoticanja i lomova prilikom izlaska iz vozila.

S toga predlažem izgradnju uređenog autobusnog stajališta sa betonskim ili asfaltiranom podlogom, postavljanje nadstrešnice sa klupom, jasno, horizontalno i vertikalno obilježavanje autobusnog stajališta, uređenje adekvatnog ulaza i izlaza za autobuse i taksi vozila, postavljanje javne rasvjete, razmatranje, obilježavanje i dodatno postavljanje usporivača i osvijetljenog pješačkog prelaza na ovoj lokaciji. Ova lokacija je veoma opasna,

rupe su kao krateri i dosta, dosta građana mi se požalilo na ovo, da je krajnje vrijeme da se ovo uredi, jer s druge strane je taj problem riješen na tom istom mjestu.

I imam još jedno. Regulacija parkiranja na nogostupima i pješačkim površinama zbog slobodnog kretanja pješaka i preglednosti vozačima pri izlasku sa parkinga i manjih uličica na glavnu cestu. Neću ovdje dužiti, samo ću reći da imamo auta koja su parkirana na betonskim ostrvima i površinama po kojima bi trebalo da se kreću pješaci, a također takvo parkiranje onemogućava preglednost ceste, znači izlaska iz parking prostora ili manjih uličica. Nemate preglednost i ugrožena je sigurnost. Pa s toga želim ovaj da podnesem ovu inicijativu kako bi se po tom pitanju nešto uradilo. Hvala.

ANA PEJIĆ

Zahvaljujem se. Sljedeće vijećničke inicijative. Vijećnica Svjetlana Kakeš. Izvolite.

SVJETLANA KAKEŠ

Zahvaljujem predsjedavajuća. Ja imam tri inicijative, ali ću nastojat bit kratka ovaj cijenjeći vaše vrijeme.

Prva inicijativa je upućena Ministarstvu trgovine, turizma i saobraćaja Tuzlanskog kantona i Javnom preduzeću Međunarodni aerodrom Tuzla. Odnosi se na uspostavljanje redovne autobusne linije Tuzla, grad Tuzla, Međunarodni aerodrom Tuzla, grad Tuzla. O razlozima i potrebi neću govoriti, samo ću napomenuti da se ovaj problem identifikuje i u raznim strateškim dokumentima Tuzlanskog kantona, u studiji javnog prevoza, da se identifikuje u strategiji razvoja turizma itd. A priliku da se pristupi i da se riješi ovaj problem, sam evo vidjela u izmjenama i dopunama Zakona o komunalnim djelatnostima koji je usvojen na januarskoj sjednici Skupštine Tuzlanskog kantona, gdje je uvedena mogućnost sufinansiranja međugradskog linijskog prevoza od strane kantona, tako da evo nadam se da će inicijativa naić na plodno tlo.

Druga inicijativa je upućena Službi za komunalne poslove, izgradnju i poslove mjesnih zajednica. Odnosi se na apel za rješavanje dugogodišnjeg problema izlivanja kanalizacije u ulici 3. Tuzlanske brigade duž magistralne ceste M4 i naravno ispred dvorišta desetina individualnih stambenih objekata i što je još najproblematičnije, duž dvorišta Osnovne škole Slavinovići. Neću vam čitat detalje.

I sljedeća inicijativa je upućena Službi za komunalne poslove i Javnom komunalnom preduzeću Saobraćaj i komunikacije. Inicijativa je da razmotre mogućnost izmjene režima korištenja parkinga u naselju Stupine, na način da se pored stanara u određenom periodu, npr. od 8 do 16 ili do 15 sati, na parking mjesta koja su rezervisana za stanare naravno uz naplatu po satu korištenja mogu parkirati i druga vozila, prije svega korisnici usluga poslovnih subjekata koji obavljaju djelatnost u ovom naselju. Meni su se obratili vlasnici i korisnici poslovnih prostora u ovom naselju, gdje imaju taj problem da im klijenti, mušterije i korisnici nemaju prostor za parkiranje, a tokom dana ima dovoljan broj praznih parking mjesta, jer stanari nisu u naselju zbog odlaska na posao i obavljanja drugih poslova. Pa, evo, predlažem da se razmotri inicijativa i ovdje bi se takođe moglo razmislit o vremenskom ograničenju da se neko ko dođe da obavi neku kupovinu ili da koristi neku uslugu da se ograniči na 30, 60 ili 90 minuta. Eto. Hvala.

ANA PEJIĆ

U redu. Vijećnička inicijativa. Vijećnik Emir Čehajić i ja. Izvolite.

EMIR ĆEHAJIĆ – vijećnik SDP – Socijaldemokratske partije Bosne i Hercegovine

Pozdravljam sve prisutne. Upućujemo vijećničku inicijativu za uvođenje kružne linije A i kružne linije B javnog prevoza putnika u gradu Tuzla. Evo, skratit ću obrazloženje.

Navedenom vijećničkom inicijativom predlažimo uvođenje dvije kružne linije gradskog javnog prevoza u gradu Tuzla, kružne linije A i kružne linije B, s ciljem unapređenja dostupnosti i efikasnosti javnog prevoza na području grada Tuzla. Kružna linija A saobraćala bi na relaciji Siporeks, južnom magistralom do Mejdana, preko Brčanske Malte, prelazimo na sjevernu saobraćajnicu, idemo do Doma zdravlja, Ekonomske škole i ponovo do Siporeksa. Kružna linija B saobraćala bi na relaciji Siporeks, Dom zdravlja, Ekonomska škola, Brčanska Malta, južna magistrala, Mejdan i ponovo do Siporeksa.

Planirani intervali polazaka bio bi svaki 30 minuta, sa prvim polaskom u 6 sati, a posljednjim u 23 sata. Pomenutu inicijativu su neki vijećnici u drugom obliku već podnosili, al evo da objedinimo ovaj dio što se tiče kružnih linija. Hvala.

ANA PEJIĆ

U redu. Sljedeće vijećničke inicijative. Vijećnik Elvir Fejzić. Izvolite. (ELVIR FEJZIĆ – Prilažem). U redu. Vijećničke inicijative. Vijećnik Dejan Kovačević. Izvolite.

DEJAN KOVAČEVIĆ

Hvala predsjedavajuća. Evo prema Uredu gradonačelnika Grada Tuzla, Službi za prostorno uređenje i zaštitu okoline. Upućujem vijećničku inicijativu za dodjelu zemljišta za izgradnju Napretkovog doma u Tuzli. Tuzlansko - Hrvatsko kulturno društvo Napredak je već desetljećima predstavlja jedan od najvažnijih kulturnih i društvenih institucija u našem gradu. Kroz svoj kontinuirani rad HKD Napredak je dao značajan doprinos kulturnom životu grada, očuvanju kulturne baštine, promicanju, obrazovanja umjetnosti, dijaloga, te jačanju multikulturalnog i otvorenog identiteta grada Tuzle. Ideja izgradnje Napretkovog doma u Tuzli nije isključivo projekat HKD Napredak, već inicijative za koje stoji širi krug hrvatskih udruga i institucija koje djeluju u Tuzli, kako kulturnih, braniteljskih, političkih i općenito društvenih organizacija i udruga, te kako i katoličke crkve. Riječ je o zajedničkoj viziji stvaranja prostora koji bi bio trajno otvoren građanima grada Tuzle, bez obzira na nacionalnu vjersku ili bilo koju drugu pripadnost. Izgradnju Napretkovog doma, grad Tuzla bi dobio suvremen kulturno-društveni centar koji bi služio kao mjesto održavanja kulturnih događaja, izložbi, koncerata, tribina, edukativnih programa susreta mladih i drugih društveno korisnih aktivnosti. Takav prostor dodatno bi obogatio kulturnu ponudu grada, doprinio razvoju civilnog društva, te učvrstio Tuzlu kao grad dijaloga, tolerancije i kulture. S toga je evidentno da postoji zajednički interes grada Tuzle i Hrvatskog kulturnog društva Napredak da se ovaj projekat realizira na obostrano zadovoljstvo, u skladu sa važećim propisima i realnim mogućnostima. S toga vas molim u ime koordinacije hrvatskih i katoličkih udruga koje egzistiraju na području grada Tuzle je da u okviru nadležnosti Gradske uprave razmotrite mogućnosti dodjele odgovarajućeg zemljišta ili nekog drugog modela koji bi omogućio realizaciju ovog značajnog projekta, te vjerujem da ćemo u duhu dosadašnje dobre suradnje zajednički doći do rješenja koje bi bili na ponos gradu Tuzli i svim njegovim građanima.

Druga inicijativa je upućena također prema gradonačelniku Grada Tuzle, Službi za komunalne poslove, izgradnju i poslove mjesnih zajednica Grada Tuzla i nadležnim institucijama. Inicijativa je za sanaciju i stavljanje u funkciju puta Poljana-Bistarac. Putni pravac Poljana-Bistarac ima višestruki značaj kako za lokalno stanovništvo, tako i za gospodarske subjekte, poljoprivredne proizvođače, sve građane koji svakodnevno gravitiraju

između grada Tuzla i grada Lukavca. Njegova funkcionalnost bi značajno rasteretila postojeće frekventne prometnice, smanjila gužve, skratila vrijeme putovanja, te povećala sigurnost svih učesnika u prometu. Grad Lukavac je u 2025. godini, završio ugovorenu izgradnju druge završne faze mosta preko rijeke Jale na putu Bistarac - Kiseljak, dok je sanacija asfaltiranje pristupnih puteva od magistralnog puta M4 dionica Tuzla-Lukavac, tj. od Lucijane do mosta i od blizine mosta do MZ Bokavići i stavljanje istih u upotrebu planirano je u 2026. godini. Značaj izgradnje cestovnog mosta preko rijeke Jale na putu Bistarac - Kiseljak kao povezivanje istog prometnicama sa gradom Tuzla i gradom Lukavac prepoznala je Vlada Federacije Bosne i Hercegovine koja je kroz programe kapitalnih transfera u prethodnim godinama za izgradnju mosta podržala Grad Lukavac sa oko 600.000 Konvertibilnih maraka. Puštanje u promet ovog putnog pravca ima poseban značaj kako za građane Mjesne zajednice Kiseljak kao alternativni put od Tuzle prema Lukavcu i obratno, tako i za stanovnike Mjesne zajednice Bistarac, MZ Bokavići Grada Lukavac, jer bi i postakao i daljniji nastavak razvoja turizma na području jezera Modrac, razvoja malih obrta i gospodarstva na ovom području.

Treća inicijativa je za hitno uklanjanje i podsijecanje granja visokog raslinja i drveća u naselju Stupine od B3 do B7. Hvala.

ANA PEJIĆ

U redu. Vijećničke inicijative. Vijećnik Admir Hasanbašić. Izvolite. (ADMIR HASANBAŠIĆ – Prilažem). U redu. Vijećničke inicijative. Vijećnik Anel Ibeljić. Izvolite. (ANEL IBELJIĆ – Prilažem). Inicijativa zajednička, vijećnik Ibeljić Anel i Mujezinović Mensur. (ANEL IBELJIĆ – Prilažemo). I to. U redu. Vijećničke inicijative. Vijećnik Mirnes Ajanović. Izvolite.

MIRNES AJANOVIĆ

Hvala. Ovo za pitanja, malo čas. Uz svaku pitanje ponovljeno da ide i ovo što sam govorio na današnjem Gradskom vijeću. Kao prvi dio, pa onda nakon toga pitanja. Hvala.

Inicijativa gradonačelniku za realizaciju drugog izdanja i izdanja na engleskom jeziku knjige „Ubistvo svitanja iz 1996. godine“. To je, evo, sada već imamo tridesetogodišnjicu izlaska knjige 30. godina „Ubistvo svitanja“, civilne žrtve rata. Smatram da, obzirom, evo, ide maj, 25. Trideset godina od i ove knjige, obilježavanje ratnog, brutalnog zločina u Tuzli, da bi trebalo uraditi drugo ili reprizno ili doručeno izdanje u saradnji s autorom, magistrom Fatmirom Alispahićem. Trebalo bi to napraviti na engleskom i u PDF formatu da se zvanično objavi na stranici. To bi moglo biti i službeno reprezentativno izdanje Grada Tuzle prilikom protokolarnih posjeta svim delegacijama, strancima, uz sve ono što idemo monografija i ostalo o Tuzli, da se, da i ova knjiga „Ubistvo svitanja“ kao trajno obilježavanje i poštovanje žrtava, ali i čin državničke zrelosti grada, da čuva svoju istinu na dostojanstven i institucionalan način i da pamti i opominje.

Druga je, pa meni zanimljiva, vjerujem i ostalim, jestel ste se našli u situaciji, pogotovo kada je malo dijete s vama, da svaki put morate ponijeti flašicu vode, kad hoćete malo kroz Tuzlu? Ja moram, ako zaboravim, to je problem, valja negdje u radnji tražit i slično. Malo, malo pa ja žedna. Nisam ja, mogu ja, al dijete ne pita gdje, kako je neg žedni. Daj mi, recite, gdje vi možete, osim ona česma što ima u Tuzli, na Slatini i Stupinama, bilo gdje u Tuzli imat neku česmu, onu modernu gdje udarite na onu pipu, pa ima ograničen termin, odnosno vrijeme ili možda jednu flašicu naspete, taman toliko vode. Gdje to ima u Tuzli? Nema nigdje. Žedni, u po dana, ljeto, ono 40 stepeni, tumarate Tuzlom, hodajte po radnjama. Ima fontana, ali svijet misli da se ona voda iz fontane može piti. Neki se i napiju. A ne može, tehnička voda, vrti se ista. Nemamo tih malih, simboličnih česmi, eto koje imate Vodovod gradski imate, koristimo.

Ne troše se vode, nema da cure. To su sad postale moderne česme u većini gradova. I evo, to je i ta inicijativa za pokretanje kapitalnog projekta, etape izgradnje javne česme na području grada Tuzle. Danas u svim tim prostorima, gdje god vidimo da se ljudi kreću, ljeti, imate tu česmu. Da se ljudi napiju, da nisu žedni. Sevap je to. Sevapa ćemo zaraditi svi ako to napravimo. A nije to ni skupo. Možemo onda staviti, kad već to pravimo, da, recimo, konstrukcijska rješenja je sve da budu prilagođena i osobama sa invaliditetom, djeci, da djeca mogu prići, da ne mora se pentrat po onoj Gradskoj česmi tam, pa padne niz one skaline tamo. Ali, recimo, to može biti da dobiju imena. Da svaka česma i to iskoristimo. Pa, recimo, ja sam stavio onako naumpalo mi, razne, evo, kod Doma zravlja, simbolično da ih vežemo za te dijelove grada. Dom zravlja, Stanimira Gildinga, Šesta Bosanska, Česma Mirka Dušeka, Narodnog pozorišta, Česma Nijaza Alispahića, Muzičke škole, Česma Asima Horozića, kod Sabornog hrama, Česma Muftije Kurta. Dakle, da simbolično vežemo događaje kroz istoriju Tuzle za tu česmu da piše na njoj. I turistički će biti interesantno da dođu da se slikaju tu obidu, ali da se napiju vode, da nisu žedni. I evo, to je jedan prijedlog, ne mora to biti odmah, ne moramo mi sad, u mjesec napraviti sve česme. Ali da se krene sa inicijativom, tamo gdje su velike frekvencije, pred Domom zdravlja, recimo, ili slično, ljudi treba da se umiju, operu ruke ili nešto malo, nema česme. Trebaju nam ove česme, nije to skupo, to je jeftino, to ljudi rade, onako, što bi se reklo, sami poklanjaju, ali to treba Grad sistematski da napravi.

I evo, to je taj prijedlog i još jedno rješenje, jednog dodatnog ogledala saobraćajnog u ulici Sulejmana Aličića u Solani i prilažem sve u prilogu je. Hvala.

ANA PEJIĆ

Zahvaljujem se. Sljedeće vijećničke inicijative. Vijećnik Mirza Malkočević. Izvolite. (MIRZA MALKOČEVIĆ – Prilažem) U redu. Vijećnik Omer Berbić. Izvolite. (OMER BERBIĆ – Priložit ću tri). U redu. Vijećnik Senad Mehmedinović. Izvolite. Omere, mikforon samo. Izvolite Senade.

SENAD MEHMEDINOVIĆ – vijećnik Nezavisne liste „Sloboda“

Samo ću pročitati. Zajednička inicijativa kolege Anela i mene. Inicijativa prema Službi za komunalne poslove, izgradnju i poslove mjesnih zajednica, za izgradnju montažne garaže na Slatini, kod Doma zdravlja ili na parking prostoru iza zgrade Albina Herljevića 14.

Sljedeća inicijativa simpatičnog naziva „Zajedno za Kiseljak“. Kolege Nedžad Jusić, Admir Hasanbašić, Eldin Hasanbašić i ja, prema Službi za komunalne poslove, izgradnju i poslove mjesnih zajednica za izgradnju dječijeg igrališta u naselju Ševar, Mjesna zajednica Kiseljak.

I treća je Saobraćaju i komunikaciji za uvođenje povlaštenih parking karti za stanovnike naselja Slatina. Hvala.

ANA PEJIĆ

U redu. Vijećnik Jasmin Gavranović. Izvolite.

JASMIN GAVRANOVIĆ – vijećnik SDP – Socijaldemokratske partije Bosne i Hercegovine

Zahvaljujem predsjedavajuća. Želim da pozdravim sve prisutne. Inicijativu sam dostavio mailom, a kojom tražim da nadležna gradska služba u saradnji sa javnim preduzećima i ustanovama kojima je povjereno na upravljanje sportskim terenima podzume neophodne

korake za sanaciju postojećih igrališta na području grada Tuzla. Sport je od javnog interesa za grad Tuzlu. Veliki broj djece i mladih rekreativaca sportskih klubova svakodnevno koristi sportske terene koji su u vlasništvu grada. Međutim, evidentno je da dio terena nije adekvatno održavan, a primjer je i košarkaško igralište koje je Jusuf Nurkić poklonio gradu Tuzla, što dovodi da smanjenja sigurnosti korisnika oteženog rada sportskih klubova, smanjenje uključenosti djece u sport, brže propadanje infrastrukture i većih troškova sanacije u budućnosti. Ulaganjem u redovno i plansko održavanje, produžava se vijek trajanja infrastrukture, smanjuju se troškovi kapitalne rekonstrukcije i direktno se ulaže u zdravlje i razvoj djece i mladih.

Smatram da je potrebno uspostaviti jasan, transparentan i dugoročan sistem održavanja sportskih terena, uključujući redovne godišnje preglede, budžetsko planiranje javno dostupne informacije o stanju sportske infrastrukture.

Ništa, ovim bi samo poslali jasnu poruku da je ulaganje u sport ujedno i ulaganje u budućnost. Hvala.

ANA PEJIĆ

Zahvaljujem se. Sljedeće inicijative su moje. Prilažem. I da li još neko od vijećnika ima vijećničke inicijative? Nema.

Prelazimo na sljedeću tačku dnevnog reda:

Razmatranje i donošenje Rješenja o izmjeni Rješenja o imenovanju Konkursne komisije za provođenje postupka imenovanja člana Gradske izborne komisije Tuzla

Predlagač: Kolegij Gradskog vijeća.

Obrađivač: Stručna služba Gradskog vijeća.

Materijal su razmatrali: Komisija za statutarna pitanja i propise, Komisija za izbor i imenovanja i klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji komisija?

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika i stavljam na izjašnjavanje prijedlog Rješe...Jel ima neko? (Nema).

Stavljam na izjašnjavanje prijedlog Rješenja o izmjeni Rješenja o imenovanju Konkursne komisije za provođenje postupka imenovanja člana Gradske izborne komisije Tuzla i molim vas da se izjasnite.

Glasanje je okončano.

Konstatujem da je pročitano rješenje usvojeno sa,

21 glasom za, nije bilo protiv i 6 suzdržanih.

Prelazimo na sljedeću tačku dnevnog reda:

Razmatranje i usvajanje Odluke o pristupanju izradi Zoning plana poslovne zone „Mlake-Šićki Brod jug“

Predlagač: gradonačelnik Grada Tuzla.

Obrađivač: Služba za prostorno uređenje i zaštitu okoline i UO Zavod za urbanizam.

Materijal su razmatrali: Komisija za statutarna pitanja i propise, Komisija za ekonomske odnose, Komisija za prostorno uređenje i zaštitu okoline i klubovi vijećnika.

Da li ima potrebe za uvodnim izlaganjem? (Može). Može.

Evo zamolit ću samo predstavnike Službe za prostorno uređenje, evo da nam da ukratko obrazloženje. Gospodin Fahrudin Delić. Izvolite.

**FAHRUDIN DELIĆ – pomoćnik gradonačelnika za
Službu za prostorno uređenje i zaštitu okoline**

Sve vas srdačno pozdravljam. Ja sam pripremio ovdje odluku koja ima 74 stranice, pa ću ja njih na brzinu pročitati. Šalim se. Gledajte, bivši Regulacioni plan Mlake je istekao, odnosno Zoning plan. Pošto imamo indicije da bi se mogli pojaviti neki investitori kojima treba veća površina građevinskog zemljišta, kroz ovaj plan smo se odlučili da povežemo dvije prostorne cjeline Šićki Brod, Jug i Mlake, a dobra stvar je što je kružni tok koji snabdijeva Mlake saobraćajem, isključen je iz prve faze brze ceste Šićki Brod-Đurđevik i smatra se posebnim objektom za koje je izdate urbanistička saglasnost od strane Ministarstva prostornog uređenja i uskoro bi trebo ići u realizaciju. Tako da bismo otvorili ovaj jedan veliki prostor koji je površine 17,23 hektara. To je otprilike ono, ako bilo kakvo pitanju imate...

ANA PEJIĆ

U redu. U redu. Zahvaljujem se.

Evo otvaram raspravu klubova vijećnika.

Vijećnik Mirnes...Vijećnik Zlatan Mehmedović, pa Mirnes Ajanović. Izvinjavam se.

**ZLATAN MEHMEDOVIĆ – vijećnik SDP – Socijaldemokratske partije
Bosne i Hercegovine**

Poštovana predsjedavajuća, kolegice i kolege vijećnici. Evo ja ću, neću ni ja dugo, al evo danas usvajamo ovu odluku koja je važan dokument. Radi se Odluci o pristupanju izradi Zoning plana Mlake. Ovo predstavlja jedno od strateški najvažnijih razvojnih odluka koje možemo donijeti u ovom mandatu.

Dakle, ovo nije samo planski dokument, nego i platforma za nova radna mjesta, signal investitorima da Tuzla ima spremne prostore, lokacije i poruka da Grad planira. I danas zaista, kad se gradovi takmiče za kapital, najvažnije pitanje investitora je u stvari da li je prostor spreman, a ovim planom mi to upravo radimo, dakle pripremamo prostor. Kao što je rekao gospodin Fahrudin Delić, obuvata prostor od oko 17,23 hektara i nalazi se u izuzetno snažnom logističkom okruženju.

Tu su magistralni pravci Sarajevo-Orašje i Tuzla-Doboj, petlja Šićki Brod, željeznička pruga Brčko-Tuzla-Doboj, a i neposredna je blizina postojećih privrednih zona. Ovaku kombinaciju zaista i drumskog i željezničkog saobraćaja nema mnogo lokacija u Bosni i Hercegovini. U obrazloženju takođe je jasno navedeno da prethodni Zoning plan nije realizovan, primarno zbog problema sa saobraćajnim prilazom, a sada sa planiranom izgradnjom kružnog toka i boljim infrastrukturnim rješenjima, stiču se realni uslovi i za aktivaciju prostora.

Bez ulaska evo u pojedinačne projekte ili konkretne investitore, važno je naglasiti jednu širu činjenicu da danas evropsko tržište prolazi kroz fazu reindustrializacije, relokacije i proizvodnje bliže EU tržištu, a Zapadni Balkan postaje atraktivan prostor za proizvodne i tehnološke pogone. Tuzla sa svojom industrijskom tradicijom, stručnim kadrom i tehničkim fakultetima ima kapacitet da bude dio tog talasa. Podržavamo, dakle, mi ispred Kluba i SDP-

a i pozivamo sve jel da podrže ovu odluku, jer svakako ima razvojnu logiku, ima infrastrukturno opravdanje, fiskalni potencijal, investicionu privlačnost i, naravno, dugoročnu viziju. Hvala.

ANA PEJIĆ

Zahvaljujem se. Sljedeća diskusija. Vijećnik Mirnes Ajanović. Izvolite. Mikrofon samo Zlatane molim vas da isključite. Izvolite.

MIRNES AJANOVIĆ

Replika pomoćniku gradonačelnika. Kad kaže 74 stranice ili 76, kako god, tu je to kao na brzinu da pročita. Nedavno ja u sudu, pa mi donijeli podnesak, obično advokati kad donesu, ne čitaju. Šta će čitat? Kaže onaj meni suprotni, de ti to meni pročitaj. Pa jel to ti mene zafrkavaš, ima ono, polijepo. Ne kaže, pravila su javne prezentacije. Jel tako? Jeste. Srećom pa sam imao taj dan slobodan. Držao sam ja njega nekoliko sati. Ja znate na tenane, polako, riječ po riječ. Vidim i sudija skontala, pa i ona pustila, ko veli odmori. Tako da ovo njegove na brzinu će pročitati. Ne pročita.

A ja sam pročitao. Polako. Zlatan je to prezentirao sve, pa ne bih ja ponavljao. Ovo je bitno da će biti dole kružni tok, ubrzat će se saobraćaj i biće sigurniji prilikom izlaska iz poslovne zone Poljana.

Ali ono što je bitno, pa što sam rekao pomoćniku gradonačelnika, da kaže na Komisiji za statutarna pitanja i propise, kaže on meni reci ti, pa evo ja ću. Ovo je udio Tuzle Grada Tuzle prostornim planom i ovakvim Zoning planom. Zoning planovi sve smo govorili, efikasnije, brži, ne moramo čekati, radi sve ono što treba za prostorni. Za prvu fazu brze ceste Tuzle prema Sarajevu. Dakle, mi evo krećemo s ovim faktički u realizaciju te brze ceste, što je još jedan veliki značaj ovog Zoning plana, jer time iniciramo i pokrećemo i ostale da odrađuju svoj dio posla. Toliko, podrška.

ANA PEJIĆ

Zahvaljujem se. Sljedeća diskusija. Vijećnik Emir Šahović. Izvolite.

EMIR ŠAHOVIĆ

Hvala predsjedavajuća. Pozdrav vama, pozdrav dopresjedavajućim, sekretaru Gradskog vijeća, svim prisutnim kolegicama i kolegama vijećnicima.

Pa, ja prvo moram pohvaliti ovaj dokument i naglasiti da Pokret demokratske akcije Klub vjećnika će podržati ovaj Zoning plan.

Ono što je, kao što je kolega Zlatan već rekao, meni kao uposleniku Željeznica Federacije je izuzetno bitno da pruga prolazi kroz ovaj dio i onedavno imamo suhu luku, Šićki Brod koja je stavljena je li u funkciju i mislim da će to dosta olakšati investitorima. Ono što bi ja preporučio stručnim službama da ne bi bilo loše u ovom svemu, znači izgradnji kružnog toka i svega da razmisle malo o postavljanju autobusnog stajališta tu, jer imamo dosta ljudi koji rade u ovoj, kako se zove, industrijskoj ovoj zoni i naravno sa dolaskom novih investitora doći će i do još otvaranja još i radnih mjesta i još veća potreba će biti za tim autobusnim stajalištem, jer imamo jedno tek na petlji ovamo prema Termoelektrani i gore na Husinu, tako da to će dosta olakšati ovim, kako se zove, uposlenicima. Eto, toliko od mene. Hvala.

ANA PEJIĆ

U redu. Sljedeća diskusija. Vijećnik Mensur Alić. Izvolite.

**MENSUR ALIĆ – zamjenik predsjedavajućeg
Gradskog vijeća Tuzla,
vijećnik Tuzlanske alternative**

Zahvaljujem predsjedavajuća. Evo, prije godnu dana mislim da smo mi ovaj razgovarali smo o ovim zonama i o privrednim, ovaj, privredi. Upravo tad smo razgovarali o ovome baš, o ovoj odlici danas koja je došla na red. I tad smo donijeli procjenu da je ovdje ogromna količina zemljišta. Ja imam svakodnevno susrete sa privrednicima, iz vana pogotovo koji dolaze u Bosnu i Hercegovinu i uglavnom su to potražnja za zemljište negdje 10 do 15 duluma zemljišta, ili hektar jedan. A ovdje imamo toliko toga da možemo napraviti jednu od najvećih industrijskih zona u Federaciji Bosne i Hercegovine.

I zato moja zahvalnost službi što je ovo došlo na red, da donesemo jednu važnu odluku, jer uvijek kad je privreda u pitanju ja sam tu, jer znam na koji način i kako mi privrednici, mi prvo kupimo jedan dio zemljišta, a onda kroz godine i godine, kako firme raste, nama je potrebno još više širenje, jer nastaju mala preduzeća, pogotovo proizvodna, a kasnije za 10-20 godina stvore se uslovi da im je daleko, daleko potrebno više zemljišta nego što prvi put kupi. Zato pohvala službi za ovu današnju odluku i naravno mi ćemo dat Tuzlanska alternativa podršku za ovakve projekte. Zahvaljujem.

ANA PEJIĆ

U redu. Sljedeća diskusija. Vijećnik Omer Berbić. Izvolite.

OMER BERBIĆ – vijećnik Naše stranke

Hvala ljepo. Evo kažu da konkurencija inače tjera sve ostale u okolini da rade bolje i brže i mislim da u zadnjih 10 godina imamo ozbiljnu konkurenciju u vidu Živinica, koje su zaista izgradile, sad kad prođete tamo, jedno 15-20 hala. Gdje god prođete, vide se hale. A u Tuzli smo imali jednu poslovnu zonu u zadnjih 30 godina koja je opet upitnog kapaciteta za grad ovalike veličine. S tim, što hoću da kažem, da ja, i realno je sad gledat Tuzlu, Živinice, recimo Lukavac, kao jednu prostornu cijelu, kao jedan grad kompletan, jer to se i spojilo i izgradnjom i cestama i svim i tako da, sasvim je normalno to gledat evo kao jednu prostornu cijelinu. Al mislim da je agilnost Gradske uprave Živinica nas na neki način natjerala da ulazimo sve više u izgradnju poslovnih zona. I to je, donekle, nova Gradska uprava i prihvatila i stavila kao prioritet. Kažem, donekle, zato što treba da prođe dosta vremena da se promijeni način razmišljanja unutar same Gradske uprave, kod službenika i tako dalje. Da ljudi shvate da nam je privreda okosnica razvoja, a ne izgradnja grada ili izgradnja trgova i tako dalje. To je sve lijepo, naravno, turistički potencijali i tako. Ali, ako nema proizvodnje, nema ni grada.

Zato je ovo bitno i zato sam tražio jedno uvodno izlaganje gospodina Delića. Zanimalo me dokle je došao taj kružni tok sa izgradnjom? I kad će on biti da ne bude, evo mi ćemo usvojiti ovo, a nemamo kružnog toka, nemamo infrastrukture. Kad se završi taj kružni tok, ovo se sve ovdje otvara. Znači više od 20 hektara, ako sam dobro ovdje vidio. I jako je dobro da se ide u tom pravcu. S tim da bi, ja volio da nam evo, ili gospodin Delić, ili neka druga služba, koja ima probleme sa kadrovskim rješenjima, dostavi jednu analizu gdje bi se napisalo koliko je novozaposlenih potrebno da se ubrza izdavanje građevinskih dozvola. Zašto ovo govorim? Trenutno jako dugo se čeka za građevinske dozvole, za hale, za poslovne prostorije i tako dalje.

Ja razumijem da je to radi nedostatka kadrovskog kapaciteta, vjerovatno više nego bilo šta drugo. Vjerovatno su još uvijek izgrade ovdje prioritet, jer i zgrade plaćaju građevinsku rentu koja je nerijetko u milionima maraka. Ali bez proizvodnje nemamo ni grada.

Tako da volio bi da nam se, evo u iduća dva mjeseca, dostavi sveobuhvatna analiza. Neću tražiti zaključak. Gospodin Delić je tu. Mislim da bi ovaj, ukoliko on misli da je to u interesu službe, ja mislim da jeste, da nam se dostavi, da nam se kaže koliko novozaposlenih treba da se primi u ovu službu, da se, ako ne, u polovi, onda barem, dobro ubrza izdavanje građevinskih dozvola, jer ako već otvorimo ovdje 20 hektara, otvaramo i jednu, pored, industrijsku zonu, vjerovatno će se, kada se usvoji i prostorni plan Tuzlanskog kantona, mi smo tražili da se tamo i uz Živinice, uz prugu, napravi poslovna zona. Tu ukoliko dođe do jakog interesa, velikog interesa investitora, u što ja ne sumnjam, mislim da će ova služba doći do jednog opterećenja, pa ako treba 5 ljudi da se zaposli, 10 ljudi da se zaposli, a kako bi se otvorilo 5 ili 10 fabrika godišnje, dajte da to uradimo. Mislim da je to prioritet ovog grada.

I evo ja bih molio gospodina Fahrudina da nam dostavi jednu analizu, ukoliko se otvori ova poslovna zona, jedna pored ima privatna poslovna zona, pa i ona tamo koja će biti ukoliko se riješi pitanje na nivou kantona, da mi strateški znamo da ne bude sutra evo zapošljavaju 10 ljudi zato što hoće da ih uhljebe. Ne. Nego se zapošljava 10 ljudi zato što hoćemo da otvorimo novih 50 fabrika. Eto, toliko od mene. Fala ljepo.

ANA PEJIĆ

Zahvaljujem se. Da li se još neko javlja ispred klubova vijećnika za diskusiju?

Zaključujem diskusiju klubova vijećnika.

Otvaram diskusiju vijećnika.

Vijećnik Samir Mulaosmanović. Izvolite.

SAMIR MULAOSMANOVIĆ – vijećnik SDP –Socijaldemokratske partije Bosne i Hercegovine

Hvala predsjedavajuća. Ovom prilikom pozdravljam sve prisutne. Već smo jednom o ovome ovaj pričali. Ja ću samo kratko ovaj da još jednom pohvalim službu. Gospodina Delića za način razmišljanja. Ja kao aktivni korisnik ove poslovne zone već par godina, znači, već se taj dio je već napučen, znači otvaraju nam se nove mogućnosti i u jednu ruku podržavam i ovo što je gospodin Berbić isto rekao, znači da uradimo sve što je u cilju ka bržem ostvarivanju ovog projekta.

Stvarno još jednom iskrene čestitke i zahvale kompletnoj službi i njegovom rukovodstvu. Hvala puno.

ANA PEJIĆ

Zahvaljujem se. Da li se još neko javlja od vijećnika za diskusiju?

Zaključujem diskusiju vijećnika i stavljam na izjašnjavaње prijedlog Odluke o pristupanju izradi Zoning plana poslovne zone „Mlake-Šićki Brod jug“ i molim vas da se izjasnite.

Glasanje je okončano.

Konstatujem da je pročitana odluka usvojena sa,

22 glasa za, nije bilo protiv i 5 suzdržanih.

Prelazimo na sljedeću tačku dnevnog reda:

Razmatranje i usvajanje Odluke o načinu dodjeljivanja javnih priznanja u 2026. godini

Predlagač: Komisija za odlikovanja i priznanja.

Obrađivač: Stručna služba Gradskog vijeća.

Materijal su razmatrali: Komisija za statutarna pitanja i propise i klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji komisija? Nema.

Otvaram raspravu klubova vijećnika.

Vijećnica Svjetlana Kakeš, a neka se pripremi Omer Berbić. Izvolite.

SVJETLANA KAKEŠ

Hvala predsjedavajuća. Što se tiče ove Odluke o načinu dodjeljivanja javnih priznanja u 2026. godini, evo moram konstatovati da je ovo dokument koji se na istovjetan način i u gotovo identičnom sadržaju razmatra i usvaja na Gradskom vijeću već evo skoro 20 godina, odnosno u skladu je sa odredbama Odluke o javnim priznanjima Tuzle donesenom 2007. godine, koja je pretrpjela neke manje izmjene 2008., 2009. i 2018.

Klub SDP-a će glasati za donošenje ove Odluke o načinu dodjeljivanja javnih priznanja u 26-oj godini, kako bi se blagovremeno započeo postupak dodjele javnih priznanja za 26-ugodinu u skladu sa važećom odlukom.

Međutim, kao Klub podsjećamo da je osnovna Odluka ova iz 2007. o javnim priznanjima Tuzle, znači donesena 2007. da je ipak prošlo, kao što sam rekla, skoro 20 godina od donošenja ove odluke. U međuvremenu je naravno došlo do značajnijih izmjena u gotovo svim segmentima društvenog, ekonomskog, političkog života u društvu i u svijetu. U međuvremenu su uočeni određeni nedostaci i prostor za unapređenje odluke i kako bi sam postupak dodjele javnih priznanja bio transparentniji, sveobuhvatniji, jasniji i samim time bliži građanima i pravnim subjektima koji namjeravaju učestvovati u ovom procesu, smatramo da su to osnovni razlozi zbog kojih Klub SDP-a smatra da je došlo vrijeme za donošenje nove Odluke o dodjeli javnih priznanja Tuzle.

Osim toga, donošenjem nove, transparentnije, sveobuhvatnije i savremenom dobu primjerenije odluke, podigli bismo na veći nivo i sam ugled priznanja koja se dodjeljuju, a samim time bi Grad Tuzla i Gradsko vijeće, kao konačni donosilac Odluka o dodjeli javnih priznanja bili bliži stavovima i očekivanjima građana i cjelokupne javnosti.

Bila sam prisutna na jednoj sjednici Kolegija Gradskog vijeća kad se također na sličan način i iz gotovo istovjetnih razloga razgovaralo o potrebi donošenja nove Odluke o dodjeli javnih priznanja i stekla sam utisak da i većina članova Kolegija podržava ovaj prijedlog. Ne bi sad ulazila u detalje niti u konkretna rješenja šta bi trebala da sadržava ta nova odluka. Neki od tih prijedloga su iznošeni i na toj sjednici, jer na kraju krajeva to i nije tačka dnevnog reda i zahtjeva naravno posebnu posvećenost. Tako da evo ja ovom prilikom u ime Kluba SDP-a predlažim sljedeće zaključke.

Prvo. Gradsko vijeće konstatuje da je tekst Odluke o načinu dodjeljivanja javnih priznanja u 2026. godini, usaglašen sa odredbama Zakona o principima lokalne samouprave, Statuta Grada Tuzle i Odlukom o javnim priznanjima Tuzle, čime su ispunjeni pravni razlozi i pravni osnovi za njeno donošenje.

Drugo. Gradsko vijeće traži od Stručne službe Gradskog vijeća da, imajući u vidu dosadašnja iskustva u primjeni postojeće Odluke o dodjeli javnih priznanja Tuzle, kao i

pozitivne primjere iskustva drugih jedinica lokalne samouprave, da za jednu od narednih sjednica kolegija Gradskog vijeća pripremi nacrt nove Odluke o dodjeli javnih priznanja Tuzle.

Nakon što Kolegij Gradskog vijeća utvrdi konačan tekst, nove Odluke o dodjeli javnih priznanja Tuzle, ista će biti upućena na razmatranje i usvajanje na jednoj od narednih sjednica Gradskog vijeća, a najkasnije na junskoj sjednici Gradskog vijeća. Hvala.

ANA PEJIĆ

U redu. Sljedeća diskusija. Vijećnik Omer Berbić. Izvolite.

OMER BERBIĆ

Bukvalno sam isto želio reći što je Svjetlana rekla. Tako da ja ću povući svoju ovu diskusiju.

Ja bih samo volio da u zaključak uđe da se u idućih 20 dana, ne znam kako ste tačno sad formulisali, kako ste tačno formulisali Svjetlana, ali da se u idućih 20 dana napravi ovaj Kolegij, gdje ćemo ove stvari definisati. Znači, jedan poseban tematski kolegij, ako je to ok, da što prije idemo u realizaciju, zato što smo već dva ili tri puta razgovarali na ovu temu, a ništa se konkretno nismo ni dogovorili, niti smo išli konkretno u akciju, tako da, evo dok je, što se kaže, željezo vruće, ono se i kuje. Tako da, eto u idućih dvadesetak dana to završimo. Hvala.

ANA PEJIĆ

U redu. Da li se još neko javlja za diskusiju ispred klubova vijećnika?

Zaključujem diskusiju klubova vijećnika.

Otvaram diskusiju vijećnika.

Zaključujem diskusiju vijećnika i stavljam na izjašnjavanje prijedlog Odluke o načinu dodjeljivanja javnih priznanja u 2026. godini i molim vas da se izjasnite.

Glasanje je okončano.

Konstatujem da je pročitana odluka usvojena sa,
25 glasova za, nije protiv i 1 suzdržan.

I zamolit ću sekretara da pročita zaključke proistekle iz diskusija.

Da li ste za da glasamo u paketu o zaključcima? (Da).

U redu. Izvolite Slađana.

SLAĐANA KRAJINA – sekretar Gradskog vijeća Tuzla

Možemo li samo iskombinovati ova dva zaključka ako ste saglasni?

SVJETLANA KAKEŠ

Ja sam baš ovaj mislila predložiti, a već je predsjedavajuća krenula dalje. Ako se slaže Omer, u prvi dio mog zaključka gdje smo rekli da se Kolegij pripremi da stavimo u roku od 20 dana.

SLADANA KRAJINA – sekretar Gradskog vijeća Tuzla

Prijedlog zaključaka:

- Gradsko vijeće konstatuje da je tekst Odluke o načinu dodjeljivanja javnih priznanja u 2026. godini, usaglašen sa odredbama Zakona o principima lokalne samouprave u Federaciji Bosne i Hercegovine, Statuta Grada Tuzle i Odluke o javnim priznanjima Tuzle, čime su ispunjeni pravni osnov i razlozi za njeno donošenje.

- Gradsko vijeće traži od Stručne službe Gradskog vijeća da, imajući u vidu dosadašnja iskustva u primjeni postojeće Odluke o javnim priznanjima Tuzle („Službeni glasnik Općine Tuzle“, broj 10/07, 5/08, 6/09 i „Službeni glasnik Grada Tuzle“, broj 12/18) kao i pozitivne primjere i iskustva drugih jedinica lokalne samouprave, za tematsku sjednicu Kolegija Gradskog vijeća, koja će se održati u narednih dvadeset dana, pripremi nacrt nove Odluke o dodjeli javnih priznanja Tuzle. Nakon što Kolegij Gradskog vijeća utvrdi konačan tekst nove Odluke o dodjeli javnih priznanja Tuzle, ista će biti upućena na razmatranje i usvajanje...Pa hoćemol sad ovo od, dalje ostaviti ili čim se utvrdi? Upućeno na razmatranje i usvajanje...Prijedlog vaš je bio na jednoj od narednih sjednica, a najkasnije na junskoj sjednici. Da ostane? Dobro. Znači, konačan teksta ove Odluke o dodjeli javnih priznanja ista će biti upućena na razmatranje i usvajanje na jednoj od narednih sjednica Gradskog vijeća, a najkasnije na junskoj sjednici Gradskog vijeća.

ANA PEJIĆ

Molim vas da se izjasnite o pročitanim zaključcima.

Glasanje je okončano.

Konstatujem da su pročitani zaključci usvojeni sa,
25 glasova za, nije bilo protiv i 1 suzdržan.

Prelazimo na sljedeću tačku dnevnog reda:

Razmatranje i usvajanje Odluke o komunalnim taksama

Predlagač: gradonačelnik Grada Tuzla.

Obrađivač: Radna grupa za pripremu prijedloga Odluke o komunalnim taksama Grada Tuzle, Služba za komunalne poslove, izgradnju i poslove mjesnih zajednica, Služba za ekonomski razvoj, poduzetništvo i poljoprivredu, Služba za budžet i finansije.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za komunalne poslove i pitanja mjesnih zajednica i klubovi vijećnika.

Da li ima potrebe za uvodnim izlaganjem? Nema.

Da li ima potrebe da se pročitaju izvještaji komisija?

Izvolite. Vijećnik Mirnes Ajanović. Izvolite.

MIRNES AJANOVIĆ

Da, zadužen sam od strane Komisije za statutarna pitanja i propise u vezi ove tačke da obrađivač pripremi, da navedem, amandman u dijelu gdje se definišu naknade za kladionice, aparate ili slično, da stoji jedna odredba koja bi definisala okolnost da ne može taksa biti veća od onoga što je njihov prihod, tako da bi se zaštitili od eventualnog problema pred Ustavnim sudom ukoliko se pokrene postupak, jer bi to mogao biti osnov za obaranje odluke. Ja ne znam

da li su pripremili, pa bi bilo dobro da se izjasne, da znamo u vezi toga šta je urađeno, jer je to bio stav Komisije. Nismo pravili pisani stav, pošto je u petak bila Komisija, ali ovo bi trebalo da bude sadržano. Vodili smo raspravu dužu, gotovo bar pola sata po ovoj tački. Trebalo bi da bude sadržano i još jedno, pored ovog dakle određivanja kolike su takse, da taksa ne može biti veća od prihoda, da će se vršiti provjera i eventualni povrat novčanih sredstava. Tako da bih evo tražio da se izjasni obrađivač šta je u odnosu na ovaj stav Komisije urađeno, jer nisam vidio da li imamo ikakve izmjene. Hvala.

ANA PEJIĆ

Evo, hoćete odmah da se obrađivač izjasni vezano za ovaj prijedlog ili? (vijećnik Mirnes Ajanović govori bez uključenog mikrofona op.a.). Može. Može. Izvolite, gospodin Almir Šuta. Izvolite.

ALMIR ŠUTA – sekretar organa državne službe

Poštovana predsjedavajuća, poštovani zamjenici predsjedavajuće, poštovani sekretaru Gradskog vijeća, uvažene vijećnice i vijećnici, poštovane kolege, prijatelji i gosti, predstavnici medija, sve vas srdačno pozdravljam.

Kada je riječ o ovoj tački dnevnog reda vezano za zaključak Statutarne komisije koja je zasjedala u petak prošle sedmice, predlagač, gradonačelnik Grada Tuzla je u cijelosti upoznat sa predlogom zaključka. Gradonačelnik, odnosno predlagač je stava da u ovom pogledu, pošto se mora prikupiti značajna dokumentacija, odnosno podaci od Porezne uprave vezano za promet, a ne prihode, odnosno dobit priređivača igara na sreću, predlagač ove odluke znači nije, nije saglasan da se ovakav amandman ugradi u prijedlog odluke koju danas imate na dnevnom redu. Saglasan je da se eventualno kroz zaključak Gradskog vijeća, odnosno Gradsko vijeće zaduži ili obrađivača ili radnu grupu da prikupi odgovarajuće relevantne podatke od Porezne uprave Tuzla vezano za promet, nikako za dobit, odnosno za prihode priređivača igara na sreću, koji mogu poslužiti kao faktičko odnosno pravni osnov za eventualnu izmjenu i dopunu pomenute odluke. Evo. Toliko.

ANA PEJIĆ

U redu. Izvolite. Vijećnik Mirnes Ajanović.

MIRNES AJANOVIĆ

Ja bih ipak da taj zaključak dobijemo sad u formi, da ne smišljamo kasnije, da odmah se predloži zaključak i da ga imamo, jer je vrlo bitno. (SLAĐANA KRAJINA - Nemamo zaključak Statutarne. To je bio samo Statutarne komisije). Jest, al da imamo prijedlog zaključka sad upisan, da se ne vraća ponovo. Samo dajte dakle taj prijedlog zaključka kako vi smatrate da treba, a iz kojih svrha se radi. Tako da imamo, da ne moramo ponovo u toku rasprave pričati o tome. (SLAĐANA KRAJINA - Kolegij Gradskog vijeća Tuzla traži od obrađivača, od predlagača obrađivača materijala...). (MIRZA ŠUTA – Nudili sve relevantne podatke iz Porezne uprave Tuzla vezano za faktičke i pravne mogućnosti, naplate komunalne takse od priređivača igara na sreću, imajući u vidu promet (SLAĐANA KRAJINA – Samo malo, samo malo. Od predlagača obrađivača materijala da utvrdi pravno relevantne podatke od Poreske uprave Tuzla...)). (MIRZA ŠUTA - Vezano za naplatu komunalne takse od priređivača igara na sreću, imajući u vidu podatak o prometu, a ne dobiti ili prihodu priređivača igara na sreću, a u

svrhe eventualne izmjene i dopune predmetne Odluke o komunalnim taksama Grada Tuzla). Hvala.

ANA PEJIĆ

Zahvaljujem se. Možemol Slađana dalje? Možemol dalje? Molim vas samo za malo tišine. Nastavljamo dalje.

Posjećam da je Klub vijećnika Socijaldemokratske partije - SDP BiH, blagovremeno podnio tri amandmana na prijedlog Odluke o komunalnim taksama. Amandmane Kluba vijećnika SDP-a ste dobili elektronski, kao i u materijalu podijeljenom pred sam početak sjednice.

Zamoliti ću sekretara Slađanu Krajinu da pročita podnesene amandmane Kluba vijećnika SDP-a.

SLAĐANA KRAJINA – sekretar Gradskog vijeća Tuzla

Podneseni amandmani:

„Amandman I

U članu 2. Odluke o komunalnim taksama briše se tačka a).

Amandman II

U članu 3. Odluke o komunalnim taksama brišu se tačke d) i g).

Amandman III

U Aneksu II – TARIFE KOMUNALNIH TAKSI u Odluci o komunalnim taksama mijenja se DIO E – Tarifni broj 5. (Priređivanje komercijalnih koncerata), tako da visina takse glasi:

- Zatvoreni prostor – 0,30 KM po m²

- Otvoreni prostor – 0,15 KM po m².“

ANA PEJIĆ

Zahvaljujem se.

Otvaram raspravu klubova vijećnika i dajem riječ predstavniku Kluba vijećnika SDP-a da ukoliko želi obrazloži podnesene amandmane. Izvolite.

ZLATAN MEHMEDOVIĆ

U ime Kluba vijećnika Socijaldemokratske partije mi svakako jel pozdravljamo ovu, usvajanje Odluke o komunalnim taksama. Već smo puno toga ranije govorili i kroz javnu raspravu i kroz Kolegij vijeća. Evo, ja ću ukratko da obrazložim ove amandmane, odnosno kako smo to djelovali amandmanski.

Kad je u pitanju Amandman I, dakle, brisanje člana 2. tačka a), predložili smo brisanje ove odredbe, jer ona dodatno opterećuje ugostiteljske objekte i male privredne subjekte. Dakle, u vremenu kada energenti rastu, doprinosi su visoki, radna snaga odlazi i mali poduzetnici jedva opstaju, dakle, ova nova taksa im svakako nije potrebna.

Amandman II, brisanje člana 3. tačke d) i g), u stvari, odnosi se na muziku uživo, dakle, smatramo da muzika nije dodatno komunalno opterećenje i ona je dio registrovane djelatnosti. Obzirom da se Tuzla brendira kao grad kulture, festivala, koncerata, dakle, ne možemo istovremeno promovisati kulturni život, a i fiskalno ga gušiti. Kad su u pitanju ovi uređaji za automatsku naplatu, ovo je posebno važno, smatramo da svi moderni gradovi idu ka

digitalizaciji, automatizaciji i modernizaciji usluga, dakle, a mi uvodimo dodatnu taksu na modernizaciju.

Amandman III, smanjenje takse za komercijalne koncerte, dakle, zatvoreni prostor 0.30 KM po metru kvadratnom, otvoreni prostor 0.15 KM po metru kvadratnom. Takođe, smatramo da ovo ne treba da bude nikakva populistička mjera, dakle, ovo je ekonomska računica, jer organizacija koncerta podrazumijeva i produkciju i ozvučenje i obezbjeđenje i najam prostora i poreze i PDV, dakle, ako taksu postavimo previsoko, organizatori će otići u druge gradove.

Dakle, kolegice i kolege, smatramo da budžet, ne možemo ipak puniti pritiskanje ovih malih poduzetnika, dakle, SDP ne osporava, nego pozdravlja potrebu za komunalnim taksama, ali osporava svaku odredbu koja nema direktnu vezu sa komunalnim troškom, guši kulturni život, destimuliše modernizaciju i šalje poruku nepovjerenje prema privredi.

Dakle, Tuzla mora biti grad poduzetništva, grad kulture, grad modernih usluga i grad koji razumije realni sektor. Takođe, ne smijemo donosti odluke koji će za godinu dana biti ispravljane, jer su se pokazale štetnim. Danas imamo priliku da pokažemo da Gradsko vijeće u cjelini sluša privredu, razumije kulturu i razmišlja razvojno.

Zato pozivam kolege vijećnike da podrže amandmane SDP kluba, jer ovo je pitanje smjera razvoja grada Tuzla. Hvala.

ANA PEJIĆ

Zahvaljujem se. Sljedeća diskusija. Vijećnik Mirza Malkočević.

ZLATAN MEHMEDOVIĆ

Izvinjavam se. Imam još prijedlog zaključka.

Da se prijedlog Odluke o komunalnim taksama sa svim pripadajućim aneksima prije objavljivanja u Službenom glasniku Grada Tuzla, normotehnički u cjelosti uskladi sa amandmanima na prijedlog Odluke o komunalnim taksama, koje je predložio Klub vijećnika Socijaldemokratske partije – SDP BiH u Gradskom vijeću Tuzla, koje je gradonačelnik Grada Tuzla kao predlagač prihvatio i koji su time postali sastavni dio Odluke o komunalnim taksama na području grada Tuzla. Hvala.

ANA PEJIĆ

Zahvaljujem se. Sljedeća diskusija. Vijećnik Mirza Malkočević. Izvolite.

MIRZA MALKOČEVIĆ – vijećnik Naroda i pravde (NIP)

Hvala predsjedavajuća. Prije svega da pozdravim sve prisutne. Pokušat ću biti jako kratak. Naravno, Narod i pravda da će podržati uvođenje komunalne takse, posebno vezano za priređivače igara na sreću, jer je to i bila moja inicijativa i tačka dnevnog reda prije tačno šest mjeseci. Krenuli smo u ovaj proces i evo, poslije šest mjeseci imamo komunalne takse koje će olakšati Gradu. Namičemo nova sredstva gdje možemo uložiti u mnoge infrastrukturne projekte, tako da moram naglasiti da su igre na sreću su postale ozbiljan društveni problem i rak rana našeg društva. One direktno utiču na stabilnost porodice, ekonomsko stanje građana i socijalnu sigurnost zajednice, tako da, za mene je ovo posebna tačka i u potpunosti podržavam sve komunalne takse. Hvala.

ANA PEJIĆ

U redu. Sljedeća diskusija. Vijećnik Mirnes Ajanović. Izvolite.

MIRNES AJANOVIĆ

Pa, amandmani SDP-a su u stvari korigovani moji prijedlozi i korigovanje na moje prijedloge i izjašnjenja i obrađivača materijala u smislu smanjenja taksi. Tako da je ovo vrlo korektno od strane SDP-a što je išao i korak dalje. Ja nisam, jer nisam vlast. Ali, evo, vlast je ovaj put faktički pročitala ova izjašnjenja sa javne rasprave i zato su išli dalje.

Evo recimo, samo kratko, gdje je bilo definisanje muzike. Zlatan je to dobro obrazložio. Ne možemo komercijalizovati to što je već sastavni dio rada ugostiteljskog objekta. Ali onda je obrađivač predložio kao smatra da treba uvažiti argumente vijećnika Ajanovića, da treba biti poticaj za rad muzičara i drugih umjetnika i neće bit takse za muzičare, ali će taksu plaćati vlasnik. I idi mi dođi mi, pa isto je to. Normalno je da će vlasnik uzet od onog muzičara i reć, ja sam platio taksu. Tako da, malo trebaju bit ozbiljniji obrađivači kad rade, kada već uče da budu fini, da to bude do kraja, a ne ovako ni tam, ni vam, ni gor, ni dol, ostane na isto. Onda su oni dalje obrazlagali ove moje prijedloge, sve ovo što je Zlatan prezentirao, smanjenje i koncerata i ovih aparata i svega onoga što ide kroz grad, pa su oni već složili se sa mnom, kažu, obrađivač materijala smatra prijedlog Mirnesa Ajanovića inovativnim, al teško provodivim u praksi. Evo vidite kako može u praksi, al su me natjerali da bar spuste tada, a onda još ovo dobro došlo da, evo, kolege iz SDP-a i kolegice mogu ići sa amadmanom, pa oboriti još. Imale su još ove komunalne takse koje su bile, mi smo svugdje najniži, pišu oni od ostalih gradova, nisu baš naveli koliko je tih ostalih gradova, ali s ovim amadmanima smo se već uklopili u nešto što je realno i dakle dajem podršku i amadmanima, a svakako i odluci. Toliko.

ANA PEJIĆ

U redu. Sljedeća diskusija. Vijećnik Senad Mehmedinović. Izvolite.

SENAD MEHMEDINOVIĆ

Hvala ljepo poštovana predsjedavajuća, zamjeniče, zamjenici, kolege vijećnici, predstavnici službi i mediji, sve vas srdačno pozdravljam.

Na početku, svim pripadnicima Islamske vjeroispovijesti, vijećnicima, građanima, želim iskreno čestitati početak, mogu slobodno da kažem, Mubarek mjesece Ramazana, Ramazan Šerif Mubarek Olsun.

Kada je u pitanju Odluka o komunalnim taksama, naravno da mi kao Klub vijećnika to podržavamo, i kao Klub vijećnika smo se i uključili u diskusiju. Ono što se može vidjeti iz izvještaja sa održane javne rasprave u nacrtu Odluke o komunalnim taksama, jest da su prijedlozi vijećnika 30 do 40% prihvaćeni, da li to bilo dijelimično ili u potpunosti, a ono što se može vidjeti jest da su najvećim dijelom prihvaćeni oni prijedlozi gdje je trebalo povećati kazne. Takođe, iz izvještaja se može vidjeti da imamo dva poslovna subjekta koja su se aktivno uključila i imamo jedno udruženje i tu je takođe djelimično prihvaćen prijedlog, a to ja mislim da se plati da se ona taksa sa 300 Konvertibilnih maraka spusti na 100 Konvertibilnih maraka, tako da hajde možemo da kažemo da je i jest izvještaj sa održane javne rasprave transparentan, argumentovan. Međutim, slažem se sa kolegom Zlatanom, ovaj dokument Odluka o komunalnim taksama ne treba samo da predstavlja takozvanu prihodovnu mjeru nego treba da bude i jest instrument društvene odgovornosti i mislim evo kolega Mirza je bio jedan od predlagača i zagovarao se za to da u pozadini Odluke o komunalnim taksama nije napisano a

u stvari krije se nešto što mi zovemo prevencija negativnih posljedica kockanja u lokalnoj zajednici. Dakle, donošenjem visine ovih Odluke o komunalnim taksama, mi na neki način pokušavamo da utičemo na građane da što manje idu u ove kladionice i tako dalje. Ja sam u sklopu diskusije imao par prijedloga i vidim da su neki prihvaćeni, neki nisu. Žao mi je i još uvijek smatram, bez obzira što to nije nadležnost Grada Tuzle, da bi bilo lijepo da postoji taj tzv. Fond za prevenciju kockarskog poremećaja. Naravno, znam da Lutrija izdvaja određena sredstva vezano za ove namjene, ali iako to nije nadležnost Grada Tuzle, ipak se tiče građana Tuzle i ja sam u svom izlaganju rekao da istraživanje koje je rađeno na reprezentativnom uzorku ispitanika, dakle govorimo o hiljadu ispitanika, većinom iz Sarajeva i Tuzle, da je oko 9-10% građana mladih, dakle mladih, razvilo kockarski poremećaj. I smatram u tom smislu, na osnovu ovih empirijskih činjenica, da bi bilo dobro da postoji ovaj fond za prevenciju, isto kao što smatram da treba da postoji fond za liječenje različitih oboljenja kojih mi nemamo ovdje, a mislim da smo razgovarali to da bi u budućnosti trebalo da bude.

Mi naravno podržavamo ovu odluku. Nadamo se i vjerujemo da se neće otići do Ustavnog suda, evo vidimo svi da se ide do Ustavnog suda, veazno, pokušavaju da se sruše ove odluke o komunalnim taksama, tako da je dobar prijedlog Mirnesa bio na početku kolege, a i kao sekretara Grada Tuzle s ovim, da se na neki način ogradimo ukoliko dođe to do Ustavnog suda, da nemaju materijala ti koji budu podnosili tužbu ili ne znam šta već, da se to obori. Tako da Klub vijećnika NL Sloboda će podržati odluke o komunalnim taksama. Hvala lijepo.

ANA PEJIĆ

U redu. Sljedeća diskusija. Vijećnik Emir šahović. Izvolite.

EMIR ŠAHOVIĆ

Hvala predsjedavajuća. Izuzetno je bitna odluka i morao sam se javiti čisto zbog stenograma. Klub vijećnika Pokreta demokratske akcije apsolutno podržava ovu odluku i moramo naglasiti da od usvajanja nacrta ove odluke u septembru 2025. godine do danas dosta posla je urađeno i nadam se da će sredstva koja budu u prihodu od ove odluke namjenski biti trošena znači, kada je u pitanju i finansiranje predškolskih ustanova i dječijih igrališta i svega znači što će doprinijeti budućnosti ovom gradu. I još jednom pohvala za stručne službe, gradonačelnika Zijadu Lugaviću i Pokret demokratske akcije podržava ovu odluku.

ANA PEJIĆ

Sljedeća diskusija. Vijećnik Omer Berbić. Izvolite.

OMER BERBIĆ

Hvala lijepo. Ja se na početku nisam želio javiti prvi jer sam mislio da smo na Kolegiju i dogovorili da se ne javljamo, al evo pošto se sad svi javljamo i ja ću tako da iznesem stav koji sam iznio tamo među nama, a koji smo iznijeli i na Kolegiju koji se desio prije petnaestak dana, gdje smo sjeli da probamo usaglasiti ovu odluku.

Odluka u onoj formi koja je bila za nas je bila u potpunosti neprihvatljiva. Kad kažem u potpunosti neprihvatljiva, govorim o tome da mislim da je urađena paušalno. Ona odluka koja je bez ovih amandmana SDP-a, jer zahvaljujem se SDP-u pošto su sve one moje diskusije sa Kolegija i sa Vijeća sad pretočili u amandmane i to poslali, da SDP nije i da nisam dobio informaciju ja bi to isto uradio i mi danas morali glasati o tome. Tako da molim vas da idući put kada sjednemo na Kolegiju da se dogovorimo i tako dalje, dajte na Kolegiju da ove stvari

usaglašavamo, a ne post kolegija da idemo na neke stvari. Ali ona odluka u izvornom obliku za nas je bila potpuno neprihvatljiva ja bih rekao u nekoj formi i skandalozno. Zašto? Prvo kaže hajmo oporezovat muziku uživo u lokalima i kafićima. Pa bi ne znam 200-300 maraka, pa marka dan, pa ovako, pa onako. Pa pored svih ovi nameta taksi mi treba da subvencioniramo muziku da nam grad malo živne, grad je mrtav, više ima da prostitute pasa na ulici nego ljudi sad kad prođete. Mi idemo da to oporezujemo. Mi se borimo protiv toga, kaže ne možemo skroz evo smanjit ćemo, smanjit ćemo, evo vidite da se može.

Druga stvar. Dođemo koncerte. Pa prvi prijedlog je bio koliko sjećam 3 marke po kvadratu, pa Mejdan 3.000 kvadrata, pa će biti 9.000 maraka. Pa neće nam doći ni jedan koncert. Pogotovo onaj koncert koji nije za šire narodne mase odnosno koji nije koncert narodne muzike. Pa onda dođe kaže hajmo ove parkomate, aparate ovakve onakve oporezovati. Onda ja dobijem informaciju recimo da Kafematik ima 200 aparata i to po 200 maraka il 300 kolko na početku bilo to bi bilo koliko bilo znači to bi bilo 40-50.000 maraka bi čovjek morao plaćati. A to efektivno znači 3-4 izgubljena radna mjesta, ovaj, i to ne samo on, on je najveći, imate još 10 firmi koji se tim bave. I još vjerovatno 10 firmi koji razmišljaju da uđu u takvu vrstu posla. I zahvaljujem se SDP-u što kažem opet poslao amandmane, jer da nije SDP, mi bi, ako ništa iz ideoloških razloga. Sad dal ćemo mi riješiti ovaj problem što se tiče kockanja ovom Odlukom o komunalnim taksama, ublažit hoćemo, riješiti nećemo. Zašto govorim? Ovdje ja stavljam fokus na kladionice. Ja sam lično viđo djecu pored škola ne znam ovaj tamo kod Omege pa vamo na Bulevaru, Novi Grad i tako dalje. Ja sam lično viđo djecu za koju se ne može utvrditi da imaju više od 13-14 godina da uđu da se oklade i da im niko ništa ne kaže. Kažem ublažit hoćemo sigurno, riješiti nećemo. Zašto nećemo? Zato što oni svi sad imaju pristup onom online klađenju i samo će se prebacit na online klađenje. Zato bi ovdje volio da usvojimo jedan zaključak prema federalnom nivou vlasti, a to je da tražimo da se na problemu patološkog kockanja ili evo ko ima od stručnih ljudi da to bolje definiše, da iniciramo prema Vladi Federacije da se Vlada Federacije aktivnije uključi u rješavanje ovog problema. Sad nisu ni svi ovi priređivači igara na sreću isti, naravno ima ljudi koji prate možda da se zakon poštuje koji ne prate da se zakon poštuje. Ovi koji ne prate da se zakon poštuje oni uništavaju sve, porodice, djecu, učenike, sve redom. Mislim Senad je rekao jednu frapantnu cifru od 10% da ima ljudi, 10% ljudi ima problem sa patološkim kockanjem. To je strašno. I slažem se ovdje da ove stvari evo trebamo komunalnom taksom. Mirnes je isto u pravu kada je rekao da ovim zaključkom treba da budemo dobro oprezni. Znamo da su u prošlosti ovakve stvari padale na Ustavnom sudu. Šta će se desiti ukoliko mi naplatimo ove komunalne takse pa nam padne na Ustavnom sudu, dal mi to moramo vraćat?

Znači evo sam pozivam službe, nikakav neću zaključak, da budemo tri puta oprezni kada ovo usvojimo. Da ne bi mi došli u finansijski problem ukoliko na Ustavnom sudu ovo padne, a znamo i sami kako kod nas funkcioniše pravosudni sistem, tako da ne sumnjam da bi moglo doći do određenih poteškoća.

Tako da Naša stranka će podržati ovu odluku, pogotovo u ovoj formi sa amandmanima SDP-a. Bili smo u jako nezgodnoj situaciji, da nas se ne bi optužilo da mi želimo da zaštitimo neki kockarski lobi, vamo tamo, pod krinkom da su uvode takse ovim drugim privrednicima. Ne znam kako bi glasali i objasnili zbog čega nećemo da glasamo za takvu odluku, zato se zahvaljujem Klubu SDP-a, ali isto tako kažem, ukoliko nije SDP, mi bi sigurno to amandmanom definisali i išli dalje u tu priču.

I s ovim bi ja otprilike i završio naše izlaganje, ovakvu odluku u ovoj formi sa ovim amandmanima mi ćemo naravno ovaj podržati. Eto.

ANA PEJIĆ

U redu. Zaključujem diskusije klubova vijećnika.

Otvaram diskusije vijećnika. Da li se neko javlja?
Vijećnica Dragana Berberović. Izvolite.

DRAGANA BERBEROVIĆ GAGRO

Pozdravljam amandmane koje je uložio SDP. Svakako na početku nismo se slagali sa mnogo toga, međutim njihov potez je promijenio ovaj moj konkretno stav. Može to i bolje, ali evo, ovaj, da kažem, podržat ćemo ovo sada i može to SDP kad hoće, može.

ANA PEJIĆ

Zahvaljujem se. A sada pozivam, gospodina Almira Šutu, evo obzirom da je tu, a gradonačelnik nije, da samo izjasni se, da li prihvatate amandmane ili ne?

ALMIR ŠUTA – sekretar organa državne službe

Poštovana predsjedavajuća, zamjenici predsjedavajuće, sekretaru, kolege, poštovani vijećnici, vijećnice, kolege i kolegice, sve vas srdačno pozdravljam. Vezano za amandmane Kluba vijećnika SDP-a, predlagač, odnosno, gradonačelnik Grada Tuzla u cijelosti prihvaća sva tri amandmana Kluba vijećnika SDP-a na prijedlog Odluke o komunalnim taksama koje postaju sastavni dio odluke.

Ovom prilikom bih zahvalio svim vijećnicama i vijećnicima na njihovom angažmanu i doprinosu u izradi prijedloga odluke koja je, evo, danas pred nama na stolu i ovim putem još jednom zahvaljujem, kao i svim učesnicima, fizičkim i pravnim licima koji su bili, koji su participirali u javnoj raspravi po ovom pitanju. Hvala.

ANA PEJIĆ

Zahvaljujem se, a sada stavljam na izjašnjavaње prijedlog Odluke o komunalnim taksama uz amandmane koje je predlagač prihvatio i koji su postali sastavni dio odluke, a koji glase. Evo Slađana, molim vas da pročitate.

SLAĐANA KRAJINA – sekretar Gradskog vijeća Tuzla 100:42

„Amandman I

U članu 2. Odluke o komunalnim taksama briše se tačka a).

Amandman II

U članu 3. Odluke o komunalnim taksama brišu se tačke d) i g).

Amandman III

U Aneksu II – TARIFE KOMUNALNIH TAKSI u Odluci o komunalnim taksama mijenja se DIO E – Tarifni broj 5. (Priređivanje komercijalnih koncerata), tako da visina takse glasi:

- Zatvoreni prostor – 0,30 KM po m²
- Otvoreni prostor – 0,15 KM po m².“

ANA PEJIĆ

Molim vas da se izjasnite.

Glasanje je okončano.

Konstatujem da je Odluka o komunalnim taksama uz amandmane koje je predlagač prihvatio i koji su postali sastavni dio odluke, a koje je pročitala sekretar Gradskog vijeća usvojeni sa,

27 glasova za, nije bilo protiv i nije bilo suzdržanih.

Zamoliti ću sekretara da pročita zaključke proistekle iz diskusije.

Da li ste za da glasamo zajedno o svim zaključcima?

Izvolite Slađana.

SLAĐANA KRAJINA – sekretar Gradskog vijeća Tuzla

- Kolegij Gradskog vijeća traži od predlagača i obrađivača materijala da utvrde sve pravno relevantne podatke od Poreske uprave Tuzla, vezano za naplatu komunalne takse od priređivača igara na sreću, imajući u vidu podatke o prometu, a ne o dobiti ili prihodu priređivača igara na sreću, a u svrhe eventualne izmjene ili dopune predmetne Odluke o komunalnim taksama.

- Kolegij Gradskog vijeća Tuzla traži od predlagača i obrađivača da se prijedlog Odluke o komunalnim taksama sa svim pripadajućim aneksima, prije objavljivanja u „Službenom glasniku Grada Tuzle“ nomotehnički u cijelosti uskladi sa Amandmanima na prijedlog Odluke o komunalnim taksama, koje je predložio Klub vijećnika Socijaldemokratske partije BiH - SDP BiH u Gradskom vijeću Tuzla, koje je gradonačelnik Grada Tuzle, kao predlagač, prihvatio i koji su time postali sastavni dio Odluke o komunalnim taksama.

- Gradsko vijeće Tuzla traži od Vlade Federacije Bosne i Hercegovine da se aktivnije uključi u rješavanje patološkog problema kockanja na ovim prostorima.

ANA PEJIĆ

Molim vas da se izjasnite o pročitanim zaključcima.

Glasanje je okončano.

Konstatujem da su pročitani zaključci usvojeni sa,

26 glasova za, nije bilo protiv i nije bilo suzdržanih.

Prelazimo na sljedeću tačku dnevnog reda:

Razmatranje i usvajanje:

a) Odluke o izmjenama i dopuni Odluke o regulisanju naknade za javna dobra, dobra u općoj upotrebi i drugu imovinu, povjerenu javnim preduzećima i javnim ustanovama čiji je osnivač ili suosnivač Grad Tuzla

b) Odluke o izmjeni i dopuni Odluke o komunalnim djelatnostima

Predlagač: gradonačelnik Grada Tuzla.

Obrađivač: Služba za ekonomski razvoj, poduzetništvo i poljoprivredu i Radna grupa za pripremu prijedloga odluke kojom će se detaljno regulisati pitanje povjeravanja na upravljanje, korištenje i održavanje javnih dobara, dobara u opštoj upotrebi, nekretnina, komunalne i druge infrastrukture u vlasništvu Grada Tuzle, javnim preduzećima i javnim komunalnim preduzećima (pod a) i Služba za komunalne poslove, izgradnju i poslove mjesnih zajednica (pod b).

Materijal su razmatrali: Komisija za statutarna pitanja i propise, Komisija za ekonomske odnose, Komisija za komunalne poslove i pitanja mjesnih zajednica i klubovi vijećnika.

Da li ima potrebe za uvodnim izlaganjem? Nema.

Da li ima potrebe da se pročitaju izvještaji komisija? Nema.

Otvaram raspravu klubova vijećnika

Zatvaram raspravu klubova vijećnika.

Otvaram raspravu vijećnika.

Zatvaram raspravu vijećnika.

I da li ste za da glasamo u paketu za obje odluke?

Stavljam na izjašnjavanje Odluku o izmjenama i dopuni Odluke o regulisanju naknade za javna dobra, dobra u općoj upotrebi i drugu imovinu, povjerenu javnim preduzećima i javnim ustanovama čiji je osnivač ili suosnivač Grad Tuzla i Odluke o izmjeni i dopuni Odluke o komunalnim djelatnostima i molim vas da se izjasnite.

Glasanje je okončano.

Konstatujem da su pročitane odluke usvojene sa,

20 glasova za, nije bilo protiv i 4 suzdržana.

Sljedeća tačka dnevnog reda:

Razmatranje i usvajanje Odluke o izmjenama i dopunama Odluke o ustanovljenju nagrade „Meša Selimović“

Predlagač: gradonačelnik Grada Tuzla.

Obrađivač: Služba za kulturu, sport, mlade i socijalnu zaštitu.

Materijal su razmatrali: Komisija za statutarna pitanja i propise, Komisija za kulturu i očuvanje kulturno-historijskog i prirodnog naslijeđa i klubovi vijećnika.

Da li ima potrebe za uvodnim izlaganjem? (Nema).

Da li ima potrebe da se pročitaju izvještaji komisija? Nema.

Otvaram raspravu klubova vijećnika

Zatvaram raspravu klubova vijećnika.

Otvaram raspravu vijećnika.

Vijećnik Omer Berbić. Izvolite.

OMER BERBIĆ

Mislim, ovo je pokušaj, odnosno način da se Cum grano salis prebaci iz direktnog budžetskog finansiranja u direktno budžetsko finansiranje. Nisam za to, više sam za to da se napravi javni poziv konkretno za ovu nagradu i da onda firme mogu aplicirati sa svojim novim kreativnim idejama. Ovako će imati istu stvar koju imamo zadnjih deset godina bez kreativnosti, bez ovaj da to bude na jednom nivou koju ova nagrada zaista kao takva i zaslužuje. Više sam da se firme koje se bave tim bore, ko će bolje organizovati za manje novca i to bi nam donijelo da smo to stavili na javni poziv kao što moraju sva ostala javna preduzeća. Ovako mi sebi sa budžetskog finansiranja prebacujemo budžetsko finansiranje. Ovo je jedan manevar koji je ovaj po meni, ja ću glasati za, jer glasat ću za, za sve što se tiče kulture, ali u svakom slučaju mislim da bi bilo bolje da smo malo ovaj proces napravili kreativnijim, boljim, transparentnijim. Ne mora baš sve Grad organizovati znate. Ima puno kreativnosti i u privatnim preduzećima i kod individualaca i kod slobodnih umjetnika i tako dalje. Ono što stiče kulture možda može i neko drugi da organizuje, a ne da bude sve po istom šablonu. Eto. Al ja kažem, opet glasat ću za, jer neću glasati protiv za bilo šta što stiče kulture.

ANA PEJIĆ

U redu. Da li se još neko javlja za diskusiju vijećnika?

Zaključujem diskusiju vijećnika i stavljam na izjašnjavanje prijedlog Odluke o izmjenama i dopunama Odluke o ustanovljenju nagrade „Meša Selimović“ i molim vas da se izjasnite.

Glasanje je okončano.

Konstatujem da je pročitana odluka usvojena sa,
26 glasova za, nije bilo protiv i nije bilo suzdržanih.

Sljedeća tačka dnevnog reda:

Razmatranje i usvajanje Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla

Predlagač: gradonačelnik Grada Tuzla.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose i klubovi vijećnika.

Da li ima potrebe za uvodnim izlaganjem? Nema.

Da li ima potrebe da se pročitaju izvještaji komisija? Nema.

Podsjećam da je Klub vijećnika Socijaldemokratske partije BiH – SDP BiH blagovremeno podnio 3 amandmana na prijedlog Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla.

Amandmane Kluba vijećnika SDP-a ste dobili elektronski, kao i u materijalu podijeljenom pred sam početak sjednice, a zamolit ću sekretara da pročita podnesene amandmane Kluba vijećnika SDP-a. Izvolite Slađana.

SLAĐANA KRAJINA – sekretar Gradskog vijeća Tuzla

Podneseni amandmani Kluba vijećnika Socijaldemokratske partije BiH:

„Amandman I

U članu 1. Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla u stavu (4) briše se dio rečenice „ili njen“.

Amandman II

U članu 3. Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla u stavu (3) poslije dijela teksta „Analitička kartica“ dodaje se tekst „i sva pripadajuća dokumentacija o postavljenoj opremi čine“. Ostatak stava ostaje nepromijenjen.

Amandman III

U članu 8. Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla briše se dio rečenice „ugovorom“ i mijenja se da glasi „ugovorom“.

ANA PEJIĆ

Zahvaljujem se. Otvaram raspravu klubova vijećnika i pozivam predsjednika Kluba vijećnika SDP-a da ukratko obrazloži amandmane. Izvolite.

ZLATAN MEHMEDOVIĆ

Poštovana predsjedavajuća, kolegice i kolege vijećnici, Klub SDP-a je pažljivo analizirao prijedlog Odluke o povjeravanju zip line poligona i umjetne stijene Javnoj ustanovi Centar za kulturu Tuzla. Prije svega želimo naglastiti da podržavamo razvoj rekreativne i turističke infrastrukture na lokalitetu Ilinčica. Smatramo da ovaj projekat ima potencijal da doprinese i razvoju turizma i promociji grada, aktivnom načinu života i dodatnim sadržajima za mlade.

Međutim, kao vijećnici, naša je obaveza da osiguramo da svaki pravni akt koji usvajamo bude i normativno jasan, precizan, pravno siguran i tehnički usklađen. Zbog toga smo predložili tri amandmana.

Prvi Amandman uklanja normativnu nepreciznost koja bi u budućnosti mogla izazvati različita tumačenja.

Drugi Amandman je suštinski najvažniji. Kada se javnoj ustanovi predaje sigurnosno osjetljiva oprema poput zip line sistema i stijene za penjanje, nije dovoljno prenijeti samo analitičku karticu. Neophodno je prenijeti kompletnu tehničku dokumentaciju, ateste i certifikate. Time štitimo korisnike, ustanovu, grad Tuzla, ali i buduće uprave.

Treći Amandman je tehničke prirode i odnosi se na pravno jezičku preciznost.

Ovi amandmani ne mijenjaju suštinu odluke, nego ju unapređuju. Dakle, predstavljaju odgovorno upravljanje javnom imovinom i zaštitu interesa građana Tuzle. Dakle, pozivam vijećnike da podrže predložene amandmane.

Takođe, kao klub smo podnijeli i prijedlog zaključaka u okviru razmatranja i usvajanja prijedloga ove odluke.

Zaključak jedan. Gradsko vijeće Tuzla zadužuje nadležnu gradsku službu da prilikom vršenja primopredaje...A nemate? Nisam poslao jel? Gradsko vijeće Tuzla zadužuje nadležnu gradsku službu da prilikom vršenja primopredaje poligona i prateće opreme ustanovi priloži svu prateću dokumentaciju, koja se veže za poligon i postavljenu opremu, a na kojoj će biti jasno definisano stanje opreme, kao i sve upotrebne dozvole potrebne za puštanje u rad.

Zaključak dva. Gradsko vijeće Tuzla zadužuje nadležnu gradsku službu da prilikom donošenja narednog rebalansa budžeta Grada Tuzla poveća sredstva za rad Javne ustanove „Centar za kulturu“ Tuzla, kako bi Ustanova mogla odgovoriti postavljenim obavezama iz ove Odluke. Sredstva bi se usmjerila na sprovođenje obaveza koje se tiču sigurnosnih procedura, tekućeg i investicionog održavanja postavljene opreme, tehničkih pregleda, servisiranja i atestiranja postavljene opreme, kao i policama osiguranja. To je to. Hvala.

ANA PEJIĆ

Zahvaljujem se.

Sljedeća diskusija. Vijećnik Omer Berbić. Izvolite Omere.

OMER BERBIĆ

Fala ljepo. Pa, moja diskusija se konkretno odnosi na ovu umjetnu stijenu za penjanje. Ja sam tu pisao jednom inicijativu i mislim da je sad možda i pravo vrijeme. Zadnji moj razgovor sa mojim prijateljem Radetom Šimićem, koji je bio pripadnik Oružanih snaga Bosne

i Hercegovine je bio upravo gdje je on inicirao postavljanje jedne umjetne stijene za penjanje. To je momak koji je bio zaista vrhunski čovjek, vrhunski individualac, vrhunski planinar koji je 2021. godine poginuo na planini Prenj. I upravo iz tog razloga bi ja volio da sugeriše ovo Gradsko vijeće jednim zaključkom, pošto sad dajemo Centru za kulturu, menadžmentu Centra za kulturu, da porazgovara sa porodicom tragično preminulog Radeta Šimića i da vidi njihov stav, te nakon njihovog stava da nam eventualno uputi inicijativu za izmjenu naziva ove umjetne stijene koja bi se nazvala evo po njemu. Mislim da bi to bio zaista jedan ljep gest da se sjećamo jednog čovjeka koji je to svojim životom i bićem zaslužio. Ali naravno u sve se treba uključiti porodica, tako da mislim da evo menadžment bi trebao ovaj prije svega porazgovarati, pa ukoliko porodica da svoje odobrenje, da evo i Gradsko vijeće, odnosno komisija za davanje naziva može ići u tom pravcu. Eto, toliko. Fala ljepo.

ANA PEJIĆ

Zahvaljujem se.

Da li se još neko javlja ispred klubova vijećnika?

Vijećnik Senad Mehmedinović. Izvolite.

SENAD MEHMEDINOVIĆ

Ništa, drago mi je da je došlo do realizacije ove inicijative koja je u prošlom sazivu bila između ostalog i moja i bila je još od nekih drugih vijećnika. Međutim, imam takođe prijedlog zaključka obzirom da je Ilinčica odlično mjesto i za populaciju djece sa invaliditetom za igru, da se u budućnosti razmišlja o sljedećim stvarima, a koje predlažem u formi zaključaka, a Slađana ja ću vam sad to proslijediti, ne morate da kucate.

Dakle, prvi zaključak je: Predlaže se formiranje senzorne zone u okviru parka, sa taktilnim stazama, zvučnim elementima, mirnom zonom sa sjenom, biljkama različitih tekstura i tablom sa piktogramima, radi podrške djeci sa autizmom i intelektualnim teškoćama.

Predlaže se postavljanje prilagođenog mobilijara koji uključuje klupe sa prostorom za kolica, stolove prilagođene djeci u kolicima, česmu na dvije visine te, gdje je moguće, prilagođen javni sanitarni čvor. Hvala.

ANA PEJIĆ

Zahvaljujem se. Da li se...Vijećnik Mirnes Ajanović. Izvolite.

MIRNES AJANOVIĆ

Ako nije u vezi sa dnevnim redom, neću, ako jeste, a jeste, jer da bi došli do ovog zipa moramo ili pješke ili autom. A put koji vodi pored mezarja, kada se skrene gore pa ona oštra krivina ima, na jednom mjestu je vrlo opasan. Ne vidi se auto iz suprotnog smjera. Dakle, vozilo mora ići sredinom, ne može sredinom, jednom trakom ako neko naiđe udes je.

Zaključak. Da se na tim kritičnim mjestima postave saobraćajna ogledala adekvatna radi bezbjednosti saobraćaja.

Pričamo o zipu, o svemu, a neko će gore izgubit život. I tu ako dođe do udesa, automobil ide dole desno direktno u mezarje, u provaliju. Imaćemo katastrofu u gradu. Reće šta smo radili, nismo gledali, nismo poduzeli mjere. Stoji nekakva ograda, na onom jednom mjestu je vrlo opasno mjesto, ne vidi se. I ja kad vozim, bukvalno moram gotovo stat, pa nekad svirnut, pa deset na sat da neće ko naletiti pogotovo odozdo, jer mora ići većom snagom uzbrdo je.

Dakle, postaviti te saobraćajne znake, odnosno saobraćajna ogledala, gdje god su kritična mjesta, znaju, ne trebamo ih učiti, to su saobraćajni inženjeri, da postave radi bezbjednosti prilaska mjestu na Ilinčici gdje se odvijaju druženja, pa i ovaj ZIP i sve ostalo. Sve ostalo je bilo suprotno, napravili ZIP, a ugrozili bezbjednost ljudi koji dolaze i koje pozivamo da dođu. Hvala.

ANA PEJIĆ

Zahvaljujem se.

Replika. Senad Mehmedinović. Izvolite.

SENAD MEHMEDINOVIĆ

Pa evo Mirnes je to rekao, dakle, samo možda u prijedlogu zaključka, da jasno preciziramo, dakle, to je u stvari postavljanje ovih takozvanih sfernih ogledala, koja su dobra baš za ovoj krivini, za koju je Mirnes rekao, pa evo, da damo samo naziv. Eto, to je to.

ANA PEJIĆ

U redu. Da li se još neko javlja za diskusiju ispred klubova vijećnika?

Zaključujem diskusiju klubova vijećnika.

Otvaram diskusiju vijećnika.

Vijećnica Dragana Berberović. Izvolite.

DRAGANA BERBEROVIĆ GAGRO

Evo ovako. Ja ne znam ko se baš sjetio da ovu djelatnost da Centru za kulturu, ali evo, istaću jednu stvar. Pravni rizici za organizatora penjanja na prirodnim i umjetnim stijenama su značajni, jer se radi o aktivnosti s povećanim rizikom od povrede. U praksi se odgovornost najčešće zasniva na principu odgovornosti za štetu zbog opasne djelatnosti. Centar za kulturu, ne znam da li ima obučene ljude koji imaju licencu, koji su završili znači Kinezološki fakultet ili Školu za sportsko penjanje, alpinizam, moraju imati takođe ili službu ili obučene ljude koji znaju pružiti prvu pomoć. Napominjem da po zakonu organizator snosi svu krivičnu i materijalnu odgovornost za bilo kakvu štetu znači koja se dogodi ovaj na tom skupu ili ovaj u okviru te djelatnosti. Pa ne znam koliko je, evo ja ću, bez obzira što sam za i dat ću podršku, ne znam koliko je baš ovaj Centar za kulturu, koji ama baš nikakve veze s ovim nema adekvatan da, evo, da mu se ustupi ovaj zip line.

ANA PEJIĆ

U redu. Da li se još neko javlja za diskusiju vijećnika?

Replika. Vijećnica Svjetlana Kakeš. Izvolite.

SVJETLANA KAKEŠ

Ma samo kratko. Što se tiče ovog dijela diskusije kolegice Dragane, da kažem da su ove strukture izgrađene na Ilinčici u okviru jednog EU projekta Open Air Everywhere gdje je Grad Tuzla učestvovao zajedno sa NERDA-om i sa drugim prekograničnim partnerima. Da je oprema ugrađena od strane certificirane firme i da je jedan od uslova kod nabavljanja i ugradnje te opreme bila i provođenje obuke za one koji će koristiti tu opremu. Znači, radi osiguranja,

evo ja imam tu potvrdu, prvo da je oprema u skladu sa svim standardima propisana i za takve vrste opreme, da je na parku prirode Ilinčica organizovana sveobuhvatna obuka za operatere u formi osmodnevnog praktičnog kursa u periodu od 01.10. do 01.11.24-e za šest polaznika. Kolko ja znam, tri su polaznika bila iz Centra za kulturu, tri iz Profesionalne vatrogasne jedinice i da su oni nakon te obuke imali određene ispite i dobili određene certifikate. Što je to dodijeljeno Centru za kulturu? Ja kolko se sjećam, dodijeljeno je zato što je i park prirode dodijeljen na upravu Centru za kulturu i to je sastavni dio tog kompleksa. Kako će Centar za kulturu dalje s tim sad? Ja znam da su ovi, kao što je Dragana rekla, uposlenici Javne ustanove Centar za kulturu, naravno imaju svoje druge po pravilniku propisane poslove, ali evo bitno je da su prošli obuku i nije problem da se sad angažuje možda neko drugo udruženje, dal GSS ili neko ko je specijalizovan i da prođu takođe tu obuku. Ali što se tiče znači uposlenika, on su prošli obuku i dobili certifikate za korištenje te opreme.

ANA PEJIĆ

Replika. Vijećnica Dragana Berberović. Izvolite.

DRAGANA BERBEROVIĆ GAGRO

Ja bih samo rekla koleginići da baš ne verujem da neko baš sa tom kratkom obukom može da baš bude adekvatan, ali eto, ako vi tako smatrate, ja se nadam da će Centar za kulturu ispuniti sve obaveze što se tiče sigurnosnog aspekta i korištenja ove zip line i da neće biti nikakvih negativnih posljedica niti povreda stanovništva i korisnika u stvari ove zip line.

ANA PEJIĆ

U redu. Da li se još neko javlja za diskusiju vijećnika?

Zaključujem diskusiju vijećnika i pozivam ispred obrađivača gospodina Almira Šutu da se izjasni da li prihvataju amandmane Kluba vijećnika SDP-a.

ALMIR ŠUTA – sekretar organa državne službe

Poštovna predsjedavajuća, zamjenici, sekretaru Gradskog vijeća, poštovani vijećnici i vijećnice, poštovane kolege, ispred predlagača gradonačelnika Grada Tuze, predlagač u cjelosti prihvata amandmane Kluba vijećnika SDP-a koji je postao sastavni dio predmetne odluke. Hvala.

ANA PEJIĆ

Zahvaljujem se, a sada stavljam na izjašnjavaње prijedlog odluke o...Izvolite. (Alma Halilović govori bez uključenog mikrofona op.a.). Izvolite. Možete. Izvolite.

ALMA HALILOVIĆ – pomoćnik gradonačelnika za Službu za ekonomski razvoj, poduzetništvo i poljoprivredu

Dobar dan želim. Sve vas lijepo pozdravljam. Imam samo jednu molbu da se u zaključku jedan, koji glasi da nadležna, ako nije problem, Slađo, samo da pročitate.

ANA PEJIĆ

Može samo mikrofona da ugasiš Alma, samo da bi mogla Slađana. Izvolite.

SLAĐANA KRAJINA – sekretar Gradskog vijeća Tuzla

Prijedlog prvog zaključka je bio: Gradsko vijeće Tuzla zadužuje nadležnu gradsku službu da prilikom vršenja primopredaje poligona i prateće opreme Javnoj ustanovi Centar za kulturu Tuzla priloži svu prateću dokumentaciju koja se veže za poligon i postavljenu opremu, a na kojoj će biti jasno definisano stanje opreme kao i sve upotrebne dozvole potrebne za puštanje u rad.

ANA PEJIĆ

Izvolite Alma. Samo Slađana mikrofona. Izvolite.

ALMA HALILOVIĆ – pomoćnik gradonačelnika za Službu za ekonomski razvoj, poduzetništvo i poljoprivredu

Evo, ja bi samo zamolila da se umjesto nadležna gradska služba da stoji nadležne gradske službe i učesnici u projektu.

Služba, ako ste mislili na Službu za ekonomski razvoj, poduzetništvo i poljoprivredu, nije učestvovala u realizaciji ovog projekta, nego su u realizaciji projekta učestvovali neke druge gradske službe. Stručna služba za poslove gradonačelnika, Komunalna, Turistička zajednica, NERDA itd. Tako da mi zaista, mi se ovdje pojavljujemo, evo i radna grupa je isto pripremila ovu odluku, tako da mi nemamo tu dokumentaciju. Samo u tom dijelu evo da bude jasnije. Možda samo, evo ako dozvolite, jedan kratak komentar što se tiče Centra za kulturu, mi smo već i u ovoj godini, pa čak i u prethodnoj godini povećali određena sredstva u budžetu upravo za ove namjene, da Centar za kulturu može da uposli dodatni kadar koji će biti angažovan na radu, odnosno na upravljanju ovim dodatnim nekim aktivnostima. Oni, osim ovog dijela zip line itd., naravno i treba da ulože i dodatne napore u obezbjeđenju uslova svih sigurnosnih. A zašto Centar za kulturu? Već ranije je Centru za kulturu povjerena i kuća koja se nalazi na Ilinčici. Tako da oni i druge neke aktivnosti i kulturne sadržaje i rekreativne sadržaje, znači upravljaju ovim aktivnostima na Ilinčici, pa se evo i ovaj sadržaj koji je kroz realizaciju ovog projekta finaliziran, nekako tom logikom sve se stavlja na upravljanje Centru za kulturu, naravno, uz finansijsku podršku Grada, da bi oni mogli na adekvatan i kvalitetan način upravljati svim ovim aktivnostima na Ilinčici. Eto. Toliko. Hvala.

ANA PEJIĆ

U redu. Zahvaljujem se. Sada stavljam na...Stavljam na izjašnjavanje prijedlog Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla, uz amandmane koji je predlagač prihvatio i koji su postali sastavni dio odluke. Zamolit ću sekretara da pročita amandmane.

SLAĐANA KRAJINA – sekretar Gradskog vijeća Tuzla

Amandmani Kluba vijećnika Socijaldemokratske partije Bosne i Hercegovine:

„Amandman I

U članu 1. Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla u stavu (4) briše se dio rečenice „ili njen“.

Amandman II

U članu 3. Odluke o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla u stavu (3) poslije dijela teksta „Analitička kartica“ dodaje se tekst „i sva pripadajuća dokumentacija o postavljenoj opremi čine“. Ostatak stava ostaje nepromijenjen.

Amandman III

U članu 8. Odluke briše se dio rečenice „ugovorom“ i mijenja se da glasi „ugovorom“.

ANA PEJIĆ

Molim vas da se izjasnite.

(SENIA HUSIĆ – Možel ponovo molim vas predsjednice). Može, naravno. Može Enisa samo da poništite.

Molim vas da se izjasnite ponovo.

Glasanje je okončano.

Konstatujem da je Odluka o povjeravanju na korištenje zip line poligona sa pratećom opremom i umjetne stijene za penjanje na lokalitetu Ilinčica Javnoj ustanovi „Centar za kulturu“ Tuzla, uz amandmane koje je predlagač prihvatio i koji su postali sastavni dio odluke, a koje je pročitala sekretar Gradskog vijeća usvojeni sa,

22 glasa za, nije bilo protiv i 1 suzdržan.

Zamoliti ću sekretara da pročita zaključke proistekle iz diskusija. I da li ste za da glasamo u paketu o zaključcima? (Jesmo). U redu. Izvolite.

SLAĐANA KRAJINA – sekretar Gradskog vijeća Tuzla

Prijedlog zaključaka:

- Gradsko vijeće Tuzla zadužuje nadležne gradske službe i učesnike u projektu da, prilikom vršenja primopredaje poligona i prateće opreme Javnoj ustanovi „Centar za kulturu“ Tuzla, prilože svu prateću dokumentaciju koja se veže za poligon i postavljenu opremu, a na kojoj će biti jasno definisano stanje opreme, kao i sve upotrebne dozvole potrebne za puštanje u rad.

- Gradsko vijeće Tuzla zadužuje nadležnu gradsku službu da prilikom donošenja narednog rebalansa budžeta Grada Tuzle poveća sredstva za rad JU „Centar za kulturu“ Tuzla kako bi ova Ustanova mogla odgovoriti obavezama postavljenim ovom Odlukom. Sredstva bi se usmjerila na provođenje obaveza koje se tiču sigurnosnih procedura, tekućeg i investicionog održavanja postavljene opreme, tehničkih pregleda, servisiranja i atestiranja postavljene opreme kao i polica osiguranja.

- Gradsko vijeće Tuzla sugeriše menadžmentu JU „Centar za kulturu“ Tuzla da obavi razgovor sa porodicom tragično preminulog Radeta Šimića te da, ukoliko porodica da

odobrenje, uputi inicijativu za izmjenu naziva umjetne stijene za penjanje koja bi nosila ime po Radetu Šimiću.

- Gradsko vijeće Tuzla predlaže formiranje senzorne zone u okviru parka, sa taktilnim stazama, zvučnim elementima, mirnom zonom sa sjenom, biljkama različitih tekstura i tablom sa piktogramima, radi podrške djeci sa autizmom i intelektualnim teškoćama.

- Gradsko vijeće Tuzla predlaže postavljanje prilagođenog mobilijara koji uključuje klupe sa prostorom za kolica, stolove prilagođene djeci u kolicima, česmu na dvije visine te, gdje je moguće, prilagođen javni sanitarni čvor.

- Gradsko vijeće Tuzla sugeriše nadležnima da se na kritičnim mjestima na putu prema Ilinčici postave sferna ogledala u cilju povećanja bezbjednosti u saobraćaju.

ANA PEJIĆ

Molim vas da se izjasnite o pročitanim zaključcima.

Glasanje je okončano.

Konstatujem da su pročitani zaključci usvojeni sa.

21 glasom za, nije bilo protiv i nije bilo suzdržanih.

Sljedeća tačka dnevnog reda:

Razmatranje i usvajanje Odluke o dopuni Odluke o uvjetima i načinu pribavljanja i raspolaganja nekretninama u vlasništvu Grada Tuzle

Predlagač: gradonačelnik Grada Tuzla.

Obrađivač: Služba za geodetske i imovinsko-pravne poslove, evidenciju i upravljanje imovinom.

Materijal su razmatrali: Komisija za statutarna pitanja i propise, Komisija za ekonomske odnose i klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji komisija?

Otvaram raspravu klubova vijećnika.

Zatvaram raspravu klubova vijećnika.

Otvaram raspravu vijećnika.

Vijećnica Svjetlana Kakeš. Izvolite.

SVJETLANA KAKEŠ

Hvala predsjedavajuća. Ja evo onaj pozdravljam inicijativu koordinacije boračkih organizacija da se prilagodi ova odluka i da se omogući ratnim vojnim invalidima i mirnodopskim vojnim invalidima da učestvuju u zamjeni nekretnina sa Gradom Tuzla, ako je to u cilju adekvatnog rješavanja njihovog stambenog problema.

I naravno, posebno mi je drago što je ovdje opisan slučaj maloljetnog borca i mirnodopskog vojnog invalida Mirze Delibegovića, jer sam jako dobro upoznata s njegovim slučajem i drago mi je da se on tu pominje i nadam se da će on biti jedan od prvih korisnika donošenja ovakve odluke. Upravo zbog toga nisam htjela da djelujem amandmanski i da utičem na donošenje ovakvog teksta odluke, ali imam primjedbu i prijedlog da se pristupi u razumnom roku da se pristupi izmjeni odluke.

Naime, ako se sjećate, mi smo i kod one odluke o dodjeli stanova, reagovali u smislu da se izbjegne diskriminacija invalida po uzroku nastanka invaliditeta. Ovdje ponovo imamo taj slučaj. Ne moram sad ponovo spominjati Konvenciju ujedinjenih nacija koja je ratificirala

Bosna i Hercegovina o zabrani diskriminacije baš po ovom osnovu i da svako isključenje ili pravljenje razlike po osnovu invaliditeta se smatra diskriminacijom. Tako da, mislim, sjetila sam se i jednog, nažalost je preminula, problema koju je imala naša višestruka prvakinja u sportskom streljaštvu Kadira Nukić koja je takođe godinama pokušavala da zamijeni stan koji joj je bio nepristupačan, a mislim da je ona bila civilna žrtva rata, znači ovakva odluka se ni na nju ne bi odnosila, a da ne govorim o drugim vrstama invaliditeta nastalim po rođenju ili na druge načine.

Tako da bih ja predložila jedan zaključak da u cilju sprečavanja moguće diskriminacije...Predsjedavajuća, molim vas....U cilju sprečavanja moguće diskriminacije osoba sa invaliditetom po osnovu uzroka nastanka invaliditeta, traži se od nadležne službe da u razumnom roku pripremi izmjene i dopune odluke o uvjetima i načinu pribavljanja i raspolaganja nekretninama u vlasništvu Grada Tuzle, na način da se mogućnost zamjene nekretnina u svrhu adekvatnog rješavanja stambenog pitanja odnosi i na sve osobe sa invaliditetom bez obzira na uzrok nastanka invaliditeta. Poslala sam na mail. Hvala.

ANA PEJIĆ

Zahvaljujem se. Da li se još neko javlja ispred klubova vijećnika?
Vijećnik Mirnes Ajanović. Izvolite.

MIRNES AJANOVIĆ

Da, ovaj problem koji je koleginica Kakeš iznijela jeste zaista bizaran. Oni su na 17-om spratu, a lift ide do 15-og i sa dva sprata se mora proći u agoniji.

Ima još jedan slučaj, pa ću zatražiti, nemam ovdje broj. Komisija za ljudska prava takođe raspravlja o njemu. Radi se o osobi sa invaliditetom koja je u zgradi Jupiter i dobila je donaciju za lift za osobe sa invaliditetom. Ali to je tako postavljeno da se sad ne može prići ostavi da bi mogla doći do svojih kolica i izaći napolje. I sad ta okolnost gdje je tu napravljeno onemogućava je pristupu ostavi, jer kolica su šira od ulaza u tu ostavu. Imamo bizarnu situaciju gdje stanari ne daju saglasnost, jer se boje da bi oni morali platiti proširenje ulaza u tu ostavu gdje bi ona mogla doći do svojih kolica. Komisija je tražila da nadležne službe obezbijede saglasnost, a za obezbjeđenje sredstava će se pobrinuti Grad ili nekakav donator. Ali imamo ove situacije da zaključkom idemo ka tome, dakle, ne samo zamjena stanova, nego izmjena konstrukcijskih dijelova koji tehnički zadovoljavaju na zgradama kako bi se omogućilo osobama sa invaliditetom lakše ulaženje u zgradu i izlaženje iz zgrade. Eto. A posebno osvrtao na ovaj predmet koji se vodi pred Komisijom za ljudska prava. Malo treba nešto, malo novca, ali stanari su počeli biti malo kao uplašeni da bi oni morali platiti. Dakle, oni neće plaćati ništa, ali moraju dati saglasnost radi propisa, a mislim da bi bilo nehumano da bilo ko uskrati takvu saglasnost, jer imao sam priliku vidjeti osoba onda mora da puzi bukvalno po onim stepenicama i to je nedopustivo u današnje vrijeme da posmatramo, gledamo, a ne činimo ništa.

I takođe još jednom, podrška dakle ovim zadnjim zaključcima sa zadnje Komisije u vezi ovog problema od strane Gradskog vijeća da se traži da služba što prije riješi ovaj problem. (ANA PEJIĆ - U redu. Da li se još neko jav...Aha). Može. (SLAĐANA KRAJINA – Sa koje komisije?) Zadnje Komisije za ljudska prava. Sa zadnje komisije sad. (SLAĐANA KRAJINA – Pa hoćemol onda ovdje samo da se urgira na realizaciju zaključaka?). Da i realizacija zaključaka, al da i u ostalim slučajevima, da ne bude samo ovaj, gdje su slični slučajevi, gdje treba proširiti malo ulaz ili nešto da stanari daju saglasnost, a da će se na drugi način obezbijediti sredstvo za realizaciju toga. Hvala.

ANA PEJIĆ

U redu. Da li se još neko javlja za diskusiju klubova vijećnika?

Zaključujem diskusiju klubova vijećnika.

Otvaram raspravu vijećnika.

Zaključujem diskusiju vijećnika.

Za riječ se javila gospođa Jasmina Šimleša, pomoćnik gradonačelnika za geodetsko i imovinsko-pravne poslove. Izvolite.

JASMINA HASANEFENDIĆ – ŠIMLEŠA - pomoćnik gradonačelnika za Službu za geodetske i imovinsko – pravne poslove, evidenciju i upravljenje imovinom

Poštovana predsjedavajuća Gradskog vijeća, dopredsjedavajući, sekretar, poštovane vijećnice i vijećnici, zahvaljujem se evo prije svega na sugestijama vijećnice Svjetlane Kakeš. Naime, razloge donošenja ove odluke ste vidjeli. Služba tek od 1. januara upravlja sa stanovima i stambenim fondom. Još uvijek nismo upoznati o kojem stambenom fondu je riječ. Dakle, treba će vremena da prođe da vidimo zapravo koji su to stanovi, sve u vlasništvu Grada i po kom osnovu mi njima upravljamo. I na koji način upravljamo. Ono što smo zasad primijetili jeste da svi ti stanovi su građeni, osim stanova na kojima postoje stanarska prava i neka druga zaštićena prava, da sve zgrade socijalnog stanovanja su po nekakvim projektima i građeni zapravo postoje već uslovi korištenja tih stanova, iako su u vlasništvu Grada i takvi stanovi dakle, ne bi mogli podlijegati ovakvoj vrsti zamjene.

Dakle, zaista se radi o politici upravljanja koja je, pa ja bih rekla, uglavnom, ili uglavnom većem dijelu, najvećem dijelu socijalnog karaktera. Tako da ovaj slučaj rješavanja pitanja mirondopskog vojnog invalida već traje nekoliko, mislim mi smo upoznati da traje već određeni duži period iz raznoraznih razloga, a evo između ostalog iz razloga stvaranja pravnog osnova za mogućnost ovakve zamjene. Zbog toga smo djelovali hitno kako bismo stvorili uslov u konkretnom slučaju, a ovaj, a za ostalo, naravno, apsolutno se slažem s vašom primjedbom i neko sam ko smatra da tako treba postupati, ali kažem vam, ne znamo još uvijek s kojim fondom. Dakle, politika upravljanja poslovnim prostorima je potpuno različita od onoga čim se bavi Služba za geodetsko i imovinsko-pravne poslove, tako da će nam trebati vremena i vremena i zaposlenika i svega da bismo uopšte ušli ovaj u neke dalje postupke upravljanja našim stanovima. Eto. Hvala.

ANA PEJIĆ

Zahvaljujem se. A sada stavljam na izjašnjavanje prijedlog Odluke o dopuni Odluke o uvjetima i načinu pribavljanja i raspolaganja nekretninama u vlasništvu Grada Tuzle i molim vas da se izjasnite.

Glasanje je okončano.

Konstatujem da je pročitana odluka usvojena sa,

19 glasova za, nije bili protiv i 6 suzdržanih.

Zamoliti ću sekretara da pročita zaključke proistekle iz diskusije.

SLAĐANA KRAJINA – sekretar Gradskog vijeća Tuzla

Prijedlog zaključaka:

- U cilju sprečavanja moguće diskriminacije osoba sa invaliditetom po osnovu uzroka nastanka invaliditeta, traži se od nadležne službe da u razumnom roku pripremi izmjene i dopune Odluke o uvjetima i načinu pribavljanja i raspolaganja nekretninama u vlasništvu Grada Tuzle, na način da se mogućnost zamjene nekretnina u svrhu adekvatnog rješavanja stambenog pitanja odnosi na sve osobe sa invaliditetom bez obzira na uzrok nastanka invaliditeta.

- Gradsko vijeće Tuzla urgira na realizaciji zaključaka Komisije za ljudska prava i slobode koji su se odnosili na probleme pristupa u zgradama osobama sa invaliditetom, te u tu svrhu traži od nadležnih službi da se razmotri mogućnost ne samo zamjene stanova nego i obezbjeđenja potrebnih sredstava za zamjenu konstrukcijskih i drugih dijelova u zgradama kako bi se osobama sa invaliditetom omogućio ulazak i izlazak iz zgrade.

ANA PEJIĆ

Molim vas da se izjasnite o pročitanim zaključcima.

Dragana, molim vas samo da glasate. (Izvinjavam se, možemo li ponoviti?). Može. Možete Enisa samo poništiti.

Molim vas samo da se ponovo izjasnite o pročitanim zaključcima. Ma ništa. Nije problem.

Glasanje je okončano. (SLAĐANA KRAJINA – Moramo poništiti. Vijećnik Husić nije glasao. Poništite. Ponovo.).

Molim vas da se ponovo izjasnite o pročitanim zaključcima.

Glasanje je okončano.

Konstatujem da su pročitani zaključci usvojeni sa,
20 glasova za, nije bilo protiv i 5 suzdržanih.

A sada dajem pauzu od 30 minuta.

(Pauza).

Nastavljamo sa radom sjednice.

Sljedeća tačka dnevnog reda:

RAZMATRANJE I UVAJANJE ODLUKE O DAVANJU PRETHODNE SAGLASNOSTI NADZORNOM ODBORU JAVNO PREDUZEĆE GRADSKA VETERINARSKA STANICA D.O.O. TUZLA ZA IMENOVANJE DIREKTORA DRUŠTVA

Predlagач je gradonačelnik Grada Tuzla.

Obrađivač je Služba za ekonomski razvoj poduzetništvo i poljoprivredu i nadzorni odbor Javnog preduzeća Gradska veterinarska stanica d.o.o. Tuzla.

Materijal su razmatrali Komisija za statutarna pitanja i propise, Komisija za ekonomske odnose, Komisija za poduzetništvo i Klubovi vijećnika.

Da li ima potrebe za uvodnim izlaganjem? Nema.

Da li ima potrebe da se pročitaju izvještaji Komisija? Nema.

Otvaram raspravu Klubova vijećnika.
 Zatvaram raspravu Klubova vijećnika.
 Otvaram raspravu vijećnika. Vijećnica Dragana Berberović, izvolite.

DRAGANA BERBEROVIĆ GAGRO

Kao što sam u prethodnim mojim govorima napominjala, apsolutno sam protiv imenovanja osoba koje su stekle uvjete za mirovinu na upravljački direktorske pozicije u javne ustanove i javna poduzeća. Kakva je ovo poruka mladima? Kakva je ovo poruka mladima? Idite odavde, nemojte ostajati. Onaj ko je se zakačio za fotelju, on iz nje ne ide pa do kraja. Po meni je ovakav način imenovanja, kadroviranja, toliko sraman i ja ne znam, evo, pitam svoje kolege dokle ovako može da ide? Ovo je krajnje, krajnje nekorektan odnos prema mladima. Nedaju se šanse mladima. Mladi se tjeraju ovakvim načinom kadroviranja. Znači, niste dobro došli, idite odavde mi imamo one svoje koje će tu da budu pa do sljedećeg stoljeća, ako mogu. Nemojte to da radite. Nemojte da radite, nemamo budućnosti. Ode nam mladost. Dalje, ponovo, ako neko kaže samo jedan kandidat, pa ko će da se prijavi za tu poziciju kad svi znaju unaprijed pričaju da je to već gotova stvar. Nemojte to raditi. Dajte mladima šansu. Doćemo u situaciju da mladi izađu napolje i da kažu dosta. Dokle ide ovakav način? Dokle ćete? Do kad? Na kraju krajeva, šta su postala javna poduzeća? Obiteljske firme. Imamo u jednoj, u ovoj firmi, ajmo dvoje zaposleno iz kuće, u drugoj javnoj ustanovi il firmi treće, pa hajmo tako. Ko želi da se bavi nekim poslovima, nek otvori svoj obrt, svoju firmu, pa neka radi. Šta ćemo ako se svi zaposle na budžet i u javna poduzeća? Pa privrednici ne mogu iznijeti sve to što se može podijeliti kroz plaće, kroz razne komisije ili ne znam šta. Ljudi, dajte se opametite malo. Meni je sramna, uopšte ovo što je meni došlo ovdje da ja glasam, ovaj uopšte prijedlog. Ne ulazim u kompetencije kandidata, ne želim. Ali na ovakav način uskraćivati rad na mjestima mladima je krajnje, krajnje nepošteno i bezobzirno. Ja za ovako nešto nikad, nikad, nikad neću glasati. I molim vas, uozbiljite se i dajte da pružimo šansu mladima i dajte da da počnemo da radimo u interesu građana, ne u interesu pojedinaca i interesnih grupa. Toliko od mene.

ANA PEJIĆ

Da li se još neko javlja od vijećnika za riječ? Vijećnik Omer Berbić, izvolite.

OMER BERBIĆ

Ja ću jako kratko. Podržavam što je Dragana rekla u smislu da zaista nema potrebe da, mislim, cijeneći, zaista cijeneći i čovjeka lično poznajem i veliki je gospodin naravno, i cijeneći njegove kompetencije, profesionalne, stručne, svake druge vrste kompetencija a vjerovatno ne postoji možda u ovom trenutku bolji čovjek za tu funkciju, ali je zaista bilo vrijeme da se napravi druga osoba koja ima jednake menadžerske sposobnosti ili bolje i da se da šansa mlađim ljudima, tako da ja ću ovdje pratiti stav svoje kolegice koja je to malo emotivnije iznijela, zato što oboje zaista smatramo da nije ovo način na koji treba da se radi. Eto.

ANA PEJIĆ

U redu, sljedeća diskusija vijećnik Mirnes Ajanović, izvolite.

MIRNES AJANOVIĆ

Šta je diskriminacija? Sve. Ja ovdje danas čujem direktnu diskriminaciju. Mora biti mlad. Ništa drugo, kvalifikacija, znanje, sposobnost, mora biti mlad. Direktna diskriminacija. To treba pobit stare ko kad su htjeli ono koronom, zabranjeno je bilo davat vakcine starijim, u uputama proizvođača, a ovi naši rednom, hajmo stariji svi od reda. To je diskriminacija. Ja bih razumio, ima neko bolji od ovog direktora. Ime i prezime, sposoban, kvalifikaciju, ovo ono, bolji. Ali ne diskriminacija. To je zabranjena diskriminacija. Ovo što sam čuje to je krivično djelo. Diskriminacija po radnom osnovu. Ne može on biti zato što je star, stariji. Mora biti neko što je mlad. Razumijem, trebaju mladi. Ali zar nema kvalifikacije, sposobnosti? Jel ima prijedlog? Ovdje se kaže nije to protiv tog čovjeka. Evo sad mi kažemo to ime, mi ljagamo tog čovjeka. Sad se dolazimo u poziciju, nikad mi kaže nećemo to dozvoliti, mora biti mladi. I taj čovjek sutra otiče u javnost. Otiče, mi glasali za nekoga et što je stariji. Nije korekno. Vrlo nekorekno. Čak sam relativno blag u odnosu na okolnost koju imam i koju čujem, nisam se htio javljati za ovo. Već smo jednom obrazložili, prošli ovu priču, rekli zašto je, gdje su protukandidati? Što se neko nije javio? Što nije javio se protukandidat sa 15 godina? 20, nema veze, ne može s 15. Pa još bolje je to, mlađi je. Volonter kakav. Evo s 20, 25, 30. S kakvim referensama pa da vidimo, da biramo. Rekli bi svaka čast profesore, doktore, ti jesi dobar, ali ima boljih. Nije. Nevalja što je star. Sram vas bilo zbog toga. To je diskriminacija. Ovo je krivično djelo. Ovdje treba poznati sad policiju, da evidentira ovo što smo rekli i da se po krivičnom zakonu procesuiru krivično djelo diskriminacije zabrani diskriminacije i po Krivičnom zakonu Bosne i Hercegovine član 145a. Direktno krivično djelo sad slušam. Ona, ako ne povuče ovaj svoj stav, ja predlažem pauzu i hajmo zvat policiju da evidentira ovo što je bilo i da se obavijesti tužilac. Nije smiješno, ba. Vidi oni se klebere. Njima je smiješno. Bukvalno se klebere. Pogledajte, dajte malo gdje je ovaj kamerman da ih pokaže? Klebere se. Vrš krivično djelo i klebere se. Oboje. Ne znam jel ovaj drugi. Ona jest. Evo i on kaže. Nije njih sramota što se klebere na ovo. Nisam uopšte htio da raspravljam o ovome. Nepotrebno. Ovo je trebalo da se raspravi prije, na Kolegiju, da mi evidentno dobijemo ako imamo nekakvog tog protukandidata i da raspravljamo o tome. Mi nemamo ništa. Imamo završenu stvar. Prošla procedura i prošlo Vijeće sad se radi samo o potvrđivanju provedene procedure. Ničega drugog. I neko ne valja jer je star. I opet ispade nešto privatno, ispade ovako, ispade onako. Dajte protukandidata. Imal ime protukandidata? Imate li vi Dragana ime i prezime danas stručnjaka kojeg ćemo metnut tu? A onda bi možda i mogli reći nije krivično djelo. Ja nisam čuo ime. Možda nisam primijetio da je ime. Ja, dok sam slušao, nisam čuo ime. Samo mladi. Pa treba i umjesto vas staviti nekog mlađe tu umjesto mene, umjesto svih nas. Svako umjesto nas može biti mlađi. Jel to referensa? Jest potrebno. Treba ići ka mladima. Ne treba im spriječiti. A jel se kandidovao ko? Da smo mi imali kandidata sa referensama i rekli, jesi bolji, imaš sve bolje nego ovaj što je kandidat a mi izabrali ovog drugog sad, a onda bi rekli jesmo pogriješili. Stvarno jeste greška. I nije u redu. Prozovite nas. Mi nemamo protukandidata. Niko se ne javlja. Bar ja ono što sam evidentirao. Niko nije predložio. Nismo na Vijeću dobili prijedlog. I danas kad treba da ne bude ponižavanje čovjeka koji treba da bude izabran, imamo ovu priču. To je sramota, kaže, vi šta radite. A krivično djelo vrše. Prema tome, dajte da se definiše sad ovo šta ćemo. Ja ću, ako bude ovo potrebno, traži pauzu da zovemo policiju. Pa ubuduće se više neće niko zafrkavat s tim. Ne valja neko što je star ili ne valja neko što je mlad. Ne valja neko što nema kvalifikacije adekvatne da bude na tom mjestu. To hoće da sluša. I protukandidata. A to što je neko star ili mlad, to je krivično djelo ako neko insistira samo na tome. Hvala.

ANA PEJIĆ

Replika vijećnica Dragana Berberovića, izvolite.

DRAGANA BERBEROVIĆ GAGRO

Replicirala bi samo kolegi ovaj, jer očigledno ovaj, kao i do sada u svim momentima kada sam nešto govorila, sklon je izvrtanju činjenica ili očigledno ne čuje dobro, pa evo onda mu u tom slučaju ne mogu zamjeriti. Rekla sam da sam protiv imenovanja na direktorske i upravljačke pozicije u javnim poduzećima i u javnim ustanovama osobama koje su stekle uvjete za penziju. I da se time oslobađa radno mjesto za omladinu, za mlade i da im se daje šansa da imaju povjerenje u vlast, u sustav u kojem žive i da ne odlaze iz ove zemlje. Ja smatram da je to tako i stojim između toga, a ja bih vas zamolila, kolega, da se malo manje, da se suzdržite i da ne prijetite. Svako od nas ovdje ima svoj stav, a to što vi izvrćete stvari i okrećete u svoju korist apsolutno me ne interesuje. Skoro sam imala jedan verbalni napad od vas, pa preživjela sam ga, a opet ću preživjeti i ostalo.

ANA PEJIĆ

Replika, evo prije vas Mirnese samo rep...Može, izvolite, ispravka krivog navoda, Mirnes Ajanović, izvolite.

MIRNES AJANOVIĆ

Prvo, ja ne radim ništa u svom ličnom interesu. Šta to ja radim? Što sam kao predsjednik Komisije za ljudska prava Gradskog vijeća dužan da u svakoj situaciji, pa i sad, i van Vijeća branim pravo na ravnopravnost. Ništa drugo. Kako ja to radim u svom ličnom interesu? Nisam ja tam. Nikakve veze nemam s tim. Ali imam obavezu reagovati kad imamo evidentno djelo diskriminacije, kršenje Zakona o zabrani diskriminacije. Članova 2, 4, 6. Ne smije ni ustanova, niti bilo kakva institucija praviti, ni mi kao Gradskog vijeće ne smijemo praviti diskriminaciju. Ni po kojem osnovu. Ni po polnom, ni starosnom, bilo kojem a mi slušamo to. Imamo krivične zakone u svakom krivičnom zakonu. Od državnog preko entitetski Distrikta Brčkog gdje je zabranjena diskriminacija. A ovdje slušamo diskriminaciju. Je li ovo šta protupropisno? Bar smo raspravljali, ja sam vidio da nije. Što mi stavljamo čovjeka koji je mogao otići u penziju. Je li to zabranjeno? Ako je protupropisno, ne može. Ako nije protupropisno, ako smo raspravili na prošlim sjednicama, što onda pričamo danas? Evo sad sam vidio. Otišla je informacija u medije. Vijećnica je pustila informaciju u medije. Negdje je, evo, prezentirano. Vijećnica se usprotivila. Tuzla kaže stavlja penzionere. Što se k'o nije drugi prijavio? Zašto se ove stvari puštaju prije? Jel meni ovo nije logično nikako. Oni su većina. Šta vi radite iz većine? Šta vi radite iz SDP-a? Pa oni vas ponižavaju non stop ova njihova stranka. Uriniraju nemojte se ljutiti po svima nama, a pogotovo po vama. I mi puštavamo. Oni se klebere na ovo sve. Imal iko da kaže da nisam u pravu kad se radi o krivičnom djelu? Vi njih držite u vlasti. Što? Po kakvom interesu? (ANA PEJIĆ – Molim vas samo vodite računa o vremenu.) Kakav je njihov lični interes da budu u svemu ovome? Ovdje su lični interesi, a nije moj. I bespotrebno se ušlo u ponižavanje Vijeća i ljudi koji ne smiju biti ponižavani. Ovdje su radili koliko su radili, davali su doprinos ovome gradu. Davali sebe. I danas kad nije trebalo to, trebalo je prije to odraditi, danas se pravi skandal od nečega što ne treba biti skandal. Sramota.

ANA PEJIĆ

Replika vijećnik Emir Šahović, izvolite, pa Omer Berbić, replika.

EMIR ŠAHOVIĆ

Hvala predsjedavajuća. Ja ću se samo nadovezati na kolegu Mirnesa. Ja evo ovdje moram konstatovati da je ova odluka u skladu sa zakonom. Znači, Zakon o radu dozvoljava svakome, znači bez dobne granice, da obnaša direktorsku funkciju. Mi kao Gradsko vijeće evo kolega Mirnes, nek me ispravi znači, ako, ako griješim. Nemamo pravo da oduzmemo bilo kome njegovo zakonsko pravo. Znači, konkursna procedura je sprovedena. Kriteriji su jasno definisani u konkursnoj proceduri. Komisije su ocijenile kako su ocijenile. Prijavio se ko se prijavio. Čovjek ima zakonsko pravo da to obnaša. I mi nemamo pravo da osporavamo njemu njegovo pravo. Eto, toliko.

ANA PEJIĆ

Replika vijećnik, Omer Berbić, izvolite.

OMER BERBIĆ

Ma, mislim, ovdje je potpuno nepotrebno praviti ovakve reakcije, razumijem ja, naravno, sve je to politika, pa Mirnes ima svoj stil i ja ga cijenim i poštujem. Ali praviti krivično djelo od nečega što je politički stav je apsurd. Ako treba zvati policiju, prijaviti, eno dvojica policajaca, sjede tam nek' zapišu ljudi, nek' utvrde činjenice i da idemo fino naprijed sa životom. Ako je krivično djelo imat politički stav, ja ne znam da je ikada krivično djelo imat politički stav. Osim ako neko ne želi cenzuru. E, ako želi cenzuru, onda se vraćamo u doba komunizma. Pa da onda nemamo pravo ni na političke stavove, ni na to da žena fino kaže, nije zato kaže da se zapošljavaju ljudi koji su otišli u penziju, u mirovinu. Znači, šta je sporno tu? Neće da glasa ovdje, da se da saglasnost. I kaže to je diskriminacija. Ne. Mirnese, to je cenzura. Cenzura je zaustavljati političke stavove one koje ti se ne sviđaju. I ja to neću dopustiti. A ako misliš da ima elemenata krivičnog djela, evo ja ću prvi zvati policiju, evo pozivam dvojicu policajaca tu vani, nek zapišu ovo, pa da se tužimo, da vidimo jel krivičnog djelo ili nije. Ispašćemo smiješni na sudu. Mislim, nema potrebe da se ulazi u ovo. Ja se ne planiram više javljati na ovu temu. Jasan je politički stav, opet kažem, nemamo ništa protiv, bar ja nemam ništa protiv direktora, smatram da je čovjek zaista profesor, doktor, sve ono. Ali je možda bilo vrijeme da se napravi neko ko može preuzeti tu funkciju na isti adekvatan način, da to bude, ipak da ne idemo u ovo zapošljavanje ljudi koji su ispunili uslove za penziju. Eto, toliko o tome. Ja se ne planiram javljati ako sad, naravno Mirnes ne napravi nešto skandalozno.

ANA PEJIĆ

Replika Vijećnik Mirnes Ajanović, izvolite.

MIRNES AJANOVIĆ

Ja ne znam da li iko u državi postoji ko se više borio za slobodu izražavanja. Ali, moj magistarski rad je jedini na svijetu koji se bavio stavom 2. člana 10. Evropske konvencije sprečavanje zloupotrebe slobode izražavanja. Mi ovdje nemamo situaciju da imamo protukandidata, da imamo nekog ko je eto i mlađi. Pa da mi imamo opravdanu reakciju

njihove stranke i napad na lice koje je pred nama da ga danas verifikujemo nakon procesa od više mjeseci koji je prošao. Nemamo. Nego imamo samo napad na to lice. Sloboda izražavanja je apsolutno zagarantovana članom 10. stav 1. Ustavom BH stav 2. tačka 2. gdje se Evropska konvencija primjenjuje direktno. Ali stav 2. pravi ograničenje slobode izražavanja. Ovdje nije u pitanju politički stav u smislu imamo mi to i to ime mlađi je. Predložen je kao kandidat. Ima referense i bolje nego ovaj ili ne mora imat bolje. Eto, mlađi je. Mi nemamo ničega. Imamo samo napad na osobu zato što je stariji. Nije to politički stav. To je nedopuštena diskriminacija. To je krivični zakon, definisao i BH član 145a i ostali, da je to za-bra-nje-no. Ne ovaj može, onaj ne može. Zabranjeno. Zabranjena diskriminacija. Postoji i Zakon o zabrani diskriminacije. Zakon se zove Zabranjujem diskriminaciju. Postoji član 6. u zakonu koji definiše zabranu institucijama da vrše diskriminaciju. Pa i Gradskim vijećima i ostalim, bilo kojem nivou. Ne smije se vršiti za-bra-nje-no, ne politički stav, zakonom zabranjeno. I na kraju krivično sankcionisano. Ovi policajci to vjerovatno napolju i ne znaju. Hajmo zaista napraviti pauzu da policajci uzmu izjave da obavijeste dežurnog tužioca da vidimo je li ovo politički stav ili je ovo direktno kršenje zabranjene diskriminacije. Da provjerimo. Evo ne moram ja biti u pravu. Neka se odrede je li ovo kršenje Zakona zabrane diskriminacije i krivičnih zakona u Bosni i Hercegovini zbog toga što se ide direktnim napadom na jednu osobu bez argumentovanog političkog stava u smislu da postoji protukandidat. Da postoji protukandidat, jest politički stav. Ne postoji protukandidat, napada se osoba zato što je star. To je zabranjena diskriminacije i to je po meni krivično djelo. Predlažem, ako imamo dilemu jesam li u pravu ili nisam da se napravi pauza, obavijesti policija oni će morati obavijestiti dežurnog tužioca. Da se provjeri je li ovo politički stav ili je i vršenje krivičnog djela. Još jednom, da postoji protukandidat imaju pravo na to. Ne postoji protukandidat, napadaju osobu zato što je star. Nije to samo Zakon o zabrani kršenje tog zakona. Nije to samo kršenje krivičnog zakona. Sramota je to.

ANA PEJIĆ

Ispravka krivog navoda, vijećnik Omer Berbić, izvolite.

OMER BERBIĆ

Fala ljepo. Pa evo ovo što moj kolega Mirnes govori onda je najbolje da mi ove uopšte ne usvajamo ove Odluke o davanju prethodne saglasnosti nadzornom odboru. Pa što će nam? Evo provedena procedura. Pa što će nam onda uopšte stav Gradskog vijeća oko toga da li mi prifatamo kandidata ili ne prifatamo ili kandidatkinju zavisi od kojeg javnog poziva. Što će nam? Evo ima sve završeno. Gradsko vijeće ne smije da kaže svoj stav ni po čemu. Pa onda Gradsko vijeće ne treba da postoji. Evo ovo uopšte, dajte molim vas Slađo ako ima mogućnost da ove odluke uopšte da ne dajemo mi predhodne saglasnosti. Jel ima to u zakon? Ako ima jel mora dat Gradsko...Onda Gradsko vijeće ima mogućnost da da predhodnu saglasnost na imenovanje. I Gradsko vijeće mora dat predhodnu saglasnost na imenovanje. I svaka politička stranka ima pravo na svoj stav da li taj čovjek izražava političke stavove te stranke. Ili vrijednosti. Ne političke stavove, vrijednosti. Moja greška. Onda, ako već imamo mogućnost da kažemo svoj stav, mi ćemo ga jasno reći. A to sad, što ćete vi probati izvrnuti činjenice stvarno nije do nas. I evo ne moramo praviti nikakvu pauzu. Dvojica policajaca su tu. Znajuju sve činjenice. Sad ste upravo rekli da oni možda ne znaju. Ljudi su sve čuli. Mogu da naprave zapisnik. Ako treba, izaćemo vamo ja ću prvi dati izjavu. I nek obavijeste dežurnog tužioca i da idemo dalje. Mislim, jasno je da će ovdje biti apsolutna većina za ovu tačku. I ovaj, ovo je sad zaista bespotrebno trošenje resursa i vremena svi nas. Jer ovaj, možemo ovako ići u dubiozu. Ja naprijed, vi nazad. Eto, toliko. Fala ljepo.

ANA PEJIĆ

Nastavljamo dalje sa diskusijama. Vijećnik Mensur Mujezinović, izvolite. Možete samo mikrofon Mensure?

MENSUR MUJEZINOVIĆ – vijećnik Nezavisne liste „Sloboda“

Ovaj samo ja kako znam da je Jasmin Ferizbegović izabran 2025. godine za predsjednika Veterinarske komore Federacije onda ne vidim zašto ne bi mogao biti ponovno direktor na četiri godine izabran.

ANA PEJIĆ

U redu sljedeća diskusija, vijećnik Nedžad Jusić, izvolite.

NEDŽAD JUSIĆ

Okej, ja ću nakratko vezano kolega Emir je dosta toga rekao. Svatko ima pravo da glasa na Vijeću, onako kako misli da glasa. To je bez daljnjeg. Možda bi i ja ušao u neku diskusiju da smo imali dodatno još kandidata za ovu poziciju. I mislim barem, ali možemo izvući pouku iz ove diskusije, iz ovog svega. Možda za i za naredni period treba ljudi da se prijavljuju jel zašto dajemo prethodnu saglasnost koliko reče kolega Omer da je to već neko čuo da će to već biti završeno. Znači ovdje raspravljamo o ovom svemu da li će biti i da li neće. Ja bi volio da je bilo još dva, tri kandidata za ovu direktorsku poziciju i da onda raspravljamo na kraj krajeva da li je ili nije nadzorni odbor pravilno ocjenio i postupio. A kolega Emir je rekao ipak viši zakonski akt reguliše Zakon o radu koji je dopustio tu mogućnost, tu mogućnost možda u nekom narednom periodu onaj tko želi da pokrene određenu inicijativu ka višim nivoima vlasti da se izmijeni taj zakon i onda ćemo mi morat poštovat taj zakon. Ja ću glasati za ovu odluku. Hvala.

ANA PEJIĆ

U redu. Sljedeća diskusija, vijećnik Zlatan Mehmedović, izvolite.

ZLATAN MEHMEDOVIĆ

Pa evo i ja pozivam za kraj ali da smirimo malo situaciju. Ako mene lično pitate ja sam uvijek više za ograničenje mandata a ne za diskriminaciju po tipu godina. Ko nam ovdje može reći da naša Svjetlana nije dobar vijećnik a znamo da je ili Mensur naš da nije dobar vijećnik kada imaju godina i da su u penziji ili mirovini. Tako da nisam ja apsolutno onaj da godine budu kriteriji i da ocjenjuju nečiju sposobnost. Shvatam šta je Dragana htjela da kaže ali moram reći da jednostavno zakon je danas takav da ne dozvoljava jel diskriminaciju po tipu godina. Konkurs je bio javan, transparentan uslovi su bili jasno definisani i evo prijavio se jedan kandidat koji ispunjava sve zakonske uslove i tako da mislim da Vijeće jednostavno nije možda adresa koja treba da ispituje kandidate po ovim uslovima godina. Dakle danas ne biramo između više kandidata jednostavno biramo i da li ćemo omogućiti kao Vijeće da institucija funkcioniše ili ćemo je ostaviti bez rukovodstva. Dakle činjenica da je kandidat u penziji opet ponavljam nije pravna prepreka zakon to dozvoljava a u sektoru kao što je veterinarsvo ili medicina iskustvo je prednost uvijek a ne mana. Svi mi idemo starijem doktoru ovaj, vjerujemo u iskustvo tako da ne možemo govoriti ovde da čovjek znači, nema

kompetencije ili da nije sposoban za poziciju na kojoj jeste. Dakle, naša odgovornost SDP-a je stabilnost i zakonitost rada institucija i smatram da je imenovanje u ovom slučaju i racionalna i odgovorna odluka i u svakom slučaju ćemo to podržati. Hvala.

ANA PEJIĆ

U redu. Replika, vijećnik Omer Berbić, izvolite.

OMER BERBIĆ

Fala ljepo. Mislim ja moram ovdje doktoru replicirati jer je neke stvari rekao što mi nismo rekli i mislim da je nekorektno da se sad tu povlače neke paralele. Mi kao Gradski vijećnici nismo izvršne funkcije. Mi ne radimo dnevne poslove od 8 do 4. Isto tako upravni nadzorni odbori nisu izvršne funkcije. Nit oni rade dnevne poslove od 8 do 4. Pa ko bi ja bio da kažem da Svjetlana ili Mensur ne rade dobro svoj posao kao vijećnici ako je moj djed bio u Skupštini kantona kad je imo 78 godina. Znači bio bi licemjerman. On se jest povukao nakon u trećoj godini mandata za nekog mlađeg. Prepustio poziciju tad Amri koja je imala 30 i kusur godina. Mislim da je i to korektno. Ali to je naravno lični stav. Ali što se tiče izvršnih funkcija i ovih funkcija o kojoj mi sad govorimo ovo nije ni zakonodavna ne znam kako bi je nazvao. U jednu formu, u jednu ruku jeste zakonodavna. Je velika razlika u nivou odgovornosti i nivou dnevnog rada. E iz tog razloga mislim da nije korektno da se sad tu povlače paralele. Et. Jedino tu sam se javio. Više je ispravka krivog navoda nego ovaj, nego, nego...

ANA PEJIĆ

U redu. Idemo dalje sa diskusijama. Vijećnik Mirnes Ajanović diskusija, izvolite. Molim vas samo Omere mikrofon ugasite.

MIRNES AJANOVIĆ

Zamislite, zamislite situaciju. Dakle ovdje je rečeno ne valja čovjek jer je star. Nema protukandidata. Nema nikoga. Nego ne valja jer je star. Zamislite kad bi rekli vi ne valja i ne može neću glasati jer je Srbin. Jer je Rom. Jer je Hrvat. Bošnjak. Nema protukandidata. Zakonski može. A zamislite kad bi neko izašao sad za Vijeće da diskutuje to. Kakav bi to skandal bio. Jel može iko zamisliti strahotu takvog slobodnog izražavanja. Ne može on jer je to. Je li mogu da shvate ovi iz njihove stranke šta su uopšte uradili. Ne mogu. U tome je problem što oni to ne mogu. Znaju se kleberiti. Ali ne mogu da shvate šta su izgovorili. Pogledajte. Zakon o zabrani diskriminacije član 2. Diskriminacijom će se u smislu ovog zakona smatrati svako različito postupanje uključujući svako isključivanje, ograničavanje ili davanje prednosti utemeljena na stvarnim ili postavljenim osnovama prema bilo kojem licu ili grupi lica i onima koji su s njima u rodbinskoj ili drugoj vezi na osnovu njihove rase, boje kože, jezika, vjere, etničke pripadnosti, invaliditet, starosna dob. Stoji i dalje nacionalnog, socijalnog. Stoji i starosna dob. Omere, zabranjena diskriminacija. Niste smjeli lice diskriminirati zato što je star. I starosnu dob njegovu pozivat. Član 2. Dalje član 3. razrađuje kakvi su to oblici diskriminacije. Član 4. Da je to uznemiravanje. Član 5. Izuzetci. Zakonske mjere i radnje neće se smatrati diskriminacijski, ali se svode na nepovoljno razlikovanje i različito postupanje ako su zasnovane na objektivnoj i razumnoj opravdanosti. To je ono što sam govorio. Da je postojao protukandidat mlađi, kvalifikacije dobre, tad bi mogli napast ovog. Vidi dajete onome zato što je stara a ovoga diskriminirate. Dakle, zakon samo tu predviđa izuzetak. Nigdje više. Član 6. Oblast primjene. Ovaj zakon primjenjuje se na

postupanje svih javnih tijela na nivou države, entiteta, kantona, Brčko Distrikta, opštinskih institucija i tijela. Dakle i nas. Piše pod A. U zapošljavanju, radnim i radnim uslovima. U više članova piše zabranjena diskriminacija po starosnoj osnovi. U radnim odnosima. Ne smije ni Vijeće to raditi. I oni to rade. Njihova stranka to radi. Još se opravdavaju nešto. Još ko mi ne valjamo, još nas treba da bude sramota. Ja za njih više nemam riječi da kažem šta. Šta im više reći? I za ova Gagro izađe. Neće dama da sluša. Hoće okaljati čovjeka, napasti čovjeka. Poniziti ga zato što je star. A neće da sluša. Ode ona tam pričat na telefon, davat izjave. To su sramote, ovo što se radi i od njih je sramota. I njihova stranka i ovaj put je pokazala svoju sramotu. U svemu onome što su radili, neću sada ponavljati, ali su nas sve doveli nepotrebno, potpuno nepotrebno u ovako stanje današnje rasprave. I nanjeli su ogromnu štetu čovjeku kršeći Zakon o zabrani diskriminacije po više osnova.

ANA PEJIĆ

U redu, poslovnička vijećnik Mensur Alić, izvolite.

MENSUR ALIĆ – zamjenik predsjedavajućeg Gradskog vijeća Tuzla, vijećnik Tuzlanske alternative

Evo da, ako možemo da malo prekinemo sa replikama i ispravka krivih navoda i ostalo sve. Evo zbog, danas smo se dogovorili, jutros na Kolegiju, da danas ubrzamo rad Gradskog vijeća zbog Ramazana i zbog ljudi koji poste. Međutim, mi smo, evo, krenuli u nekom pogrešnom smjeru. Mislim da se treba, moje mišljenje je da treba ovo zaustaviti, a ja ću samo da podsjetim vijećnike i vijećnice da je na desetoj redovnoj sjednici Gradskog vijeća Tuzla održano 29.8.25-te godine i nastavku sjednice održano 15.9.2025. godine pod tačkom 11 razmatrana i usvojena Odluka o davanju predhodne saglasnosti Nadzornom odboru javnog preduzeća Gradske veterinarske stanice d.o.o. Tuzla za imenovanje vršioca dužnosti direktora. Samo da podsjetim da je ovo Gradsko vijeće dalo saglasnost. A sad što je se taj isti pojavio na konkursu, a nema nikakvog drugog, mislim da mi ulazimo u raspravu koja ne vodi ničemu. Ja bi vas zamolio sve kolege i kolegice da pokušamo ovo malo da spustimo na zemlju i da idemo ka nastavku sjednice da završimo u najkraćem roku što možemo. Zahvaljujem. Ovo je bila poslovnička.

ANA PEJIĆ

U redu, ispravka krivog navoda vijećnik Omer Berbić, izvolite.

OMER BERBIĆ

Ispravka krivog, pa onda replika. (ANA PEJIĆ – Izvolite.) Kaže, moj drug Mirnes da se mi nekom opravdavamo. Nikad i nikome se nećemo opravdati zato što imamo politički stav da trebaju mlađi ljudi doći na funkcije koji su ujedno i kompetentni i istručni za ono što imamo. I nemojte, molim vas, da bilo šta što smo mi danas ovdje rekli smatrate opravdanim. Nikada nikome se za ovo nećemo pravdati. Ovo je politički stav koji je legitiman i u potpunosti u stavu sa vrijednostima za koje se mi ovdje zalažemo. Sad, zato što vi vidite, u tom diskriminaciju to je potpuno vaša stvar. Slobodno imate mogućnost da nas tužite, prijavljujete policiji šta god želite. A mom drugu, odnosno kolegi gospodinu Aliću moram da kažem, to što se neko izabere za VD, to je pravni vakum gdje se neko mora izabrati za VD do končanja postupka. Ja jesam glasao da on bude sadašnji direktor. Opet

kažem, ne sumnjam u stručnost, kompetentnost gospodina, ali mislim da smo i on i mi zajedno s njim trebali da odgojimo novu generaciju menadžera veterinarske stanice. Kada smo izabrali za VD, mi smo smatrali da će nakon provođenja postupka zaista doći neko ko nije u penziji, mirovini. Eto toliko i ja ću sad stvarno zaustaviti se, neću se više ni replicirati ni ispravljati krive navode, pa da možemo ovu tačku završavati. Očigledno ima politička volja da se ovo izglasa i to je nama sasvim legitimno. Eto.

ANA PEJIĆ

Replika, vijećnik Mensur Alić, izvolite.

**MENSUR ALIĆ – zamjenik predsjedavajućeg
Gradskog vijeća Tuzla,
vijećnik Tuzlanske alternative**

Ja moram kolegi odgovoriti samo da moje iskustvo i moje provedeno vrijeme i godine u ovom Gradskom vijeću Tuzla dobro poznajem kad se bira VD direktor i da svaki put kad nastane vakum da se mora izabrati VD direktor, da ne bi došli u fazu da nema direktora u jednoj javnoj ustanovi i javnog preduzeća. To znam, prema tome to mi ne možete stavljati da ne znam za to. Možda ćeš ti sad ispraviti kriv...ovaj, (ANA PEJIĆ – Molim vas bez dobacivanja.) reći krivo, ispravka krivog navoda, možda će reći ali u tom si dijelu išo tako. Ja dobro se razumijem u te stvari. Prema tome, zbog čega i zašto posle kad je izabran za VD direktora, nije niko prijavio, to meni nije jasno. Gdje su toliki stručnjaci iz veterine koliko imamo na području grada Tuzle, ne samo grada Tuzle, imamo i na kantonu čitavom gdje ima svako pravo da se prijavi. Da se niko nije prijavio, to meni nije jasno. I zato kažem, kad je jedan kandidat, onda mi raspravljamo ovdje samo, evo, bacajući možda nepravdu prema tom čoveku koji se prijavio sam. Evo, jer se zna o kome se radi. Mislim ne možemo mi sakriti sad, jedna je osoba sama. I to nije dobro. A ja se slažem s vama da treba mlade birati. Ali gdje su? To meni nije jasno. Zbog čega se niko nije prijavio? To nikako ne mogu da shvatim. A nije nikom zagarantovan da će biti direktor iako je VD. Nije zagarantovano. E sad da imamo mi ovdje ocjene jednog kandidata, drugog kandidata, trećeg kandidata, onda bi mogli diskutovati o svakom kandidatu. Ja sam za takve stvari da se rade. Ali pošto se niko nije prijavio, onda mi samo gubimo vrijeme i, nažalost, nanosimo štetu a uvijek smo nekak govorili da nikako i kad su odlikovanja, onaj i ostalo da ne pominjemo ljude po imenu i prezimenu jel im samo naštetimo u njihovom privatnom životu. Zahvaljujem.

ANA PEJIĆ

Zahvaljujem se. Idemo dalje sa diskusijama. Vijećnik Senad Mehmedinović, izvolite.

SENAD MEHMEDINOVIĆ

Eh, ovaj vakum ne bi bio da je onaj zaključak koji je predložio Klub vijećnika NL „Sloboda“ da se primjenjuje. A to je da nadzorni odnosno upravni odbori na vrijeme raspišu konkurs i donesu odluku. Ne treba biti puno pametan za te stvari. Što se to ne radi, mi opet možemo da otvorimo tematsku sjednicu po tom pitanju zašto članovi upravnih nazornih odbora ne rade svoj posao ili oni ne znaju da su mandati na četiri godine. Prihvatam i to. Možda ljudi ne znaju, evo članovi su upravnih nazornih odbora. Dakle, vakum se neće stvarati ukoliko upravni odbor ili nazorni odbor na vrijeme raspiše konkurs i onda bez problema ne bi došli u situaciju da se imenuju VD osobe. Dalje, ja razumijem izlaganje kolegice, razumijem naravno

izlaganje i Mirnesa i mislim da u jednom dijelu kolegica možda se samo loše izrazila u smislu poređenja mladih sa starim i mislim da je tu bila jedna greška. Dakle, godine ne smiju da budu diskriminativni faktor. I Mirnes je evo sad to citirao iz zakona, a ja sam to mislio da kažem to bi se dovelo isto u situaciju ukoliko mi na osnovu nacionalnosti radimo imenovanje direktora, odnosno kažemo da taj i taj nije dobar za tu poziciju zato što je određene nacionalnosti. Većina vijećnika je rekla ono što sam ja planirao da kažem, a to je da sa zakonskog aspekta nema nikakvog osporavanja za imenovanje. Druga stvar, mi nemamo prijedlog više kandidata, znači nemamo ni izbor da biramo između dva ili više kandidata. Dalje, većina, većina u vijeću bi bilo dobro da se hajde da ne kažem uozbilji, nego postoje stvari šta znače politički dogovori i šta znače smjernice rada u mandatu, tom i tom. Znači ne želim da držim ja ovdje predavanja bilo kome ne pada mi na pamet, ali kada se imenuje, kada se formira nova većina donese se set stvari za koji će se ta većina zalagati i znamo mi kako ide to po evo imenovanju direktora. Što se to pokazalo na izboru direktora Mejdana da se u većini niko ništa ne pita to je opet stvar većine, nije to stvar ljudi vamo iz opozicije ili evo da kažemo mi za sebe da smo prijatelji većine. Znači to nije naš problem, to je vaš problem koji se donosi ovdje na Vijeću i ovdje smo imamo čistu odluku i trebamo da se izglasi ko kako želi. Znači ja nemam apsolutno problem i poštujem i različite političke stavove naravno poštujem da se mladi favorizuju da nam dolaze mladi i apsolutno nemam problem s tim. Međutim danas ovdje imamo situaciju prijedlog jedne osobe i ja sam kad smo raspravljali na konkursu kad je bio rekao spram onih kompetencija i ono što je bilo poslano tad da je ono vidi se izbor u zvanje Emertusa na osnovu kompetencija i razgovarao sam prošli put sam iznosio svoje mišljenje po tom pitanju ali ovdje imamo čistu situaciju, imamo jednog kandidata i godine ne smiju da budu diskriminirajući faktor mi možemo govoriti o tome da trebaju mladi ljudi da dođu, ali ne smijemo da govorimo pogriješili smo zato što neko ima sad više godina tu treba voditi računa kada se govore neke stvari tako da što se tiče Kluba vijećnika NL „Sloboda“ mi ćemo ovo da podržimo.

ANA PEJIĆ

U redu ispravka krivog navoda vijećnica Dragana Berberović, izvolite.

DRAGANA BERBEROVIĆ GAGRO

Ja bih stvarno ako može da završimo ovu temu ono što sam rekla i molila bi da mi se ne izvrću riječi ne pričam kineski, znači dobro sam rekla nije stvar godina nego je stvar da je ta osoba stekla mirovinu ili ispunila uvjete za mirovinu i nemojte da izvrćete moje riječi kako se kome sviđa ne sporim da osobe koje su u mirovini ne mogu da budu u upravnim nadzornim odborima ne mogu da budu stručni savjetnici, eksterni dobavljači ili ne znam šta, ali sam to isključivo rekla radi ostavljanja radnih pozicija mlađim osobama koje treba da dobiju šansu. I nemojte, molim vas, da izvrćete riječi to nikako nije niti, niti, niti lijepo, niti moralno, niti etički. Svoje stavove iznesite i ja ću da ih saslušam a gluposti koje neko priča ili ne znam, optužbe koje valja ne želim uopšte da slušam jer to mi vrijeda inteligenciju i zato ću svaki put da izađem odavde.

ANA PEJIĆ

Replika, vijećnik Senad Mehmedinović, izvolite.

SENAD MEHMEDINOVIĆ

Prvo je sad neumjesno ovo što je kolegica rekla. Znači, predsjedavajuća, ovo je sad i vama. Znači, ne može se ovdje govoriti jel neko priča gluposti ili ne priča gluposti i ja mislim da u ovoj sali mjesto nije za takav vokabular. Drugo, ako neko treba da počne da pije ginko bel, nije ni to problem. Znači, ima snimak pa da se presluša. Dakle, ja ništa nisam rekao zlo namjerno. Znači, samo sam rekao dobro namjerno da se u kontekstu objašnjavanja ove situacije malo zapetljalo. I to je to. Zato molim Vas da se vodi računa ovdje prije svega šta se govori, kako se govori. Ako se ne zna iznijeti ono što se misli, papir sve trpi, neka se napiše, neka se iznese i onda nema apsolutno problem. Evo, treba preslušat ovu sjednicu Vijeća i u jednom trenutku je zaista bilo da se aludiralo na čovjeka koji treba da bude izabran. Tačka.

ANA PEJIĆ

Replika, vijećnik Omer Ber...(ADMIR HASANBAŠIĆ – Poslovnička.) Izvolite, poslovnička Admir Hasanbašić.

ADMIR HASANBAŠIĆ – vijećnik Tuzlanske alternative

Tražim ispred Kluba Tuzlanske alternative tražim pauzu 5 minuta.

ANA PEJIĆ

Može. Dajem pauzu od 5 minuta.

(Pauza.)

Pozivam vijećnike da uđu u salu kako bismo nastavili sa radom sjednice.

Nastavljamo sa radom sjednice.

Stavljam...Molim vas samo za koncentraciju.

Stavljam na izjašnjavanje prijedlog Odluke o davanju prethodne saglasnosti Nadzornom odboru Javno preduzeće Gradska veterinarska stanica d.o.o. Tuzla za imenovanje direktora društva I molim vas da se izjasnite. Measure niste glasali. Glasanje je okončano.

Konstatujem da je pročitana odluka usvojena sa,
20 glasova za, 1 protiv i 3 suzdržana.

Prelazimo na sljedeću tačku dnevnog reda:

RAZMATRANJE I USVAJANJE ODLUKE O UTVRĐIVANJU PRIJEDLOGA KANDIDATA ZA IMENOVANJE NA UPRAŽNJENA MJESTA ČLANOVA NADZORNOG ODBORA IZ REDA DRŽAVNOG KAPITALA U JAVNOM PREDUZEĆU RAZVOJNO-PODUZETNIČKI CENTAR TUZLA – „INKUBATOR“ LIPNICA D.O.O. U TUZLI ČIJI JE OSNIVAČ GRAD TUZLA

Predlagač je gradonačelnik Grada Tuzla.

Obrađivač je Služba za ekonomski razvoj poduzetništvo i poljoprivredu.

A materijal su razmatrali Komisija za statutarna pitanje i propise, Komisija za ekonomske odnose, Komisija za poduzetništvo i Klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji Komisija?

Otvaram raspravu Klubova vijećnika.

Zatvaram raspravu Klubova vijećnika.

Otvaram raspravu vijećnika.

Zatvaram raspravu vijećnika.

I stavljam na izjašnjavanje prijedlog Odluke o utvrđivanju prijedloga kandidata za imenovanje na upražnjena mjesta članova nadzornog odbora iz reda državnog kapitala u Javnom preduzeću Razvojno-poduzetnički centar Tuzla – „Inkubator“ Lipnica d.o.o. u Tuzli čiji je osnivač Grad Tuzla i molim vas da se izjasnite. Glasanje je okončano.

Konstatujem da je pročitana odluka usvojena sa,

22 glasa za, nije bilo protiv i 2 suzdržana.

Prelazimo na sljedeću tačku dnevnog reda:

RAZMATRANJE I USVAJANJE ODLUKE O DAVANJU PRETHODNE SAGLASNOSTI NA ODLUKU UPRAVNOG ODBORA JAVNE USTANOVE ZA PREDŠKOLSKI ODGOJ I OBRAZOVANJE „NAŠE DIJETE“ TUZLA O VISINI IZNOSA PARTICIPACIJE KORISNIKA USLUGA SA KRITERIJIMA ZA UMANJENJE

Predlagач je gradonačelnik Grada Tuzla.

Obrađivač je Služba za ekonomski razvoj, poduzetništvo i poljoprivredu i Upravni odbor Javne ustanove za predškolski odgoj i obrazovanje „Naše dijete“ Tuzla.

Materijal su razmatrali Komisija za statutarna pitanja i propise, Komisija za ekonomske odnose, Komisija za mlade, obrazovanje i sport i Klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izjaštaji Komisija?

Otvaram raspravu Klubova vijećnika. Vijećnik Omer Berbić, izvolite.

OMER BERBIĆ

Fala ljepo. Po meni ova vrsta subvencije koju mi trenutno imamo prema Javnom obdaništu „Naše dijete“ nije pravi način da se ide naprijed. Zašto ovo govorim? Mislim da je realno da cijene svugdje budu tržišne, a da mi subvencioniramo djecu bez obzira bilo javno ili privatno obdanište, javni, molim vas predsjedavajuća dok ja razgovaram, mislim nekorektno od kolege da hoda dok ja pričam. Molim vas poslovnikom ovo je definisano, ne bi on smio to da radi. Poštujte poslovnik, vi se na njega pozivate. Prijatelj s povlasticama. Mislim da bi mi kao Grad Tuzla trebali subvencionirati djecu umjesto obdaništa i da je to pravi put naprijed, zato što ni u „Naše dijete“ ne mogu ljudi nekada da dođu na red, pa su primorani da idu u privatne vrtiće gdje onda plaćaju punu cijenu. Ali ja ovdje govorim u ime Kluba i Klub Naše stranke neće podržati ovu odluku. A neće podržati odluku iz dva razloga. Prvi sam sad obrazložio, mislim da ove vrste subvencija ne funkcionišu najbolje u praksi. A drugo, takođe smatramo kao što je i kolega Mensur Mujezinović napisao prije 3-4 dana da je ovo temelj budućnosti grada i citirat ću kad svaki vijećnik koji digne ruku za ovo povećanje mora znati da glasa za dodatni finansijski pritisak na roditelje i mlade porodice i napisao je ne u mojem ime i ja to poštujem, nadam se da će i ostatak Kluba imati sličan stav, ali kao što predsjednik Kluba kaže da je on prijatelj većine, pa vjerovatno prijatelj s povlasticama, moguće da jedan

dio Kluba neće imati sličan stav, nego da će se taj stav mijenjati vezano od tačke do tačke. Tako da, da li će se ovo usvojiti ili neće, ne zavisi od „Naše stranke“, zavisi od naravno svih ostalih u Gradskom vijeću, ali mi smo spremni u svakom trenutku sjesti i razgovarati o promjeni u modelu subvencija za vrtiće, ne samo javne, nego i privatne, i da onda idemo kao Grad u tom pravcu. Eto, fala ljepo.

ANA PEJIĆ

Replika, vijećnik Senad Mehmedinović, izvolite.

SENAD MEHMEDINOVIĆ

Ma eto opet treba vodit računa šta se govori i treba da sinhronizovan bude mozak i jezik. Nikakvih ovdje nema povlastica. Ovdje svako ima stavove koje može da iznosi onako kako on želi kao što to iznosi i Klub vijećnika „Naše stranke“ i mi nemamo apsolutno problem s tim. Neka ne bude krivo nekima kakve mi imamo stavove i neka ono što se ništa ne pitaju, prebacuju na druge. Znači ja apsolutno nemam problem s tim nikakav. I ja jesam prijatelj većine, jer ja ove ljude koji sjede u većini dugi niz godina poznajem i prije ovog Vijeća. I mogu i Omera nazvat prijateljem, jer kliknuli smo od prošlog saziva vijeća i okej su ovi politički stavovi, neka malo šaranja, idu izbori oktobarski. Kad se glasa za zamjenika predsjedavajućeg vijeća sad su jedinstveni stavovi, sad kad idu izbori sad nisu jedinstveni stavovi. I ja to razumijem u smislu političke trgovine. I promocije, pardon, ne trgovine. Ali govoriti stvari, da se neki benefiti ostvaraju to stvarno nema potrebe za ovom govornicom. Svako nek radi ono što misli da treba da radi. Meni je drago da evo u Vijeću se citira naš vijećnik. Naravno da imamo Klub, mi razgovaramo, mi pričamo. Nekad i unutar Kluba, a to na primjeru Naše stranke, najbolje možemo da vidimo da nisu saglasni po istim tačkama. I sad pazite se držite predavanja nekima drugima. Znači nemojte, svako nek iznosi ono što treba da iznosi. U Klubu može da bude mimoilaženja po nekim stvarima i to je sasvim opravdano. Isto košto je opravdano kod kolega iz „Naše stranke“ i nema potrebe za ljutnje. (ANA PEJIĆ – Vodite računa o vremenu samo replika je.) Emociju, emociju, emociju u politici treba ostaviti sa strane, a razum uključiti. Hvala.

ANA PEJIĆ

Replika, vijećnik Mirnes Ajanović, izvolite.

MIRNES AJANOVIĆ

Kolegi Senadu dakle, se pridružujem ovo što je rekao. Ja ću dodatno. Mi ovdje imamo danas vrlo neobičnu situaciju u nekoliko slučajeva. Djelovanje većine podrazumijeva većinu. Dakle, određeni politički subjekti su napravili neku većinu da bi mogli donositi komotnije odluke, da ne zavise od opozicije ili slično. Današnja većina zavisi od opozicije, ne zavisi od većine. A onda imamo situaciju gdje dio većine, koji samim time što je većina pa ima određene zasluge, privilegije, čak su i izabrani i za zamjenika predsjedavajuće itd. Dakle, postoje nekakve privilegije kada je neko u većini, vlast, sad napada većinu što će glasat za nešto što taj dio većine neće navodno da glasa. To je politički neozbiljno. Licemjerno. Sramota je to. Ja mislim ja da sam u većini prihvatio sam dogovor i godinu dana mi funkcionišemo i sad meni kaže problem je meni ovo donijeti. Neću ja ovo ba. Pa vi nevaljate, vi ste bože, sačuvaj ja dobar. Pa jel to fino u politici? Imal išta licemjernije u politici od tog? Nema. Ima kod njihove stranke. Niko to ne radi. Ja to nisam vidio da to neko radi negdje. To oni ko dobri al kad sutra bude

većina, oni su u većini ba, oni su vlast. Oni će tu bit zamjenici presjedavajućeg, svašta nešto. Zato Senad je ovo govorio. Pa nije to u redu. Jer išta se može razmišljati šta se govori kad se govori. Ili bar štititi. Evo odšutit će to. Da su odšutili i ja bi odšutio. I Senad bi odšutio. Ne bi ni pričali o ovom. Nosi teret većina ovoga što će glasat, nek' nosi. Ko hoće još usput da glasa ima razloge što treba i smatra da je treba il' ne treba. Što se oni prave dobrim a oni su ti koji u stvari nevaljaju jer su trebali danas izaći i reći. Vi iz većine ako ovo izglasate mi istog trenutka napuštavamo većinu jer nećemo više biti dio većine. Neće. (ANA PEJIĆ - Molim vas samo vodite računa o vremenu replika je u pitanju.) To neće uraditi a hoće zafkavati.

ANA PEJIĆ

Sljedeća diskusija, vijećnik Emir Šahović. Izvolite Emire. Svejedno, evo i Mirza je sljedeći za diskusiju tako da kako god. Mirza Malkočević. Ko će? Hajde, dogovorite se. Izvolite Emire.

EMIR ŠAHOVIĆ

Hvala. Pa evo, prije godinu dana otprilike smo počeli u neki proces, a to je da uslovi u obdaništima za djecu i za uposlenike budu bolji. To prije možda nešto manje od godinu dana i nije bilo toliko shvaćeno, ali evo ovo danas je rezultat tog procesa znači, koji je trajao evo nekoliko mjeseci i ono što nam je najviše bitno, bitno je da su djeca u našim obdaništima, „Naše dijete“ sigurna i da su u dobrim rukama. Znači slažem se ja da Grad Tuzla treba da tzv. jel odriješi kesu, da malo, malo više da, pa evo i to smo uradili u Budžetu za 2026 godinu, pa smo evo 3,2 miliona izdvojili za funkcionisanje obdaništa. Znači, a isto tako ujedno kroz to povećanje iz budžeta stvaramo mogućnosti za bolje uslove rada za odgajateljce i za medicinske tehničare koji nose najviše odgovornosti za 1300 djece svaki dan. I mislim da ne postoji roditelj kome bolji uslovi njegovog djeteta su skupi za 50 maraka više mjesečno. Također da bi funkcionisanje, da bi uslovi bili bolji i svi ovi tekući troškovi da bi bili bez problema, izmireni, znači, pored onog što Grad Tuzla izdvaja za funkcionisanje budžeta, nažalost je potrebno i znači, kroz povećanje ove participacije roditelja da bi se ti uslovi znači, zadovoljili. Znači, nekad su prije jel branili menadžment i od mene i od još nekih vijećnika misleći da mi imamo nešto lično protiv menadžmenta. U biti, evo sve što se izdešavalo, dovelo je do toga da, akobogda je li od danas obdanište „Naše dijete“ će komotnije raspolagati sa budžetom koji im je neophodan i da će uslovi biti bolji. Tako da pozdravljamo ovu odluku. Znači, treba nekad donijeti i tešku odluku ako ona donosi znači, nešto dobro. Tako da Klub Pokreta demokratske akcije podržava ovu odluku i podržat će. Hvala.

ANA PEJIĆ

U redu. Sljedeća diskusija vijećnik Mirza Malkočević. Izvolite Mirza.

MIRZA MALKOČEVIĆ

Hvala. Evo ovako prije svega sigurno jedan od najglasnijih vijećnika kad je bilo vezano za sigurnost naše djece u obdaništima i status odgajateljica i medicinskih sestara u obdaništima, moram reći da su naše pozitivne kritike ili sugestije urodile plodom i evo znamo da u proteklih par mjeseci imamo dosta stvari koje su se poboljšale u obdaništu, posebno vezane za sigurnost. I evo možemo reći da su, da u decembru, mislim do kraja decembra da su i sve odgajateljice prošle obuku prve pomoći, dobile certifikate, tako da je to jedna pozitivna praksa gdje mi svojim učešćem kao vijećnici dajemo neke prijedloge da bi poboljšali stanje u Javnoj

ustanovi „Naše dijete“. Moram se osvrnuti na jednu jako bitnu stvar, evo od kako smo ušli u Vijeće prošlo je malo više od godinu dana, gdje god smo imali neki problem, nije da smo imali saradnju sa nekim sindikatima, bar ne s već...ovo gdje sam ja do sad imao kontakte. Moram posebno da pohvalim sindikat koji je novoosnovani u Javnoj ustanovi „Naše dijete“, samostalni sindikat odgajatelja medicinskih sestara, to su hrabre odgajateljice medicinske sestre koje su izašle, što se kaže, na Megdan i borile se za djecu, borile se za svoja prava, za sigurnost prije svega djece i bolje uslove rada svih uposlenika, tako da njima puna podrška i oni su sigurno jedni od najzaslužnijih što sad se stanje u našem obdaništu, popravlja, ide na bolje, naravno Narod i pravda, Klub Naroda i pravde će podržati ovu odluku i samo ako nije problem da iskoristim već pošto smo već sugerisali vezano za sigurnost u svim objektima „Naše dijete“, samo jedan zaključak, ako nije, a vezano je za funkcionisanje izlaznih...Jel mogu Slađo? (SLAĐANA KRAJINA – Može.) Radi se o tome za funkcionisanje izlaznih vrata jer imamo informaciju da u nekim obdaništima vrata se otvaraju u kontra smjeru nego što je zakonom određeno, pogotovo protupožarnom zaštitom, pa ako može: Zadužuje se nadležna Gradska služba u saradnji sa upravom Javne ustanove „Naše dijete“ Tuzla da izvrši detaljnu provjeru svih izlaza i evakuacionih puteva u objektima...Poslat ću ti ba Slađo.(ANA PEJIĆ – Može, može.) odmah, evo na viber. U objektima ustanove sa posebnim osvrtom na funkcionalnost i ispravnost izlaznih vrata, smjer otvaranja vrata u skladu sa sigurnostim protupožarnim standardima, prohodnost evakuacionih puteva usklađeno sa važećim propisima iz oblasti zaštite od požara i zaštite na radu. Još jednom evo puna podrška i hvala.

ANA PEJIĆ

U redu. Sljedeća diskusija je vijećnik Nedžad Jusić, izvolite.

NEDŽAD JUSIĆ

Okej, hvala predsjedavajuća. Pa evo, kolege su dosta toga rekle. Ja ću podržati ovu odluku, ali prvenstveno zato što je to za dobrobit djece koja borave u obaništu i siguran sam u tome da će se njihovi uslovi poboljšati, a samim tim, s druge strane, ova poskupljenje prati niz drugih poskupljenja koja su je zadesilo kompletno društvo i mislim da je realno bilo, ali evo, Emir je dosta od toga govorio. Grad Tuzla izdvaja tri koma dva miliona maraka vezano za obdanište to je velika pozicija u Budžetu Grada Tuzle. Također ću napomenuti, zbog javnost i zbog drugih otprilike, za javni prevoz ide tri i po do 4 miliona maraka, a Budžet je 100 miliona maraka. Ipak svi smo ovdje, tražimo stalno neka nova rješenja, ulaganje u neke nove projekte i mislim da je ovo realno ovo poskupljenje i siguran sam u tome ovaj, a dobio sam informaciju i od nekih kolega, da su i određeni roditelji bili uključeni u ovu odluku i siguran sam u tome i nevjeroj da će i jedan vijećnik glasati protiv ovog, jel jednostavno ova odluka je za dobrobit djece grada Tuzle. Hvala.

ANA PEJIĆ

U redu. Sljedeća diskusija, vijećnik Senad Mehmedinović, izvolite.

SENAD MEHMEDINOVIĆ

Eh, hvala lijepo. Meni je prije svega prvo drago da na pretprošnoj sjednici Vijeća koja je bila, da je većina na prijedlog opozicije, to jest nas, skinula tačku dnevnog reda gdje je bio elaborat o povećanju cijena usluga. Zašto? Zato što se to kršilo sa Zakonom o predškolskom odgoju i obrazovanju i u tom smislu drago mi je kad sam vidio da u ovome elaboratu je to

skinuto, što znači da je obdanište postupilo po zaključku Gradskog vijeća. Sad, kada su pitanju neke druge stvari, ja ću dobronamjerno da kažem, kao što sam rekao i prošli put dobronamjerno i volio bi da se moje diskusije ne protumače različito od toga kako ja govorim. Mi imamo ovaj elaborat i ono što je meni zaparalo oko, a što prošli put nisam govorio jer nije bilo vremena jer smo to povukli, jeste ovaj podatak koji govore iz obdaništa koliko je obdanište „Naše dijete“ jeftinije u poređenju sa privatnim vrtićima. I ovo objašnjenje koje u dokumentu koje imamo je i metodološki problematično, pa mislim čak da je i u dijelu fiskalno obmanjujuće u analitičkom smislu. Nigdje se u dokumentu koliko sam ja mogao da pročitam ne spominje iznos od 3 miliona i 170.000 konvertibilnih maraka subvencije od Grada, što znači u stvari da roditelji u našem djetetu ne plaćaju punu cijenu usluge, nego plaćaju nešto što mi nazivamo participacija. Jedno je participacija, a drugo je ekonomska cijena usluge. I ovo što imamo ovdje nije dobro obrađeno i savjetujem menadžmentu da se ne vodi tim stvarima, jer obdanište „Naše dijete“ nije jeftinije u odnosu na privatne vrtiće, jer obdanište „Naše dijete“ ima subvenciju u iznosu od 3 miliona i 170.000 konvertibilnih maraka. Ovaj iznos od 3 miliona i stotinu sedamdeset, ako podijelimo na broj djece koji idu u vrtić, a to je 1.336, mi dobijemo da je to iznos od 2.372 konvertibilne marke godišnje po djetetu, odnosno 198 markica mjesečno po djetetu i iznos koji se participira sada od 200 maraka, on je izjednačen sa cijenama privatnih vrtića na nivou grada Tuzle. Tvrditi, je vjerujte mi, veoma ozbiljna stvar, tvrditi da ste 80 do 90% jeftiniji u odnosu na privatne vrtiće je neko kad pročita da se dobro zapita je li to moguće i šta se ovdje dešava. Savjetujem da se to u elaboratima, u izvještajima ubuduće izbaci, jer nema potrebe. Možemo pričati o ekonomskoj cijeni, o participaciji je to sasvim nešto drugo i nema metodološki, statistički, kako god hoćete, ne može se raditi ta komparativna analiza i to treba ubuduće izbaciti. Dalje, to smo prošli put govorili a ovdje nedostaje. Finansijska suština prijedloga. Znači, oko 62.000 konvertibilnih maraka će biti na mjesečnom nivou, hajde cirka što znači za 12 mjeseci je to otprilike 700.000 konvertibilnih maraka. Elaborat argumentuje potrebu za novcem, ali ne prikazuje model upravljanja tim novcem. I u vezi s tim ću predložiti neke zaključke, tipa rashodovnu strukturu po kategorijama, plan investicija, pošto vidimo da ima se problema dole sa objektima, sa voznim parkom i tako dalje i tako dalje. Dalje, mislim da je Služba za ekonomski razvoj zakazala, zato što nisu uradili svoj posao iz nadležnosti službe, koji kaže: Služba za ekonomski razvoj, poduzetništvo i poljoprivredu prati stanje i provodi utvrđenu politiku iz oblasti razvoja poduzetništva, poljoprivrede, obrazovanja i odgoja. Vršiti nadzor nad radom javnih ustanova i javnih i drugih preduzeća. Prati stanje, predlaže mjere i provodi utvrđenu politiku u oblasti predškolskog obrazovanja. Mi u tački 3 od strane službe imamo podatak gdje se zaključuje da je opravdano, jer je kaže obdanište „Naše dijete“ 88% jeftinije u odnosu na privatne vrtiće, a pritom navode subvenciju od 3.170.000 konvertibilnih maraka. Dakle, služba je imala podatak o subvenciji, ali ga nije uključila u komparativnu analizu. To je metodološki propust službe koja ne smije da dopusti ove stvari. Zašto? Zato što je samo radila po principu copy-paste. Prelazila je obrazloženje ustanove i samo ga potvrdila, bez obzira zanemarujući kakva je njihova nadležnost Službe za ekonomski razvoj i ja bih zamolio službu da ubuduće malo ozbiljnije prati rad javnih preduzeća, javnih ustanova iz njihove nadležnosti. I ovo što govorim je ono što je zapisano u dokumentima koji smo mi, koji smo mi dobili. Dakle, metodološki propust koji ne treba da bude. Shodno ovom što sam rekao, ja imam prijedloge nekoliko zaključaka Slađana koje ću vam sad dostaviti, a to je da: Gradsko vijeće Tuzla zadužuje „Naše dijete“, da u roku od 30 dana dostavi Gradskom vijeću detaljan finansijskih izvještaj koji sadrži strukturu ukupnih rashoda po kategorijama, iznos subvencije Grada po djetetu na mjesečnom nivou, projekciju prihoda od povećanja participacije i plan njihove raspodjele po kategorijama.

Pod dva, Gradsko vijeće zadužuje „Naše dijete“ da dostavi analizu stvarne ekonomske cijene i usluge po djetetu, uključujući zbir participacije roditelja i subvencije Grada radi potpune fiskalne transparentnosti.

Gradsko vijeće zadužuje „Naše dijete“ i nadležnu službu Grada da razmotre mogućnost uvođenja modela diferencirane participacije prema prihodima domaćinstva kako bi se zaštitile porodice sa nižim primanjima.

Gradsko vijeće zadužuje „Naše dijete“ da u roku od 60 dana dostavi trogodišnji plan investicionog i kapitalnog održavanja objekata, imajući u vidu da je većina objekata starija od 45 godina. I imam jedno dijete, prepostavljam da je direktorica ovdje pošto sam je vidio i volio bi da dobijem odgovor na to pitanje, a to je sad, obzirom da je planirana povećanje ove participaciji, jel to znači da će sad više sredstava od strane subvencije Grada Tuzla ostati obdaništu na način da se od te subvencije Grada Tuzla povećaju plate stručnim saradnicima, odnosno odgajateljima i koliko će se to povećati i ako mogu da dobijem odgovor na ovo pitanje na sjednici pošto nam je to bitno zbog glasanja. Hvala.

ANA PEJIĆ

U redu. Sljedeća diskusija, vijećnik Mirnes Ajanović, izvolite.

MIRNES AJANOVIĆ

Hvala. Da sam većina glasao bi za ovo. Radi korektnosti jeste i obaveze, i prihvaćanja (ANA PEJIĆ – Molim vas bez dobacivanja.) nečega što je i prihvatanja nečega što je timski rad, sve ostalo je anarhija, samovolja i svašta nešto. I zafrkavanje. Neću glasati samo iz razloga što sam i prije kampanje i u toku ovog Vijeća govorio da moramo to riješiti budžetski. Ne mogu uticati jer nisam većina da to promijenimo na taj način. Ali da je neophodno da se ovo uradi, jeste. Jer ne možemo dovesti djecu u stanje ugrožavanja ne egzistencije ali bilo kakvog smisla pa čak i ugrožavanja da im ne bude bolje. I to je ugrožavanje. Ako nešto može biti bolje, a mi ne damo, na neki način i time ugrožavamo djecu. Ako mogu imati bolje obroke, bolju sigurnost. Ovo nisam znao da Mirza što kaže, imaju i vrata koja se otvaraju suprotno propisima, što je vrlo opasno i ne smije postojati, to se mora odmah rješavati. Dakle, opet ih ugrožavamo, ako ne nudimo bolje uslove. Ja ne mogu sad mijenjati ovo stanje. Rekao sam i prije, neću glasati, da nisam rekao neću glasati, možda bih i glasao da nije bilo ovog danas, na početku ove prepirke, ne mogu sad, ne želim da odustajem od stava. Ali, ima i druga okolnost gdje mi možemo pomoći dosta roditelja koji, ne znajući i ova participacija, nešto veliki problem u njihovom prihodu. Čak oni će i svjesno i vidio sam po svemu, po reakcijama, veliki broj njih će i pristati da da nešto malo više, da bi djeca imala nešto malo bolje uslove u obdaništu. Ni to nemamo pravo uskratiti. Ali, s druge strane, imamo nekoga ko nema mogućnost. E, to je problem. I onda bih radije išao na ovu okolnost, pa predložiti ću zaključak, pa hajde procijenite, da zadužujemo gradonačelnika i Službu za budžet i finansije, da pa u saradnji sa JU „Naše dijete“ Tuzla, u okviru budžetskih mogućnosti, izvrše analizu i predlože model subvencioniranja cijene boravka djece u JU „Naše dijete“ Tuzla sa posebnim fokusom na ono što je objektivno. Porodice...Ne treba pisat. Poslat ću. Porodice sa nižim prihodima, porodice sa dvoje i više djece. Može se uvijek reći sad imate i u školama sad, pa je, naravno i uvijek i ovdje je vjerovatno ali možda možemo ići više ili troje, ali nebitno je. Samohrane roditelje. Tamo gdje imate jednog roditelja, mora biti subvencioniranje od strane Grada. Porodice u stanju socijalne potrebe. I on mora imati neku mogućnost, ne može sad da ne pošalje dijete jer nema para. Dakle, ne tog previše. I to možemo iz budžeta, ako ne možemo, sve možemo ovo. Roditelje djece sa poteškoćama u razvoju. Ima i te djece gdje možemo roditelju olakšati ili roditeljima i to. I da zadužimo službu, da dostavi Gradskom vijeću prijedlog konkretnijih mijeranja i finansijskih konstrukcije subvencioniranja kako bi se ublažio teret povećanja cijene boravka djece u vrtićima. Ovo je prijedlog zaključka. Procijenite, može li proći. Dakle, da mi imamo mogućnost da možemo one koji nemaju, a bit će pod teretom

ove odluke, riješimo na ovaj način. Nije to neki veći iznos, to se iz budžeta može podnijeti, a vjerujem da u toj situaciji ni ovi roditelji koji imaju taj novac da ga mogu doplatiti dodatno, nije to nešto preveliko, relativno je to i mali procenat. Ne bi oni bili ništa protiv i da ova kategorija djece sa roditeljima koji imaju ove određene poteškoće bude dodatno subvencionirana. Evo, ovo je prijedlog zaključka. Hvala.

ANA PEJIĆ

U redu. Replika, vijećnik Mirza Malkočević, izvolite.

MIRZA MALKOČEVIĆ

Hvala vam, predsjedavajuća. Replika, kolegi Mirnesu, ako je moguće samo da se nadovežem na ovo vaše, pošto smo mi već izglasali za porodice 3+, pronatalitetne mjere, možda samo da dodamo da imaju subvencije za porodice sa troje i više djece. I ja mislim da je ne znam samo koliko, prije koliko godina da smo imali platne razrede uvedene u obdaništima, gdje su imali roditelji koji su nižeg kako da kažem imaju niže pla...imaju niža primanja imali su prednost u obdaništima. Tako možda i taj dio da se razmotri, da se vrati taj model koji smo imali prije da bi im olakšali jer ako već subvensiramo da to ide ljudima koji nisu u mogućni da plate privatna obdaništa.

ANA PEJIĆ

U redu. Sljedeća diskusija, vijećnik Admir Hasanbašić, izvolite.

ADMIR HASANBAŠIĆ

Hvala predsjedavajuća. Pa evo, iz prethodnih izlaganja, kolega možemo zaključiti da je razlog povećanja participacije korisnicima usluge Javne ustanove obdanište „Naše dijete“ prije svega rast troškova života, a osnovni cilj je da se poboljšaju uslovi naše djece u tim vrtićima, a usluga je uvijek bila na visokom nivou, a nadamo se da će ovim još više stimulirati i ostale uposlenike. Međutim, ja ovdje želim istaći jednu stvar, a to je da razlog ove povećanje, povećanja participacije jeste i otvaranje novih vrtića. U zadnje četiri godine otvoreni su novi vrtići u Gornjoj Tuzli, Solin, Slavinovićima, ali želim reći da sam prije četiri godine pokrenuo inicijativu za otvaranje vrtića u maloj školi Javne ustanove Osnovna škola Simin Han i evo nakon četiri godine, prvog devetog ove godine, počinje sa radom vrtić obdaništa „Naše dijete“ i naziv je Leptirić, tako sam vidio na već anketi koja je poljepljena u i oko škole, i idu ankete prema našim roditeljima i građanima, i siguran sam da će postojati veliki interes za korištenje usluga ovog vrtića, a samim tim će se otvoriti vjerovatno i određeni broj praznih mjesta hajd da kažem u gradu, jer će neki korisnici usluga ostati gore u Simin Hanu, tako da će liste čekanja se vjerovatno, vjerovatno smanjiti. Inicijativa je realizovana i želim iskoristiti priliku da se zahvalim svim onima koji su pomogli da se ona realizuje prije svega gradonačelniku Grada Tuzle Zijadu Lugaviću, zatim Ministarstvu za raseljena lica i izbjeglice Federacije Bosne i Hercegovine, koja je izdvojila, mislim, 120.000 konvertibilnih maraka, vladi Tuzlanskog kantona, koja je dala na korištenje objekta Javne ustanove Osnovne škole Simin Han besplatno na 20 godina, zatim svakako menadžmentu Javne ustanove Osnovne škole Simin Han i menadžmentu Javne ustanove obdanište „Naše dijete“. Ovo sam morao reći jer zaista svaki puta kada se otvara novi vrtić u našem gradu, pogotovo imamo, evo vidimo, vidimo vrtiće prema rubnim mjesnim zajednicama, to je velika stvar jer je nekada se pričalo o tome da su i

zapostavljena ta djeca na rubnim mjesnim zajednicama, ali evo, ovo je dokaz da nisu. I svakako Klub vijećnika Tuzlanske alternative će podržati ovu odluku. Hvala.

ANA PEJIĆ

U redu. Zaključujem diskusije Klubova vijećnika.
Otvaram diskusiju vijećnika. Vijećnik Mirza Malkočević, izvolite.

MIRZA MALKOČEVIĆ

Hvala, evo samo da ne zaboravim, ovaj, moramo isto, bar evo ja želim da pohvalim saradnju sa direktoricom i sa upravnim odborom jer to su, evo u posljednje vrijeme imamo dosta bolju saradnju, gdje saradujemo da smo sve naše isto koje smo imali pozitivne prijedloge da su uvažili, tako da puna podrška radu direktorice i upravnog odbora.

ANA PEJIĆ

U redu. Diskusija vijećnik Emir Šahović, izvolite.

EMIR ŠAHOVIĆ

Hvala, ja imam prijedlog zaključka i evo poslaću na viber našem sekretaru a on glasi, Gradsko vijeće Tuzla poziva skupštinu Tuzlanskog kantona da na sljedećem Rebalansu Budžeta Tuzlanskog kantona izdvoje sredstva za funkcionisanje svih javnih preškolskih ustanova u Tuzlanskom kantonu a da kriteriji za iznos sredstava bude broj registrovanih korisnika u javnoj preškolskoj ustanovi.

Pa evo kad već kanton ima milijardu, a ide na Federalni parlament pa traži bazen od 4 miliona, možemo i mi sa Gradskog vijeća Tuzla tražiti od Skupštine kantona da izdvoje od tu milijardu bar nešto, malo sredstava. Ako neka društva dobijaju po milion mjesečno mogu javne predškolske ustanove, ja godišnji izvinjavam se, mogu javne predškolske ustanove biti tu ako već unapređujemo, ne trebamo gledati je li koji je nivo u pitanju i također i ja bih pohvalio i zahvalio se i direktorici Javne ustanove „Naše dijete“ i menadžmentu imala je strpljenja dosta sa nama i evo već, već dolazimo do tih nekih pozitivnih rezultata. Hvala.

ANA PEJIĆ

U redu. Denise jeste li se vi javili, replika ili...? (DENIS BEĆIROVIĆ - Može dopuna zaključka kolege.) Izvolite. U vidu replike ste se javili? (DENIS BEĆIROVIĆ – Jeste.) Izvolite.

DENIS BEĆIROVIĆ

Dakle, da idemo prema svim nivoima vlasti. Evo gospođa Pirić je svakako dio vlasti na Federalnom nivou i nadam se da će podržati inicijativu, odnosno zaključak koji je kolega predložio prema Vladi kantona.

ANA PEJIĆ

U redu. Sljedeća diskusija, vijećnica Dragana Berberović, izvolite.

DRAGANA BERBEROVIĆ GAGRO

Evo ovako kratko ću samo da odgovorim kolegama što se tiče prozivanja za većinu, kolegama sa povlasticama naravno. Obraz i čast i reći ću vam... (ANA PEJIĆ - Samo malo, Dragana, jel se to tiče ove tačke dnevnog reda?) Tiče se tačke. Tiče se tačke. (ANA PEJIĆ - Izvolite Dragana, nastavite.) Obraz i čast moraju biti iznad političkih interesa. Tako u skladu s tim ja i radim i tako razmišljam i ja bih zamolila sve da poštuju moj stav i moje mišljenje, kao što i ja poštujem drugi stav i drugo mišljenje s kojim se apsolutno ne slažem. Ovako, ulaganje vrtića je potrebno, a odgajateljice moraju biti adekvatno plaćene. Grad Tuzla je dužan finansirati plaće zaposlenih, član 78. stav 2., a ne prebacivati teret na roditelje. Neću podržati odluku jer sva djeca moraju imati isti tretman. Nije prihvatljivo subvencionirati samo djecu u gradskim, a ne u privatnim vrtićima. Ako nemamo dovoljno mjesta u javnim vrtićima, djeca su primorana ići u privatne vrtiće i moraju imati pravo na subvenciju. I sva djeca imaju jednako pravo na podršku Grada. Znači, ne možemo reći e oni idu u privatne vrtiće zato što je to stvar prestiža. Kod nekih nije stvar prestiža, a i da jeste, svako dijete mora imati iste mogućnosti i ista prava. Znači, što se tiče ove tačke neću podržati, ali bi mogla da se složim sa kolegom Emirom što se tiče njegovih zaključaka. Znači, i da dodam samo jedan zaključak da se iz Budžeta Grada, da se u Budžetu Grada napravi rebalans te da se izdvoje sredstva kako bi se finansiralo dodatne plaće uposlednika kako bi ova javna ustanova radila i dalje nesmetano, a eto to je uz, naravno, obraćanje svim daljim institucijama na kantonalnom i federalnom nivou da mogu da izdvoje takođe nešto novaca s obzirom da imaju prilično velike budžete.

ANA PEJIĆ

Ispravka krivog navoda, vijećnik Senad Mehmedinović pa vijećnik Emir Šahović, isto ispravka krivog navoda, izvolite.

SENAD MEHMEDINOVIĆ

Ma predsjedavajuća ovo je, znači, poštujem vašu funkciju i sve, ali mislim da treba skrenuti pažnju na ove termine koje koriste kolege iz „Naše stranke“. Dakle, kad govorimo o povlasticama, jel to ispadne da netko nešto dobija ovdje za to što će se nešto podržati? Ovo su teške, teške riječi koje se iznose ovdje i ako se želi biti duhovit, znači duhovit ne može da bude svako treba bar da vodi računa šta će da izgovori. I molim vas, evo i vas, znači dva puta smo čuli malo riječi koje se ne uklapaju u ovaj ambijent nit trebaju da se iznesu. Ako se može nešto reći slobodno, recite na neki drugi način. Ako nemate fond riječi da znate šta ćete reći, ja ne mogu pomoć, to ima bosanski riječnik, nek se malo čita, nek se vidi. Tako da ovo je, molim vas, vama da ubudući prekinete, da ne dozvolite da se ovakve stvari iznose ovdje, jer ispadne da neko dobija neke protuusluge za nešto što će podržati ili neće i to nikako nije u redu.

ANA PEJIĆ

Ispravka krivog navoda, Emir Šahović, izvolite.

EMIR ŠAHOVIĆ

Ja bih samo zbog javnosti onaj, s obzirom da je kolegica Dragana rekla da Grad povećanja plata adresira na teret roditelja, a u biti financiranje iz budžeta finansira trošak plata u Javnoj ustanovi „Naše dijete“. Znači neće od dijela participacije biti, jer nije ni po

zakonu, ali neće iz dijela ni povećanja, ni uopšte iz participacije od roditelja biti finansiran trošak plata. Eto.

ANA PEJIĆ

Replika, vijećnik Admir Hasanbašić, izvolite.

ADMIR HASANBAŠIĆ

Hvala replika, koleginci Dragani. Pa ona je ovdje izrekla jednu rečenicu koja me zaista hajde malo uzdrmla. Rekla je da je obraz i čast je njoj prioritet, a ne kao drugima politički interesi. Zaista mislim da to možete reći samo za sebe, a ne ovdje u drugom dijelu kada ste rekli kao nekima drugima. Ovdje ja vam mogu reći da su svi ovdje, svi nas trideset i jedno časni i pošteni ljudi kojima su građani dali znači, povjerenje da ih predstavljaju. I zaista nisam se javljao ni u onoj diskusiji kada je bila tačka dnevnog reda oko davanja saglasnosti za direktora veterinarske stanice. I tu je bilo nekih hajde da kažem oštrijih riječi, ali ja se nadam, kolegince, dobro vas poznajem evo u ovih nekoliko mjeseci, da ste možda to ishitreno rekli i da niste misli u ovom kontekstu koji sam ja razumio. Znači, želim podvući još jednom, svi vijećnici koji sjede u ovim klupama su časni i pošteni. Hvala.

ANA PEJIĆ

Diskusija, vijećnik Mensur Mujezinović, izvolite.

MENSUR MUJEZINOVIĆ

Ovaj, ja neću podržati ovu tačku dnevnog reda iz razloga zato što smatram da smo prvo možda trebali da napravimo da nam bude svako dijete isto u ovom gradu i moglo je se naći rješenje, a ne možemo sve prebacivati na roditelje gdje god je koji problem, mi jesmo izabrani od građana, ali da rješavamo njihove problema, a ne da im dižemo cijene, tako je bilo i za grijanje, bit će bolje, pa nije bilo bolje. Evo, zima je, nije ništa bilo bolje, isto je bilo možda čak i gore. I danas je pred nama nije samo tehnička odluka o korekciji cijena, već odluka kojom direktno zadiramo u budžete porodica i dodatno otežavamo svakodnevni život roditelja. Povećanje cijena u Javnoj ustanovi „Naše dijete“ predstavlja ozbiljan udar na građane koji već se već bore s rastom cijena, hrane, režija i ostalih osnovnih troškova. Umjesto da Grad bude oslonac porodicama, ovom mjerom se teret ponovo prebacuje na roditelje. Vrtići nisu luksuz, oni su osnovna potreba i ključna demografska mjera. Grad koji povećava cijene boravka djece u vrtiću šalje poruku da porodice i natalitet nisu prioritet. Zato smatram da rješenje ne može biti jednostavno povećanje participacije, potrebno je pronaći održiv model subvencioniranja koji će obuhvatati svu djecu i u javnim i u privatnim vrtićima. Dijete je dijete, ne smijemo praviti razliku među njima, niti dijeliti roditelje na one koje imaju i one koji nemaju pravo na podršku. Pozivam vas da zajedno otvorimo dijalog i pronađemo model po kojem će Grad subvencionirati boravak djece bez obzira da li pohađaju javnu ili privatnu ustanovu. Time pokazujemo da nam je svako dijete jednako važno i da vodimo odgovornost socijalnu politiku. Umjesto da glasate za ovo opterećenje građana, pokažite političku hrabrost i odgovornost. Hvala.

ANA PEJIĆ

U redu. Da li se još neko javlja za diskusiju vijećnika? Ne javlja.

Zaključujem diskusiju vijećnika.

I stavljam na izjašnjavanje prijedlog Odluke o davanju prethodne saglasnosti na Odluku Upravnog odbora Javne ustanove za predškolski odgoj i obrazovanje „Naše dijete“ Tuzla o visini iznosa participacije korisnika usluga sa kriterijima za umanjeње I molim vas da se izjasnite. Glasanje je okončano.

Konstatujem da je pročitana odluka usvojena sa,

19 glasova za, 2 protiv i 2 suzdržana.

Prije nego što pređemo... Može samo malo tišine ako nije problem? Prije nego što krenemo na zaključke i glasanje o zaključcima, evo gospođa Alma ima neku primjedbu za zaključak, izvolite. (SLAĐANA KRAJINA - Mikrofon samo kod koga je ostao uključen?)

**ALMA HALILOVIĆ - pomoćnik gradonačelnika
za Službu za ekonomski razvoj,
poduzetništvo i poljoprivredu**

Eh evo ponovo da vas pozdravim. Imam primjedbu samo na zaključak broj jedan gdje se kaže da služba i menadžment, jel tako treba da ovaj, riješe to pitanje onih izlaza? Menadžment i organi upravljanja. Zato što Služba za ekonom...Ja, ja. Dobro eto ja sam shvatila da je bilo služba, pa samo zato što služba vrši nadzor nad radom, ali preko organa upravljanja. I tako je i zakonskim aktima uređeno. I ako mogu iskoristiti samo kratku priliku za gospodina Mehmedinovića. U našoj analizi gospodine Mehmedinović je naglašeno ono što je služba, koliko je finansiranje iz Budžeta Grada. Navedeno je u analizi vrlo transparentno ukupan iznos ovaj, koliko je to bilo povećanje u odnosu na 24-tu na 25-tu pa eto samo malo da obratite pažnju.

ANA PEJIĆ

Prije nego što krenemo dalje, Senade vi ste imali i pitanje koliko se sjećam za direktoricu. Pa može i to pa onda da ako...Ja ću zamoliti direktoricu Javne ustanove „Naše dijete“ da odgovori na pitanje proisteklo iz diskusije. Izvolite.

**ANESA MEŠANOVIĆ - direktorica Javne ustanove za predškolski odgoj
i obrazovanje „Naše dijete“ Tuzla**

Dobar dan, uvažena predsjedavajuća, dopredsjedavajući, uvaženi vijećnici i vijećnice. Pitanje je bilo o povećanju plata jer će ostati dio sredstava od Grada koji finansira plate pa ukoliko ti izračuni budu pokazali, možda će doći do povećanja. Ne svima u javnoj ustanovi povećanje plata, nego onim radnicima kojima se plata nije promijenila povećanje minimalne plate. Taj dio nam je obuhvaćen od ukupno 157 zaposlenih, njih četrdesetak ili ne znam sad, pred sobom nemam brojeve, minimalnom platom. Međutim, tada nam je došlo i do stapanja platnih razreda, razlika između recimo ako je neko bez staža, počinje raditi kao spremačica, servirka i jedna medicinska sestra koja je završila srednje obrazovanje i položila taj pripravnčki. Početna plata bez staža je razlika u nešto oko 53 marke. Mora se napraviti razlika tu da pokušamo u narednom periodu dobiti nazad platne razrede, jer se to stvarno približilo. Pitanje je bilo o povećanju plata ukoliko, kad vidimo u šta ulažemo i šta ostane i tih sredstava od Grada iće se na dio povećanja plata za jedan dio radnika koji su se izjednačili s minimalcem. Recimo, magacionir koji je nekad imao drugačiji koeficijent od nižeg razreda a sad ima isti ili domar ili neki drugi, glavni kuhar ili kuhar. A recimo ićemo na povećanje. Tu će

biti 4% a možda 8% za one koji rade u odgojno obrazovnom, u odgojno obrazovnom radu sa djecom.

ANA PEJIĆ

Zahvaljujem se. To je? Zahvaljujem se.

Zamoliti ću sekretara da pročita zaključke proistekle iz diskusija. Da li ste za da glasamo u paketu ili pojedinačno o zaključcima? Pojedinačno, pojedinačno. Pojedinačno o zaključcima.

SLAĐANA KRAJINA – sekretar Gradskog vijeća Tuzla

Prijedlog prvog zaključka. (ANA PEJIĆ - Molim vas za tišinu.)
Zadužuje se Uprava Javne ustanove za predškolski odgoj i obrazovanje „Naše dijete“...

ANA PEJIĆ

Molim vas samo malo Slađana.
Možda malo tišine? Nastavljamo sa radom sjednice.

Dajem pauzu od 10 minuta.

(Pauza.)

Pozivam vijećnike da uđu u salu kako bismo nastavili sa radom sjednice.

Nastavljamo sa radom sjednice.

Nastavljamo sa radom sjednice.

Zamoliti ću sekretara, da pročita zaključke proistekle iz diskusije, obzirom da ste se ranije izjasnili da pojedinačno se izjašnjavamo o zaključcima, znači idemo zaključak po zaključak. Izvolite Slađana.

SLAĐANA KRAJINA – sekretar Gradskog vijeća Tuzla

Prijedlog prvog zaključka.

- Zaduguje se Uprava Javne ustanove za predškolski odgoj i obrazovanje „Naše dijete“ Tuzla da izvrši detaljnu provjeru svih izlaza i evakuacionih puteva u objektima Ustanove, sa posebnim osvrtnom na:

- funkcionalnost i ispravnost izlaznih vrata,
- smjer otvaranja vrata u skladu sa sigurnosnim i protivpožarnim standardima,
- prohodnost evakuacionih puteva,
- usklađenost sa važećim propisima iz oblasti zaštite od požara i zaštite na radu.

ANA PEJIĆ

Molim vas da se izjasnite. Zamolit ću vijećnika Denisa Bećirovića samo da se izjasni o zaključcima obzirom da je u sali. (SLAĐANA KRAJINA – Izašao je.) Nije. Tu je. Tu je. (SLAĐANA KRAJINA – Aha.) Glasanje je okončano.

Konstatujem da je pročitani zaključak usvojen sa,
20 glasova za, nije bilo protiv i 1 suzdržan.

SLAĐANA KRAJINA – sekretar Gradskog vijeća Tuzla

Sljedeći prijedlog zaključka.

- Gradsko vijeće Tuzla zadužuje Javnu ustanovu za predškolski odgoj i obrazovanje „Naše dijete“ Tuzla da u roku od 30 dana dostavi Gradskom vijeću detaljan finansijski izvještaj koji sadrži:

- strukturu ukupnih rashoda po kategorijama (plate, energenti, hrana, održavanje, investicije),
- iznos subvencije Grada po djetetu na mjesečnom nivou,
- projekciju prihoda od povećanja participacije i plan njihove raspodjele po kategorijama.

ANA PEJIĆ

Molim vas da se izjasnite. Glasanje je okončano.

Konstatujem da je pročitani zaključak usvojen sa,
20 glasova za, nije bilo protiv i 2 suzdržana.

SLAĐANA KRAJINA – sekretar Gradskog vijeća Tuzla

Sljedeći prijedlog.

- Gradsko vijeće Tuzla zadužuje Javnu ustanovu za predškolski odgoj i obrazovanje „Naše dijete“ Tuzla da dostavi analizu stvarne ekonomske cijene usluge po djetetu, uključujući zbir participacije roditelja i subvencije Grada, radi potpune fiskalne transparentnosti.

ANA PEJIĆ

Molim vas da se izjasnite. (SLAĐANA KRAJINA – Evo pročitat ću ponovo.) Nema potrebe Slađana. (SLAĐANA KRAJINA – Pa mora glasat ako je u sali.) Glasala je. (SLAĐANA KRAJINA – Aha.) Glasanje je okončano.

Konstatujem da je pročitani zaključak usvojen sa,
20 glasova za, nije bilo protiv i 3 suzdržana.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla zadužuje Javnu ustanovu za predškolski odgoj i obrazovanje „Naše dijete“ Tuzla i nadležnu službu Grada da razmotre mogućnost uvođenja modela diferencirane participacije prema prihodima domaćinstva, kako bi se zaštitile porodice sa nižim primanjima.

ANA PEJIĆ

Molim vas da se izjasnite. Mirza molim vas da se izjasnite. Glasanje je okončano.
Konstatujem da je pročitani zaključak usvojen sa,
20 glasova za, nije bilo protiv i 3 suzdržana.

SLAĐANA KRAJINA – sekretar Gradskog vijeća Tuzla

Sljedeći prijedlog zaključka.

- Gradsko vijeće Tuzla zadužuje Javnu ustanovu za predškolski odgoj i obrazovanje „Naše dijete“ Tuzla da u roku od 60 dana dostavi trogodišnji plan investicionog i kapitalnog održavanja objekata, imajući u vidu da je većina objekata starija od 45 godina.

ANA PEJIĆ

Molim vas da se izjasnite. Glasanje je okončano. (SLAĐANA KRAJINA – Azra, Azra.) Glasanje je okončano.

Konstatujem da je pročitani zaključak usvojen sa,
22 glasa za, nije bilo protiv i 1 suzdržan.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla zadužuje gradonačelnika i nadležnu Službu da, u okviru svojih budžetskih mogućnosti, izvrše analizu i predlože model subvencioniranja cijene boravka djece u Javnoj ustanovi za predškolski odgoj i obrazovanje „Naše dijete“ Tuzla, sa posebnim fokusom na:

- porodice sa nižim prihodima,
- porodice sa dvoje ili više djece,
- samohrane roditelje,
- porodice u stanju socijalne potrebe,
- roditelje djece sa poteškoćama u razvoju.

ANA PEJIĆ

Molim vas da se izjasnite. Glasanje je okončano.
Konstatujem da je pročitani zaključak usvojen sa,
23 glasa za, nije bilo protiv i nije bilo suzdržanih.

SLAĐANA KRAJINA – sekretar Gradskog vijeća Tuzla

Sljedeći prijedlog.

- Zaduguje se nadležna služba da dostavi Gradskom vijeću Tuzla prijedlog konkretnih mjera i finansijske konstrukcije subvencioniranja, kako bi se ublažio teret povećanja cijene boravka djece u vrtićima.

ANA PEJIĆ

Molim vas da se izjasnite. Glasanje je okončano.
Konstatujem da je pročitani zaključak usvojen sa,
23 glasa za, nije bilo protiv i nije bilo suzdržanih.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla poziva Skupštinu Tuzlanskog kantona da pri sljedećem rebalansu budžeta Tuzlanskog kantona izdvoji sredstva za funkcionisanje svih javnih predškolskih ustanova u Tuzlanskom kantonu a da kriterij za iznos sredstava bude broj registrovanih korisnika u javnoj predškolskoj ustanovi. Takođe se pozivaju i viši nivoi vlasti da u budžetima izdvoje sredstva za funkcionisanje javnih predškolskih ustanova.

ANA PEJIĆ

Molim vas da se izjasnite. Glasanje je okončano.
Konstatujem da je pročitani zaključak usvojen sa,
22 glasa za, nije bilo protiv i 1 suzdržani.

SLAĐANA KRAJINA – sekretar Gradskog vijeća Tuzla

– Gradsko vijeće Tuzla traži da se rebalansom Budžeta Grada Tuzle izdvoje dodatna sredstva za finansiranje plaća uposlenika javne ustanove za predškolski odgoj i obrazovanje „Naše dijete“ Tuzla, kako bi ova ustanova i dalje nesmetano radila. (Možemo ponovit još jednom?)

ANA PEJIĆ

Može. (SLAĐANA KRAJINA – Glasanje?) Možete samo poništiti?

SLAĐANA KRAJINA – sekretar Gradskog vijeća Tuzla

– Gradsko vijeće Tuzla traži da se rebalansom Budžeta Grada Tuzle izdvoje dodatna sredstva za finansiranje plaća uposlenika javne ustanove za predškolski odgoj i obrazovanje „Naše dijete“ Tuzla, kako bi ova ustanova i dalje nesmetano radila.

ANA PEJIĆ

Molim vas da se izjasnite. Glasanje je okončano.
Konstatujem da pročitani zaključak nije dobio potrebnu većinu sa,
8 glasova za, nije bilo protiv i 15 suzdržanih.

Prelazimo na sljedeću tačku dnevnog reda to je:

Razmatranje i usvajanje pod:

a) Odluke o raspisivanju javnog oglasa za izbor i imenovanje predsjednika i članova nadzornih odbora u javnim ustanovama, čiji je osnivač Grad Tuzla (sa tekstom javnog oglasa), pod

b) Odluke o utvrđivanju posebnih uslova i kriterija za izbor i imenovanje predsjednika i članova nadzornih odbora u javnim ustanovama, čiji je osnivač Grad Tuzla i pod

c) Rješenja o imenovanju Komisije za izbor predsjednika i članova nadzornih odbora u javnim ustanovama, čiji je osnivač Grad Tuzla

Predlagač je gradonačelnik Grada Tuzla.

Obrađivač je Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanje (pod c) i Klubovi vijećnika.

Da li ima potrebe za uvodnim izlaganjem?

Da li ima potrebe...? Dajem pauzu od 10 minuta. Nastavljamo sa radom.

Predlagač je gradonačelnik Grada Tuzla.

Obrađivač: Služba za ekonomski razvoj, poduzetništvo i poljoprivredu.

Materijal su razmatrali: Komisija za statutarna pitanja i propise, Komisija za ekonomske odnose, Komisija za poduzetništvo, Komisija za izbor i imenovanje (pod c) i Klubovi vijećnika.

Da li ima potrebe za uvodnim izlaganjem? (Nema.)

Da li ima potrebe da se pročitaju izvještaji Komisija?

Otvaram raspravu Klubova vijećnika.

Zatvaram raspravu Klubova vijećnika.

Otvaram raspravu vijećnika.

Zatvaram raspravu vijećnika i da vas pitam da li ste za da glasamo u paketu?

Stavljam na izjašnjavanje prijedlog Odluke o raspisivanju javnog oglasa za izbor i imenovanje predsjednika i članova nadzornih odbora u javnim ustanovama, čiji je osnivač Grad Tuzla (sa tekstom javnog oglasa), pod

b) Odluke o utvrđivanju posebnih uslova i kriterija za izbor i imenovanje predsjednika i članova nadzornih odbora u javnim ustanovama, čiji je osnivač Grad Tuzla i pod

c) Rješenja o imenovanju Komisije za izbor predsjednika i članova nadzornih odbora u javnim ustanovama, čiji je osnivač Grad Tuzla i molim vas da se izjasnite. Glasanje je okončano.

Konstatujem da su pročitane odluke i rješenje usvojeni sa,

18 glasova za, nije bilo protiv i 3 suzdržana.

Sljedeća tačka dnevnog reda:

Razmatranje Informacije o provedenom postupku po ponovnom Javnom oglasu za izbor predsjednika i člana upravnog odbora u Javnoj zdravstveno-nastavnoj ustanovi Dom zdravlja „Dr. Mustafa Šehović“ Tuzla (sa Rang listom najuspješnijih kandidata i pod

b) Donošenje Rješenja o konačnom imenovanju predsjednika i članova Upravnog odbora Javne zdravstveno-nastavne ustanove Dom zdravlja „Dr. Mustafa Šehović“ Tuzla.

Predlagač je gradonačelnik Grada Tuzla.

Obrađivač je Komisija za izbor predsjednika i člana upravnog odbora u Javnoj zdravstveno-nastavnoj ustanovi Dom zdravlja „Dr. Mustafa Šehović“ Tuzla (pod a) i Služba za ekonomski razvoj, poduzetništvo i poljoprivredu (pod b).

Materijal su razmatrali: Komisija za statutarna pitanja i propise (pod b), Komisija za ekonomske odnose, Komisija za poduzetništvo, Komisija za izbor i imenovanja (pod b) i Klubovi vijećnika.

Da li ima potrebe za uvodnim izlaganjem? (Ne.)

Da li ima potrebe da se pročitaju izvještaji Komisija? (Ne.)

Otvaram raspravu Klubova vijećnika.

Zatvaram raspravu Klubova vijećnika.

Otvaram raspravu vijećnika.

Zatvaram raspravu vijećnika.

I konstatujem da je GRADSKO VIJEĆE TUZLA PRIMILO K ZNANJU INFORMACIJU O PROVEDENOM POSTUPKU PO PONOVNOM JAVNOM OGLASU ZA IZBOR PREDsjedNIKA I ČLANA UPRAVNOG ODBORA U JAVNOJ ZDRAVSTVENO-NASTAVNOJ USTANOVU DOM ZDAVLJA „DR. MUSTAFA ŠEHOVIĆ“ TUZLA (SA RANG LISTOM NAJUSPJEŠNIJIH KANDIDATA

A stavljam na izjašnjavanje prijedlog Rješenja o konačnom imenovanju predsjednika i članova Upravnog odbora Javne zdravstveno-nastavne ustanove Dom zdravlja „Dr. Mustafa Šehović“ i molim vas da se izjasnite. Glasanje je okončano.

Konstatujem da je pročitano rješenje usvojeno sa,
18 glasova za, nije bilo protiv i 3 suzdržana.

Sljedeća tačka dnevnog reda:

RAZMATRANJE I USVAJANJE IZVJEŠTAJA O RJEŠAVANJU UPRAVNIH STVARI U UPRAVNOM POSTUPKU GRADA TUZLE ZA 2025. GODINU

Predlagач je gradonačelnik Grada Tuzla.

Obrađivač je Služba za opću upravu.

Materijal su razmatrali: Komisija za statutarna pitanja i propise i Klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji Komisija?

Otvaram raspravu Klubova vijećnika.

Zatvaram raspravu Klubova vijećnika.

Otvaram raspravu vijećnika.

Zatvaram raspravu vijećnika.

I stavljam na izjašnjavanje Izvještaj o rješavanju upravnih stvari u upravnom postupku Grada Tuzle za 25-tu godinu i molim vas da se izjasnite. Glasanje je okončano.

Konstatujem da je pročitani Izvještaj usvojen sa,
21 glasom za, nije bilo protiv i nije bilo suzdržanih.

Sljedeća tačka dnevnog reda je:

RAZMATRANJE INFORMACIJE O PROVEDENOM POSTUPKU PO JAVNOM OGLASU ZA IZBOR PREDsjedNIKA I ČLANOVA UPRAVNIH ODBORA U JAVNIM USTANOVAMA, ČIJI JE OSNIVAČ GRAD TUZLA (SA RANG LISTOM NAJUSPJEŠNIJIH KANDIDATA)

Obrađivač je Komisija za izbor predsjednika i članova upravnih odbora u javnim ustanovama, čiji je osnivač Grad Tuzla.

Materijal su razmatrali: Komisija za ekonomske odnose, Komisija za poduzetništvo i Klubovi vijećnika.

Da li ima potrebe za uvodnim izlaganjem?

Da li ima potrebe da se pročitaju izvještaji Komisija?

Otvaram raspravu Klubova vijećnika.

Zatvaram raspravu Klubova vijećnika.

Otvaram raspravu vijećnika.

Zatvaram raspravu vijećnika.

Te konstatujem da je GRADSKO VIJEĆE TUZLA PRIMILO K ZNANJU INFORMACIJU O PROVEDENOM POSTUPKU PO JAVNOM OGLASU ZA IZBOR PREDSEDNIKA I ČLANOVA UPRAVNIH ODBORA U JAVNIM USTANOVAMA, ČIJI JE OSNIVAČ GRAD TUZLA (SA RANG LISTOM NAJUSPJEŠNIJIH KANDIDATA).

Sljedeća tačka dnevnog reda je:

RAZMATRANJE PRIJEDLOGA STVARNE REFORME PRAVOSUDA – INICIJATIVE ZA DONOŠENJE NOVOG ZAKONA O VISOKOM SUDSKOM I TUŽILAČKOM VIJEĆU BOSNE I HERCEGOVINE

Predlagač je Mirnes Ajanović, vijećnik Bosanske stranke pa pozivam vijećnika Ajanovića da ukratko obrazloži ovu inicijativu. Izvolite.

MIRNES AJANOVIĆ

Hvala, mala ispravka. Predlagač je Komisija za ljudska prava. Ja sam samo predsjednik. Da. Dobro, ja sam predložio na Komisiji za ljudska prava. Jeste, na Kolegiju sam predložio, jeste. Nije negativno, nego samo da se pojasni, dakle, institucionalno, da se zna da je mnogo jače. Ovdje je dosta napisanog. Prijedlog, zaključka će biti da usvaja se prijedlog stvarne reforme, odnosno prijedlog Komisije i dostavlja licima koja su navedena odnosno ustanovama. To eto Slađo nisam napisao, napišite to u jednoj rečenici. Dakle, to je to sa cijelim ovim tekstom Komisije. Ja ću samo ukratko, ukratko neću ovo ni prepričati, nego ću samo ispričati osnov što bi djeca trebala da znaju šta je pravna država. Nezavisnost, institucija, dakle, i sudske, izvršne i zakonodavne, ali i odgovornost. Mi odgovaramo građanima. Izvršna vlast odgovara nama. Kome odgovara sud? Nikome. Rade šta hoće, mogu da rade šta hoće. Postoji Krivični zakon BH, odnosno odredba u BH krivičnom zakonu Entitetski Brčko Distrikta. Ako sudija donese, evidentno nezakonitu odluku, kazna zatvora, kolega oko tri godine, nešto ide, tako nešto. I oni donijeli sebi zakon da imaju imunitet. A lijepo piše krivično, ili isto kada uđete, opljačkate banku, bilo šta, i sad neko donese, eh ovi imaju imunitet oni pljačkajte vi dokle hoćete. E, to su napravili za sudije. I šta onda imamo u smislu nezavisnosti? Nezavisnost sudije znači da nezavisno od bilo kakvih pritisaka donosi odluke u skladu sa zakonom. Ali nezavisnost ne znači da sud ima pravo donijeti nezakonitu odluku. To je već anarhija. To nije sloboda. To je suđenje mimo zakona. I sistem mora postaviti granice odgovornosti svima. Kao što mi odgovaramo i krivično za donošenje naših odluka, koje su eventualno krivično dijelo i to piše tamo. Odgovaramo i pred građanima. Svake četiri godine hoćel nas izabrat ili neće. Pa se trudimo da odradimo dobro, da ne pogriješimo, pa i ako pogriješimo nešto se izvinjavamo, pa popravljamo. A imamo jednu grupu ljudi koji ne odgovaraju nikome. I steklo se stanje, u stvari zauzeo se stav, da oni mogu da rade šta hoće. Mogu donositi proizvodne odluke, nezakonite i ovakve i onakve. Bitno da imaš jarana na drugostepenom sudu. Nije ba, kaže, žalba osnovana, gotovo, konačno. Ponašaju se kao da je predmet obični papir, kojeg u većini ne pročitaju, a ne ljudska sudbina, sudbina porodica, firmi. Ko treba da provjerava odgovornost sudija, tužilaca, advokata? Evo jedan primjer moram vam reći. Sjede dva advokata i sudija koji nije sudija stručni saradnik a treba da bude biran za sudiju. Jedan advokat je advokat, a drugi je advokat, ali i član Visokog sudskog i tužilačkog vijeća i odlučuje hoćel birat tog sudiju za sudiju i zamislite kako je sudija odsudio. Po zakonu al kako odgovara onom advokatu što je u Visokom sudskom i tužilačkom vijeću. Naravno. Presudio u korist onog advokata što je u Visokom sudskom i tužilačkom vijeću i advokat je glasao na narednoj sjednici da sudija postane sudija. Nije više stručni saradnik. Eno ga sad na Kantonalnom sudu. Napredovo. Poslušan. Jel to država? Jel to pravna država? Jel to odgovornost? Jedan sudija i tužilac su suprotne

strane. Nemamo mi tužilačke vlasti. Mi imamo sudsku vlast. Tužilac nije sudska vlast. Tužilac sjedi i bira tamo sudije. Apsurdno. Ovo Visoko sudsko tužilačkom vijeću, ovakvo kakvo jeste, je naopako. Mi imamo tamo sudije, tužioce i advokate koji biraju sudije, tužioce ne biraju advokata, eto, ali advokati biraju i jedne i druge. I pošto je stanje ovako kakvo jeste, vrlo neugodno, za sve nas došlo je do baš stanja anarhije u smislu da više nismo sigurni da donesete ovako čist bijel papir na sud. Čist. Ne pretjerujem ni malo i imate pravnu sigurnost. Neće Nedžad da ispoštuje ovaj čist bijel papir. Nedžad odo ja na sud, pa će tebe sud natjerat presudom, pa izvršnim postupkom, pa češ ti morat slušat. Ali ja znam da će meni sud reć ovo je bijel papir. Ja izvedem dokaze, svjedoke, sudskog vještaka bijel, sudija kaže, e, ne znam. Niste sigurni. Ili sjedim ja s jednim sudijom. Baš sam tako sjedio. I pričamo o jednom članu. Piše, ne govorim šta. Decidno, ko kad bi rekli ovo je ovo. Pa kolega reko piše tako, i uzeo on gleda ono, gleda, gleda, pa kaže, zavisi kako se tumači. Zamislite, osoba koja je plaćena da primjenjuje zakon, postavlja se u funkciju zakonodavstva i tumači zakon. Zakon tumači isključivo onaj koji ga donosi. Ne onaj koji ga primjenjuje. Zamislite, kad bi vi, da vas policija zaustavi i kažeš ovom policajcu, vozio si sto dvajst, piše pedeset, e, pa ovo je zavisi kako se tumači ovo. Kad bi svi mi tako tumačili propis, gdje bi završili? Nigdje. U ovoj pravnoj državi kakva je u Bosni i Hercegovini. Ovo je samo nekoliko primjera što smo se odlučili i što sam se odlučio i što je Komisija prihvatila, što smo došli pred vas. Da mi malo uozbiljimo ove u VSTV. Na način da, jel zaista počnu procesuirati evidentno nezakonite odluke. Nama treba jedna takva odluka. Da se jedan sudija, gdje je evidentno nezakonita odluka, gdje je primjenio čak ni ona viša matematika, dva i dva jednako četiri, za njih neke je evidentno viša, gdje je bukvalno jedan plus jedan on je reko 53, gdje se vidi i gdje je drugostepeno vijeće to potvrdilo. Nije ni čitalo žalbe. Mi kad bi i jedan predmet imali gdje bi bili sankcionisani takvi da ne mogu više biti sudije, a ne trebaju biti sudije, mi bi danas imali pravnu državu. Nemamo, zašto? Zato što o njima odlučuje sudija. Opet njihov jaran, prijatelj, s kim sjede, piju kahve, ručkove, dogovaraju i svašta nešto. Šta je rješenje? Rješenje, ne vidim u tome da će državni parlament donijeti odluku u smislu da izmjeni zakon o VSTV, po meni je rješenje da mi iz Visokog sudskog tužilačkog vijeća, po primjerima, brojnih zemalja u okruženju ili dalje, uklonimo i sudije i tužioce i advokate. Oni o kome se bira, ne trebaju da biraju. I oni o kojima se treba odlučivati da li su radili svoj posao dobro ili ne, ne treba da odlučuju ti o kojima se odlučuje isto to. Iz tog razloga, prijedlog je ove stvarne reforme i zaista bi dala rezultat da osoba koja već ima ovlast da može donositi zakone bukvalno preko noći, donese Zakon o visokom sudskom tužilačkom vijeću, da se definiše da u tom zakonu nema sudija, tužilaca i advokata, da sudije nemaju imunitet za evidentno nezakonite odluke (nerazgovjetno izgovorena riječ op.a.) Visoko sudsko tužilačko vijeće od članova profesora, univerziteta, fakulteta, pravnih i istaknutih, pravnih stručnjaka, može i sudija i tužioca, advokata koji su u penziji ili nešto slično, koji nisu aktivni. Da imamo zaista nezavisno tijelo, to visoki predstavnik može sam donjeti, može na početku sam inicirati, odnosno sam predložiti lica koja će biti izabrana, pa odgovarati njemu. Ovo je možda utopija, možda ovo švarc, onaj, ovaj Šmit neće htjet, možda, ali mi nismo pitali. Mi ako pitamo i pošaljemo mu zahtjev, ako ništa, bar mislim da ćemo dijelom uozbiljiti Visoko sudsko tužilačko vijeće BH, da shvate da mogu preko noći biti sklonjeni i da neko ko je donosio zaista, pa gotovo i radikalne zakone, može donijeti odluku na ovakav način da izmjeni zakon o VSTV i da postavi zaista nezavisno tijelo. Iz ovog razloga je recimo, evo, moj apel vijećnicima da omogućimo zaista nezavisnost sudstva od uticaja politike, tajkuna, bilo koga, da onemogućimo uticaj i advokata, pa i tužilaca, ili sudija kao sudija kolega na Visoko sudsko tužilačko vijeće, da konačno imamo organ koji će obezbijediti sistem pravne države, a to je jedino moguće na ovaj način, pa eto pozivam vas da date podršku u ovoj zaista stvarnoj reformi pravosuđa u Bosni i Hercegovini. Ovo nije diranje u nezavisnost sudstva, ovo je samo traženje odgovornosti za rad, kao što svako od nas odgovara da i sudije odgovaraju za svoj rad, ili da odgovaraju za evidentno nezakonit rad. Ne može

postojati apsolutna sloboda bilo kome da radi šta hoće, a da zna da ne može odgovarati, onda dolazimo u sistem koji više nije pravna država, ulazimo u sistem koji evo već rezultira ovim što imamo na sarajevskim ulicama, a ovo može eskalirati u nešto mnogo više nego što je bilo čak i 2014. godine u februaru, i zbog toga smo dužni tražiti od onih koji su dužni da osiguraju mir, demokratiju u Bosni i Hercegovini u ovom slučaju visoki predstavnik da to uradi putem ovog našeg dopisa. Toliko hvala.

ANA PEJIĆ

Zahvaljujem se. Otvaram diskusiju Klubova vijećnika da li se neko javlja?
Zaključujem diskusiju Klubova vijećnika.
Otvaram diskusiju vijećnika. Vijećnica Dragana Berberović, izvolite.

DRAGANA BERBEROVIĆ GAGRO

Ovako, uz svo uvažavanje i poštovanje prema kolegi kojima je ova tema stručna, ponukana prošlim iskustvom što se tiče Kallosa, što se tiče Ministarstva obrazovanja i tako nekih stvari, smatram da kao vijećnik ne treba da vršim bilo kakav pritisak na pravosuđe, a isto tako da se ne koriste pozicije za istu tu radnju. Zbog tog razloga neću podržati ovaj, ovaj prijedlog. Mislim da svi trebamo na privatnom polju da bijemo svoje bitke, a ne kroz ovo Vijeće. Hvala.

ANA PEJIĆ

Replika, vijećnik Mirnes Ajanović, izvolite.

MIRNES AJANOVIĆ

Ma ja sad moram svog druga Senada ispraviti. Nije ovdje problem Senade haman šta ko priča i da ne zna šta priča. Ovdje je problem što neko i ne čuje haman ono što treba da čuje. Imamo i ovu novu dimenziju, nije ovo samo Bilko Bilbao ovdje haman treba, što kaže Kreso, jednom našem prijatelju, uposleniku kaže bolje se čuje kad izvadiš prst iz ušiju. Pa ja ljudi moji pričao o nezavisnosti pravosuđa, o tome da obezbijedimo sistem koji će osigurati, sistem da niko ne može vršiti pritisak na pravosuđu, nego da moraju raditi adekvatno, zakonito, cijeniti propise, a ne kako oni hoće tumačiti ili primjenjivati proizvodno. I ti dobiješ kontru, kaže, eto neću ja, zato što je to pritisak i mi nešto privatno rješavamo. Ja se suprostavljam svojim kolegama iz advokatske komore, kažem, maknite i advokate odatle. Ne treba advokat da bude u Visokom sudskom tužilačkom vijeću. Ljudi moji nije normalno. Može da bude al ako će zamrznuti svoj rad kao advokat. Nema on šta sjest s drugim advokatom u sudnici i imati privilegiju pred sudijom da sutra sudija kad mu se bira dijete konta hoćel glasat za zakon ili za ovog advokata što je VSTV. To nije logično uopšte. Apsurdno je. Dakle, ja radim protiv sebe. Ja sutra možda mogu biti izabran za člana VSTV. Ja govorim, ne dajte. Ne smije to da bude. Ovdje mi samo tražimo da se izabere tijelo koje će biti stručno, nezavisno kada se glasa o odgovornosti ili bira od toga da ti sami sebe biraju. U tome i jest problem. I zato nudim ovo, i meni zaista nije jasno ova, Dragana, mislim svi mi imamo nekakve svoje stavove, a nit zna šta hoće, nit čuje ono što treba. Eto toliko, hvala.

ANA PEJIĆ

U redu. Zaključujem diskusije vijećnika i pozivam sekretara da pročita zaključke vezano za prijedlog ove inicijative. Izvolite Slađana.

SLAĐANA KRAJINA – sekretar Gradskog vijeća Tuzla

Ne znam, ako sam dobro razumjela, vijećniče Ajanoviću, prijedlog je zaključka:

-Gradsko vijeće Tuzla prihvata prijedlog stvarne reforme pravosuđa - Inicijative za donošenje novog Zakona o Visokom sudskom i tužilačkom vijeću Bosne i Hercegovine, upućen od strane Komisije za ljudska prava i slobode Gradskog vijeća Tuzla.

Inicijativa za donošenje novog Zakona o Visokom sudskom i tužilačkom vijeću Bosne i Hercegovine se upućuje Uredu Visokog predstavnika u Bosni i Hercegovini, Misiji OSCE u Bosni i Hercegovini, Delegaciji Evropske unije u Bosni i Hercegovini, Parlamentarnoj skupštini Bosne i Hercegovine, Vijeću ministara Bosne i Hercegovine, Visokom sudskom i tužilačkom vijeću Bosne i Hercegovine.

I u prilogu ovaj Prijedlog Komisije za ljudska prava broj 01/04-A-1737-2026 od 12.2.26-te. Jel to?

ANA PEJIĆ

U redu. Molim vas da se izjasnite o zaključcima. Glasanje je okončano.

Konstatujem da je pročitani zaključak usvojen sa,
19 glasova za, nije bilo protiv i 2 suzdržana.

Prelazimo na sljedeću tačku dnevnog reda:

**INICIJATIVA ZA IZGRADNJU SPOMEN OBILJEŽJA BORCIMA DRUGOG
KORPUSA ARMIJE REPUBLIKE BOSNE I HERCEGOVINE NA
MEMORIJALNOM KOMPLEKSU SLANA BANJA**

Predlagач je Klub vijećnika Pokreta demokratske akcije te pozivam vijećnika Emira Šahovića da ukratko obrazloži inicijativu upućenu. Izvolite Emire.

EMIR ŠAHOVIĆ

Hvala predsjedavajuća. Samo ne znam hoću u ovom obrazlaganju ja predložiti...(ANA PEJIĆ - Zaključke, molim vas, samo u diskusiji ispred Kluba možete.) Aha. (ANA PEJIĆ - Sad samo ukratko obrazložite vašu inicijativu.) Dobro. Znači, ova tačka dnevnog reda, motivisan sam znači, ovom inicijativom nakon raspisanog javnog konkursa za izradu idejnog rješenja za izgradnju spomen obilježja, spomen park sa spomen obilježjem Drugom korpusa Armije Bosne i Hercegovine koji bi bio smješten na parceli pored RGGF objekta, tako da u biti ovo nije politički motivisan inicijativa ovo je samo znači, zaštita ideje grada Tuzla, a malo više o tome ću u diskusiji.

ANA PEJIĆ

U redu. Otvaram raspravu Klubova vijećnika. Vijećnik Emir Šahović, izvolite, pa vijećnik Mirnes Ajanović.

EMIR ŠAHOVIĆ

Hvala predsjedavajuća. Apsolutno se slažem da Drugi korpus treba da ima spomenik pogotovo u gradu Tuzla, zato što je to administrativni centar Tuzlanskog kantona i zbog raznoraznih razloga, ali ovdje znači, kao što sam već u uvodu rekao, ako u gradu Tuzla imamo određena prava, moramo imati i određene obaveze. A obaveza je poštovanje, tradicije, običaja i historije grada Tuzla. Pa znači i shodno tome mi imamo Memorialni kompleks na Slanoj banji, gdje je možda jedini u regionu, gdje imamo na jednom mjestu sve znači spomenike, spomen, obilježja borbe protiv fašizma kroz historiju, pa evo od drugog svjetskog rata pa na ovamo. I imamo znači na jednom mjestu sve, znači kada obilježavamo određene bitne datume, sve nam je tu na jednom mjestu. Ono što mislim, ovaj spomenik, hajde, ne ulazim u to što se tek sad gradi, da li je trebao dosta ranije biti, ali nije to ni bitno sada. Bitno je da mi kao Gradsko vijeće zauzmemo stav da ne dijelimo Drugi korpus od ostatka spomen obilježja koji se nalaze na Memorialnom kompleksu Slana banja. Ovim znači ako imamo određenu, određen protokol je li na određene datume, da li sad da se dovodimo u situaciju da na spomen, obilježju Slana banja odajemo počas pa da idemo na neku drugu lokaciju, mislim da nema potrebe, mislim da bi to trebalo ostati jedinstveno kako je to sačuvano kroz čitavu historiju od drugog svjetskog rata pa na ovamo, tako da bi predložio sljedeće zaključke.

Prvi zaključak, Gradsko vijeće Tuzla poziva Vladu Tuzlanskog kantona da još jednom razmotri odluku o lokaciji spomen, obilježja borcima Drugog korpusa Armije Bosne i Hercegovine, te da isti bude izgrađen na Memorialnom kompleksu Slana Banja zajedno sa ostalim spomen obilježjima značajnim za istoriju grada Tuzle i regije. Grad...(ANA PEJIĆ – Može, može pričaj.) Već su dostavljeni. (ANA PEJIĆ – Može, može.) Ja, ja, ja.

Gradsko vijeće Tuzla poziva nadležne stručne službe Grada Tuzla da sugerišu investitorima navedenog projekta i aktivno djeluju na očuvanju jedinstva koje pruža Memorialni centar Slana banja, Memorialni kompleks Slana banja.

Gradsko vijeće Tuzla pozdravlja ideju za izgradnju spomen obilježja borcima Drugog korpusu Armije Bosne i Hercegovine, sugeriše i da isto bude planirano i izgrađeno na prikladnoj lokaciji. Toliko.

ANA PEJIĆ

U redu. Sljedeća diskusija, vijećnik Mirnes Ajanović, izvolite.

MIRNES AJANOVIĆ

Puna podrška prijedlogu kolege Emira. Ovo je, ma ne pretjeruje i kad kažem i hrabrost inicirati, jer vi znate kako je, odmah je to napad oni koji su dali ovakav prijedlog, on je kaže protiv armije, protiv Drugog korpusa. To nema slušanja logike, to je samo usmjerenost, kaže on je nešto protiv, neda da mi to tu stavimo. Ja sam bio napravio za današnju sjednicu inicijativu zato, ali kada je kolega predložio, odustao sam, ali ću dati podršku i dajem maksimalnu podršku. Mi umjesto da tamo pred Rudarsko geološkim fakultetom imamo park rudarstva sa svim sadržajima, to je rudnički kraj, sve smo i zovemo se po rudarstvu evo Tuzla, rudarstvo soli. Mi bi u po grada stavili nešto vojno, a onda još ova nakaradnost obilježava je malo gor pa malo dol dijelimo se, a kompleks kompletan imamo od Drugog svjetskog rata, dakle, tekovina antifašizma do sada, ispade ovako da sad Drugi korpus po tom nije više u Tuzli simbol antifašizma, već nečeg drugog. Jer ga ne stavljamo tamo gdje je simbol antifašizma. Pogrešno potpuno. Moglo bi se o tome pričati, prilično. Kolega je to kraće, politički mudro, jer ako bi ja govorio o tome, ja bih malo izazvao još i one druge da nas malo više napadnu, ali baš me briga, ali ne bih, ostaću na ovome, dobar prijedlog, i mi treba da

insistiramo na ovom, dakle, čak i da mi predložimo, da mi sad damo prijedlog da se tamo na to mjesto kao jedan zaključak napravi park rudarstva sa sadržajima koji su potrebni, da iniciramo malo problem, evo, vidimo da sad ni termoelektra nema dovoljno uglja. Treba nam, dakle, ta jedna injekcija priče o rudarstvu u Tuzli u smislu da ostane to kao jedan od industrijskih ili privrednih, bitnih i značajnih segmenata grada Tuzle. Dakle, da ih pojačamo, možda kroz ovo da mi već iniciramo na tom prijedlogu da bude to, a Grad Tuzla daje punu podršku da se osnuje, dakle, da napravi takav spomenik Drugom korpusu i, evo, daje, dakle, da se nađe adekvatno mjesto na spomeniku gdje su spomenici antifašizmu i ostali spomenici zlatnim ljljanima spomenici, sve je gore. I sad mi trebamo da izvojimo Drugi korpus od zlatnih ljljana. Ne ide. Nije u redu, nije korektno. Ovo je naš grad, bez obzira što kanton ovde ima sjedište, mi smo Gradsko vijeće grada Tuzla i mi odlučujemo i o prostornim i svim ostalim uređenjima grada Tuzle i mi možemo na ovaj način da uredimo i to. Izvolite parcelu, stavite šta god hoćete, mi ćemo pomoći doprinjeti, dati sve što treba, argumente staviti, tu su i naši borci, tu su i zlatni ljljani, tu su i djeca koja su stradala, svi su tu, tu ste nas branili, branite i branit ćete svojom istorijom i u budućnosti pokazivati kako treba braniti državu, ali to treba biti gore, a ne parcijalno, odvojeno i čak bi trebala inicijativa da se sva ta obilježja koja imamo, osim ako to baš nešto strikno ispred nekog objekta, recimo MUP u redu, logično da stoji ispred MUP-a, a sve ostalo treba premjestiti i staviti evo na Slanu banju kako je to kolega Emir predložio. Hvala.

ANA PEJIĆ

U redu. Da li se još neko javlja spred Klubova vijećnika?

Zaključujem diskusiju Klubova vijećnika.

Otvoram diskusiju vijećnika.

Zaključujem diskusiju vijećnika.

I pozivam sekretara da pročita zaključke proistekle iz rasprave. Da li ste za da glasamo u paketu o svim u redu? Izvolite, Slađana.

SLAĐANA KRAJINA – sekretar Gradskog vijeća Tuzla

- Gradsko vijeće Tuzla poziva Vladu Tuzlanskog kantona da još jednom razmotri odluku o lokaciji spomen obilježja borcima Drugog korpusa Armije Republike Bosne i Hercegovine, te da isti bude izgrađen na Memorijalnom kompleksu Slana banja zajedno sa ostalim spomen obilježjima značajnim za historiju grada Tuzle i regije.

- Gradsko vijeće Tuzla poziva nadležne službe Grada Tuzle da sugerišu investitorima navedenog projekta i aktivno djeluju na očuvanju jedinstva koje pruža Memorijalni kompleks Slana banja.

- Gradsko vijeće Tuzla pozdravlja ideju za izgradnju spomen obilježja borcima Drugog korpusa Armije Republike Bosne i Hercegovine i sugeriše da isto bude planirano i izgrađeno na prikladnoj lokaciji.

- Gradsko vijeće Tuzla sugeriše da se razmotri mogućnost da se na predviđenoj lokaciji pored objekta Rudarsko-geološko-geodetskog fakulteta napravi park rudarstva.

I u prilogu inicijativa, u prilogu zaključka inicijativa za izgradnju spomen obilježja borcima Drugog korpusa Armije Republike Bosne i Hercegovine na Memorijalnom kompleksu Slana banja.

ANA PEJIĆ

Molim vas da se izjasnite o pročitanim zaključcima. Glasanje je okončano.

Konstatujem da su pročitani zaključci usvojeni sa,
21 glasom za, nije bilo protiv i nije bilo suzdržanih.

Prelazimo na sljedeću tačku dnevnog reda:

RAZMATRANJE IZVJEŠTAJA KOMISIJE ZA IZBOR I IMENOVANJE

Te pozivam sekretara Gradskog vijeća da nas upozna sa izvještajem Komisije za izbor i imenovanja.

SLADANA KRAJINA – sekretar Gradskog vijeća Tuzla

Samo malo. Ovdje mala korekcija Rudarsko-geološko-građevinski fakultet je ispravno.

Izvještaj sa sjednice Komisije za izbor i imenovanje održane 20.02. 2026. godine.

Komisija za izbor i imenovanje je razmatrala prijedlog Kluba vijećnika Naroda i Pravda NIP sa izmjene u savjetima mjesnih zajednica te je usvojila sljedeći zaključak:

Komisija za izbor i imenovanje je razmotrila, te Gradskom vijeću Tuzla na izjašnjavanje upućuje prijedlog Kluba vijećnika Naroda i Pravde (NIP) da se:

- Suzana Ostojić razriješi dužnosti člana Savjeta Mjesne zajednice Husino
- a da se na dužnost člana Savjeta Mjesne zajednice Husino izabere Nusret Kikanović i
- Amer Mustaćević da se razriješi dužnosti člana Savjeta Mjesne zajednice Slavinovići
- a da se na dužnost člana Savjeta Mjesne zajednice Slavinovići izabere Elvira Suljagić,

pa molim predstavajuću da stavi na izjašnjavanje ovaj prijedlog Kluba vijećnika Naroda i Pravde.

ANA PEJIĆ

Molim vas da se izjasnite. Glasanje je okončano.

Konstatujem da su pročitani prijedlozi usvojeni sa,
19 glasova za, nije bilo protiv i nije bilo suzdržanih.

Pod TEKUĆIM PITANJIMA

Konstatujem da nije bilo prijedloga koji bi se razmatrali u okviru ove tačke dnevnog reda.

Te konstatujem da je dnevni red iscrpljen.

Svim građanima Bosne i Hercegovine u svoje ime, kao i u ime svih vijećnika Gradskog vijeća Tuzla upućujem srdačne čestitke povodom 1. marta, Dana nezavisnosti Bosne i Hercegovine.

Zahvaljujem se vijećnicima, predlagačima materijala, Stručnoj službi Gradskog vijeća i zaključujem 16. redovnu sjednicu Gradskog vijeća Tuzla.

(S obzirom da je dnevni red iscrpljen i 16. redovna sjednica Gradskog vijeća Tuzla zaključena ista je završena u 16:11 sati.)

STENOGRAM SAČINILI:

Selma Suljkanović

Jasminka Delalić

P R E D S J E D A V A J U Ć I

Ana Pejić, BA prava